



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

Usage guidelines

Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.

About Google Book Search

Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>



UNS. 106 G. 3






JOANNIS OWENI,
Cambro - Britanni Oxoniensis,
EPIGRAMMATA.

EDITIO
postrema & correctissima,




BASILÆ,
Apud
JOANNEM SCHWEIGHAUSER.
M DCC LXVI.





I AD LECTOREM.


Clericus es? legito hæc. Laicus? legito ista libenter.
 Crede mihi, invenies hic quod uterque voles.
 D. Du. Tr. Med.

2 Ad D. Joannem Audoënum, de libro.

Quo minus edatur, nihil impedit: aut ego carmen
 Non sapio; aut ætas, si sapit, ista leget.
 Ingenii tu rere tui tantum esse periculum:
 Judicii tamen est alea jacta mei.
 Joann. Hoskins. J. Consultus.

3 Ad Joannem Audoënum, de tribus Epigrammatum libellis.

Quicquid habent Veneres Venerum, Charitesque leporum;
 Quicquid Musa joci, quicquid Apollo salis;
 Quodcunque est Sophiæ, quodcunque est artis ubique;
 Ingenii aut Genii quicquid ubique viget;
 Omne id, Oëne, tuis reor insedisse libellis,
 Hæc quando nobis lemmata dia dabas.
 Joann. Bovvman. Theol.

4 Ad Joan. Audoënum.

Quale rogas nobis, Odoëne, Epigramma probetur?
 Dicam: Quale tuum parturit ingenium.
 Quod breve, quod castum, doctum, celere atque politum,
 Quodque habeat multos, & sine dente, sales.



Hoc tua Musa dabit, Genius promittit, & ultra
Confirmat Dominae mentio prima tua.

Tuus Gulielmus James, Theol.

5 *In laudem Autoris.*

Q Uod fuit, est, & semper erit solemne Poëtis;
Carpimur in libris fœmina, virque, tuis:
Judice me, tamen hæc Epigrammata falsa merentur,
Laudet ut ingenium vir mulierque tuum.

Jana Audoëna Oxoniens.

Ad Lectorem.

6 *In laudem Autoris; cujus Epigrammata
intra mensem secundò prodierunt. (1606.)*

S Cripserunt Latii, scripsere Epigrammata Graji;
Quos inter, vitam Nominis unus habet.
Excipite hunc; omnes superavit Oënus, & ipsum
Æquavit; si non & superavit eum.

D. Du. Tr. Med.

De tertia horum Epigrammatum
editione.

7 *Ad Autorem.*

H IC liber est Mundus; movet, & sine fine movetur:
Ipse licet taceas, Bibliopola probat:
Nam tua perpetuum exercent Epigrammata prelum,
Pene fatigatis ter repetita typis.

Joan. Hoskins. J. C.

JOAN-



JOANNIS AUDOENI
EPIGRAMMATUM
LIBER PRIMUS.

1 *Ad Illustrissimam Heroinam, Dominam
Mariam Neville, Patronam suam.*

INveniant nostri patronum ut ubique libelli,
Libros Lectori dedico, meque Tibi.

2 *Ad Lectorem.*

QUI legis ista, tuam reprehendo, si mea laudas
Omnia, stultitiam; si nihil, invidiam.


3 *Ad Jo. HOSKINS, J. C. Poëtam
ingeniosissimum, de suo Libro.*

HIC liber est Mundus: homines sunt, Hoskine, versus.
Invenies paucos hic, ut in Orbe, bonos.

4 *Ad Dominam Mariam Neville,
Patronam suam.*

SI nos Pythagoræ non fallunt dogmata, corpus
Intrârunt Pallas, Juno, Venusque tuum.

LIBER PRIMUS.



5 *Ad eandem.*

Ut Sol in cœlis, ut lux in Sole, videtur
Virtus in vultu sic habitare tuo.

Spectator quicumque venit, discedit amator:
Aut illum virtus, aut tua forma capit.

6 *Ad ejusdem filium, Thomam Neville, maxima spei puerum.*

DE Genio tam mira tuo memorantur, ut omnem
Exsuperent, quamvis omnia vera, fidem.

Qui puerum laudat, spem, non rem, laudat in illo:
Non spes, ingenium res probat ipsa tuum.

7 *Ad ejusdem filiam, Ceciliam Neville.*

ES similis matri: de te mihi dicere plura
Nil opus est; Matri te similem esse, sat est.

8 *Nosce te ipsam. In Harpalum.*

TU non es tanti, sis dignus ut, Harpale, nosci:
Quare aliquid dignum cognitione tua.

9 *Ad Causidicum.*

SI felix, rerum potuit qui noscere causas;
Qui nosti causas dicere, quantus homo es?

10 *In Joannem Protum.*

DUcturum uxorem memini te, Prote, minatum;
Ebrius uxorem ducere nemo potest.

Uxori nugas potius, quæ sobria potum
Ducere te noctu possit ab urbe domum.

LIBER PRIMUS.



11 *In Aulum, Nobilem ignobilem.*

DEgener Aule, tuis majoribus omnia debes :
Debebit, credo, nil tibi posteritas.

12 *In Hernicum.*

EMisti fatuum bis denis, Hernice, libris ;
Emissem tanto non ego te pretio.

13 *Venus.*

PRincipium dulce est, at finis amoris amarus ;
Læta venire Venus, tristis abire solet.
Flumina quæsitum sic in mare dulcia currunt :
Postquam gustarunt æquor, amara fluunt.

14 *Ad D. Gilbertum.*

STare negas terram ; nobis miracula narras :
Hæc cum scribebas, in rate forsân eras.

15 *Ad Medicos & Jurisconsultos.*

ULceribus, Galene, vales tantummodo nostris :
Stultitia nostra, Justiniane, sapi.

16 *O Tempora ! O Mores !*

SCaliger annosi correxit tempora mundi :
Quis jam, qui mores corrigat, alter erit ?

17 *Judicium Paridis.*

CUM Paris electus Divis tribus arbiter esset,
Nec præferret utram sciret utrique magis ;
Majestas tandem Veneri Junonia cessit,
Palladis & virtus ; omnia vicit Amor.

LIBER PRIMUS.



Si nunc iudicium renovata lite subirent,
Vinceret una duas Juno-Moneta Deas.

18 *Germana Veritas.*

M Erfum in nescio quo Verum latitare profundo
Democritus, nemo quod reperiret, ait.
Si latet in vino Verum, (ut proverbia dicunt)
Invenit Verum Teuto; vel inveniet.

19 *Ad Linum.*

Est tibi librorum, Line, copia: doctior esses,
Si tibi librarum copia tanta foret.

20 *Ad quendam nobilem Adolescentem.*

Quisque senectutem, mortem tibi nemo precatur:
Optatur morbus, non medicina, tibi.

21 *Ad quendam pauperem Medicum.*

Qui modo venisti nostram Mendicus in urbem,
Patrum mutato nomine, sis Medicus.
Pharmaca das aegroto: aurum tibi porrigit aeger;
Tu morbum curas illius; ille tuum.

22 *In quendam.*

Forma tibi famam peperit: sed filia matrem
Occidit, formam non bona fama bonam.

23 *In Marcum.*

Esse in natura Vacuum cur, Marce, negasti?
Cui tamen ingenii tam fit inane caput.

In

LIBER PRIMUS.



In Scriptores nostri temporis.

24 *Ad Solinum.*

NUnquid in octavo mendacia plurima vulgus
Edat, an in quarto, quæris, an in folio?
In Decimo - Sexto mentitos plurima seclo
Suspitor Historicos quolibet in folio.

25 *In Phyllida.*

BAssa, Phylli, aliis dare non vis: at data sumis:
Nimirum scis hæc accipiendo dari.

26 *Ad eandem.*

IGnis amor si sit, veluti proverbium dicunt:
Hei mihi quam tuus est frigidus ignis Amor.

27 *Impius Atheus.*

UTere temporibus præsentibus, utere rebus:
Tempus erit, nullum quum tibi tempus erit.
Grammaticus de præterito, dicatque futuro
Tempore: præfenti, dum licet, utar Ego.

28 *Epitaphium Athei.*

Mortuus est, quasi victurus post funera non sit:
Sic vixit, tanquam non moriturus erat.

29 *Optativus modus.*

Infinitive prope par modus Optativus:
Optandi finem nam sibi nemo facit.

30 *In Alanam.*

Conjugio esse jugum non intolerantius ullum,
 Nil aliud toto clamat Alana die.
 Post tot clamores & jurgia; nocte fatetur,
 Conjugio nullum suavius esse jugum.

31 *Propheta, Poëta.*

Illi de rebus prædicere vera futuris;
 Hi de præteritis dicere falsa solent.

32 *De Vita & Morte.*

Ad mortem sic vita fluit, velut ad mare flumen:
 Vivere nam res est dulcis, amara mori.

33 *De Vulcano.*

Arma faber Marti Vulcanus splendida fecit;
 Cornua Vulcano Mars speciosa dedit.
 Nimirum hoc operæ pretium, Vulcane, tulisti,
 Cornuâ pro ferro: ficcine Glaucus eras?

34 *Grammatica Anglica.*

Fœmineo generi tribuuntur - - - - -
 Propria quæ Maribus. - - - - -

35 *Liberum Arbitrium.*

Arbitrii, pro quo jam in partes scinditur orbis,
 Vir libertatem perdidit, uxor habet.

36 *De Vita & Venere.*

Omnis ad extremum properet licet actio finem:
 Oderunt finem Vitæ, Venusque suum.

37 *Cam-*

37 *Campi Elysi.*

Obscuri pater Æneas loca cæca per Orci
 Ivisse in campos fingitur Elysius :
 Nam pius Æneas, infernum ingressus Elise,
 Quis neget in campis quin foret Elysiis ?

*Maritus & Mæchus.*38 *Maritus.*

Hanc ego mi uxorem duxi ; tulit alter amorem :
 Sic vos , non vobis , mellificatis apes.

Mæchus.

Hos ego filiolos feci ; tulit alter honores :
 Sic vos , non vobis , nidificatis aves.

39 *Rhetorica nova.*

Qui caret argento , frustra utitur argumento :
 Qui dare scit , non qui dicere , Rhetor erit.

40 *In Cottam nuper cucullatum.*

Induit , uxoris pertæsus , Cotta cucullum ,
 Ut mundo moriens exueret cuculum.

41 *Insignia Genevensium.*

Clavem , Aquilamque gerit duplex Insigne Geneva :
 Illud Papatus ; hoc habet Imperii.
 Hoc Insigne tuum quo jure Geneva tenebis ,
 Si repetat Clavem Roma , Rodolphus Avem ?

42 *In Borbonii Poëtae Nugas.*

QUas tu dixisti nugas, non esse putasti:
Non dico nugas esse, sed esse puto.

43 *Fides.*

PLurima apud veteres fidium fit, nulla fiderum
Mentio; priscoorum nam fuit una fides.

44 *In Paulinum Medicum.*

CUr patiens, Pauline, tuus tibi dicitur æger?
Impatiens morbi fit licet, atque tuus.
Te quoniam patitur, Patiens tuus ergo vocatur:
Nam plus, quàm morbus, torquet eum medicus.

45 *In Cottulam.*

SI verum dixit de Socrate Apollo, sapisti
Cottula: nam tu scis te quoque scire nihil.

46 *In Fabianam.*

FErtilis à multis si terra vocata ferendis:
Fertilis est; multos nam Fabiana tulit.

47 *In Avaros, jocus.*

NAturam parvo contentam vulgus inepte
Laudat, & indigne damnat Avaritiam.
Solut enim parcus minimo satiatur Avarus:
Nam Natura parum sat putat, Ille nihil.

48 *Ad Philopatrum.*

PRo patria fit dulce mori licet atque decorum;
Vivere pro patria dulcius esse puto.

49 *Orbis.*

49 *Orbis.*

IN mundo nil constat : in orbem vertitur orbis :
Quid mirum, Recti quod sit in Orbe nihil ?

50 *In Aretinum.*

EST modus in rebus : tamen experientia monstrat,
In Veneris nullum rebus inesse modum.
Mille modos Veneris lascivia repperit ; & quod
Natura fieri debuit, Arte facit.

51 *In Silium.*

ATheus es, quia. Papistam tibi non licet esse ;
Et Protestantem non licet esse tibi.

52 *In Atheos.*

NULLa domus domino caruit ; vos hancine tantam
Nullius domini creditis esse domum ?

53 *Medicus.*

ACCipit oblatum Medicus, dare non solet, aurum :
Pharmaca dat Medicus ; non solet accipere.
Ordonner Medicos, egros Or donner oportet ;
Alterius sic res altera poscit opem.

54 *Jurisconsultus.*

JURIS-prudentes prudentes jure vocantur ;
Tam bene cum studeant, provideantque sibi.

55 *Aulicus.*

SI bonus es, melior, non major tempore fies :
Si magnus, major tempore, non melior.



56 *Ad Marcum Luscum.*

UNus, Marce, deest oculus tibi; sufficit unus:
 Plura vident oculi, non meliora, duo.
 Sunt mihi binæ aures: tamen his nil audio veri:
 Bini oculi: video nil tamen hæc boni.

57 *In Paulum.*

NE pereat tua fama, struis tibi, Paule, sepulchrum.
 Tanquàm non possint ipsa sepulchra mori.

Secretum contra Canitiem.

58 *Ad Bithynicum.*

NE tua sit posthac, Bithynice, cana senectus,
 (O te felicem!) calva iuventa facit.
 Probatum est.

59 *In Theodorum.*


DUcentem ad cœlos Theodorus, conjuge ducta,
 Credidit angustam se reperisse viam.
 Esse videbatur Theodoro quæ via Cœli,
 Duxit ad infernum: nam via lata fuit.

60 *Apollo & Musa.*

MUsæ sunt generis muliebris; Apollo virilis:
 Unus enim Musis præstat Apollo novem.

61 *In Alanum, jam senem.*

UXoris cubito cubitum conjungit Alanus;
 Et solet hunc dulcem dicere concubitum.

62 *Kalend. Januar.*

MUnera divitibus non dat, ne dando rogaret.
 Pauperibus donat nil (quia pauper) Olus.
 Expectans meliora datis, dat munera Quintus;
 Quodque verebatur poscere, dando petit.

63 *In Pontiam.*

IN mare Cornutos jaciendos, Pontius inquit:
 Pontia respondit: Disce natare prius.

64 *Opus tenebrarum.*

Servandam ad Speciem, qua non magis utilis ulla,
 Res individuo nulla nociva magis.

65 *Mentiris.*

Mentiris! Cave militibus ne dixeris unquam:
 Majus eo nullum dedecus esse putant.
 Mentiris, tantum qui dedecus esse putatis,
 Mentiri quare creditis esse decus?

66 *In Hypocritam.*

Nil juras, metuisque superstitiosus haberi:
 Omnia mentiris; Religiosus homo es.

67 *Androgynus.*

IN quo Mercurii facies Venerisque videtur,
 Nec vir, nec virgo est; Hermaphroditus homo est.

68 *Venus.*

USque fluit fagitivus Amor, refluitque vicissim,
 Ut mare: quid mirum? nam Venus orta mari.
 Nulla



Nulla fides Veneri, levis est, interque planetas
Ponitur (haud inter sidera fixa) Venus.

69 *In Rivales.*

UNusquisque sibi vult Phyllida solus habere:
Crede mihi, non est hic amor; invidia est.

70 *Mulier.*

DIsta fuit mulier quasi * mollior: est tamen Eva
Non de carne sui sumpta, sed ossē, viri.

* Varro de ling. lat.

71 *Medicorum & Jurisconsultorum
cognatio.*

JURisconsultorum idem status & Medicorum est,
Damna quibus licito sunt aliena lucro:
Hi morbis aegrorum, aegrorum litibus illi
Dant patienter opem, dum potiantur opum.

72 *De Pamphilo, ad Philippum.*

NON patitur Vacuum in rebus Natura, Philippe:
Naturam sequitur Pamphilus ergo ducem.

73 *Ad Calvum.*

ARBoribus redeunt crines, & gramina campis:
At capiti frondes non rediere tuo.

74 *Nilo negli occhi, Aetna nel cuore.*

FRigidus ardentē intravit Nilus ocellos,
Dum cor Aetnae carpitur Igne meum.
Nec tantus fluvio lacrymarum exstinguitur ardor,
Nec tanti fletus flumina flocat amor.



Sic sibi discordes, exercent vim tamen ambo
In me concordēs, ignis & unda suam.

75 *Ceteris paribus. In Camillam.*

PÆta Camilla procis ambita & amata duobus,
Quorum pulchellus sed brevis alter erat.
Non formosus erat, sed erat longissimus alter;
Utrum horum mavis, virgo rogata rudis?
Continuo hunc lustrans oculis, & brachia longa,
Nasum, crura, pedes, omnia longa videns;
Prudenter respondit ad hoc magis anne pudenter?
Hunc longum volo, si cætera sunt paria.

76 *De Gigantibus & Nanis.*

MOnstra, Gigas, Nanusque, duo contraria formis;
Vir, Gigas, immanis; Nanus, inanis homo.

77 *In duos Abbatis spurios.*

IN templo orantes reliquis cum fratribus una,
Vos duo non sistè dicitis, Abba Pater.

78 *Sacerdotes.*

PResbyteri uxores duxere: quid inde luçantur?
Scilicet in Decimis hoc habuere prius.

79 *Participium.*


CUm Verbum sit Eras, mus Nomen: quid sit Erasmus,
Ingenio Lector colligat inde suo.

80 *Casus, ad Jurisconsultos.*

CUm propria imprudens conjux uxore coivit,
Quam falso alterius credidit esse viri.

B

Hoc



Hoc genitum coitu, Consulti juris & æqui,
Legitimè natum dicitis, ane nothum?

81 *De Aurora.*

Miraris, Lucem summo quod mane priorem
Sole vides? Lux est condita Sole prior.

82 *De Die.*

Sit Nox centoculo quamvis oculatior Argo,
Plus uno cernit lumine lusca Dies.

83 *De Nocte.*

Induitur tristem cur Nox atrata colorem?
Luget defunctum Nox, quasi nupta, Diem.
Consolarentur mœstam nisi sidera noctem,
Opprimeret reducem nos dolor ante diem.

84 *In Marcum.*

Carmine, Marce, tuo laudas me: fallor, an hoc tu,
Ut tua collaudem carmina, Marce, facis?

85 *Mors.*

Restituunt furtum fures, vi rapta latrones:
Omnia Mors aufert, restituitque nihil.

86 *Ad Amicum.*

Cum sis dimidium dominæ, quam diligis unam,
Dimidiumque tuus, parte quota meus es?
Te scribis tamen usque meum. Qui, conjuge ducta,
Vix tuus es, pacto quo meus esse potes?



87 *Vir bonus.*

SI quicquid rarum, carum est, pretiumque meretur;
Credere mihi, res est Vir pretiosa Bonus.

88 *In quendam senem.*

EX nigro mentum senio mutatur in album:
Candida quæ fuerat mens tibi facta nigra est.

89 *In Paulinum.*

QUicquid ab antiquo, Pauline, rogaris amico,
Hoc te facturum cras mihi semper ais.
Visne tibi dignas reddam pro munere grates?
Gratia pro meritis cras referenda tibi.

90 *In fucatas.*

QUæ pictas geritis facies, vos jure potestis
Dicere cum Flacco: Pulvis & umbra sumus.

91 *In Cottam.*


TOTUS es uxoris, non solus, Cotta, Camillæ:
Sola tua est; at non tota Camilla tua est.

92 *Politicus.*

DISSIMULA, SIMULA, quoties occasio poscit,
Moribus ut morem temporibusque geras.
Temporibus, qui rite sapis, servire memento
Omnibus, ut tempus serviat omne tibi.

93 *In Venerem.*

CUR Venus illicitum sequitur Vulcania Martem?
Vulcanus licita claudicat in Venere.

94 *In Damianum.*

Nemo simul dominis par est servire duobus:
Tu servis Dominiæ, non igitur Domino.

95 *In Marcum.*

Barba tibi crevit, ceciderunt, Marce, capilli:
Iade tibi gravis est barba, caputque leve.

Strena Calend. Jan. 1603.

96 *Ad D. J. Hoskins.*

Ambiguos tecum peragens socialiter annos,
Oxoniz juvenis, Wintonizque puer;
Sæpe tuum in dubiis sine fuco expertus amorem
Rebus, & indubiam sum sine fraude fidem.
Hoc tibi mnemosynon me mittere iussit amoris,
Qui mihi te junxit, me tibi vinxit: Amor.

97 *In Epicharmum.*

Cur non vis, Epicharme, mori; sed mortuus esse?
Vis, Epicharme, mori; sed sine morte mori.
Fert mortem dolor: aufert mors optata dolorem:
Est igitur pejor morte, Epicharme, dolor.

98 *In Phyllida.*

Sicut equo jaculans Parthus fugit & ferit hostem,
Phyllis amatorem sic fugiendo capit.

99 *In Hallum Grammaticastrum.*

Sum famosus, adhuc jejunos dum foret, Hallus;
Infamis nunc sum, cum satur esset, ait.



100

De Magnete.

Cuncta trahunt ad se Magnates aurea : sicut
 Ad se Magnetes ferrea cuncta trahunt.
 Tecum nil mihi, sit gens aulica (docta rogare)
 Cum das, parca satis; prodiga, quando petis.
 Omnia te adversum spectantia, nulla retrorsum,
 Munera, me terrent, ut nihil inde petam.

101

Mors.

Mors quid sit, rogitas? si scirem, mortuus essem:
 Ad me, cum fuero mortuus, ergo veni.

102

Cliens.

Antabunt reduces coram latrone Clientes:
 Semper enim vacuus currit ab urbe Cliens.

103

In Zoilum.

Quod mores accuso malos, me, Zoile, carpis;
 Conscijs an forsan, quod reprehendo tuos?
 Cur tibi prae reliquis metuas? fortasse ego, mores
 Cum reprehendo malos, tum reprehendo meos.

104

Children and Fooles tell truth.

Anglica veridicos dicunt proverbialia stultos;
 Ergo Anglis, verum dicere, stultitia est.

105

In Calvum.

Certa tuae frontis fuerat mensura, priusquam
 Nescio quae frondes abstulit aura tuas.
 Ex quo decussi tibi sunt de vertice crines,
 Perpetuae frontis jam caput instar habes.



Quanta tibi nunc sit frons, dicere non potes : ergo
Fronti nulla fides est adhibenda tuz.

106 *In eundem.*

CAlve, meos nunquam potui numerare capillos,
Nec tu (nam nulli sunt) numerare tuos.

107 *Apologia Fortune.*

NNulla mala est Fortuna, æqua omnibus, omnibus una;
Spern dat pauperibus, divitibusque metum.

108 *In Cottam.*

IIntraffet calidum nuper cum Cotta lupanar,
Dicitur infecta re rediisse domum.

109 *In Procillum, Magnatem.*

SIn non audires dicentem falsa, Procille;
Auderet falsum dicere nemo tibi.

110 *Ad Paulum, Jurisconsultum.*

IIn te, Dominamque tuam sic dividis annum,
Ut vix dimidia parte sit ille tuus.

Conjugis una tuæ pars dicta Vacatio; nempe
Tum vacat uxoris rebus adesse tibi.

Altera pars non tota tua est, rem quando relictæ
Negligis uxoris, remque clientis agis.

Terminus hæc anni pars litigiosa vocatur;
Non male, nam Venerem terminat ille tuam.

111 *Ad eundem.*

TErminus est nullus tibi, nulla vacatio lucri:
Totus enim lucro litigiisque vacas.

112 *Ad*

112 *Ad Marimum.*

A Lecto surgit quoties intacta, Marine,
 Conjux, in vultus irruit ungue tuos.
 Infensam blande alloqueris; sed inania perdis
 Verba: satis fieri re cupit illa sibi.

113 *Chirurgus.*

Bella magis, pacemne precer? mihi servit utrumque:
 Ambo patroni Marique, Venusque mei.

114 *Lues Venerea.*

Itala terra mihi patria est, Gallique parentes;
 Gallicus, in dubio est, Italicusne vocer.

115 *Calumniatores, Adulatores.*

Dixit Anaxagoras, atram esse nivem, gravis autor:
 Hæc ætas multos vidit Anaxagoras.
 Laudavit niveas corvi vulpecula pennas:
 Hei mihi, quot vulpes sæcula nostra ferunt!

116 *In Ponticum.*

TE mihi dixisti resipiscere: non tibi credo,
 Pontice, qui nunquam te sapuisse scio.

117 *Herculeus labor decimus tertius.*

Conjugis ingentes animos, linguamque domare,
 Herculis est decimus tertius iste labor.

118 *Mars, Mors.*

Bella famem, pestemque fames mortalibus affert;
 Est igitur bellum pejus utroque malum.

24. LIBER PRIMUS.



O mega nostrorum Mors est, Mars Alpha malorum:
In bello distant O mega & Alpha parum.

119 *In Cynthiam.*

Sint utinam similes formæ tibi, Cynthia, mores;
Sitque tibi tam mens candida, quam manus est.

120 *In Gelliam.*

Dum peccas sine teste, putas te, Gellia, tutam;
Quanquam turpe nihil tu sine teste facis.

121 *In Albinum.*

Nunc tua res agitur, paries nam proximus ardet,
Albinum Felix obvius admonuit.

Uxorem factò properans Albinus in ipso
Repperit: O, inquit, nunc mea res agitur!

122 *In Claudium Philosophastrum.*

IN tres partitus species Bona, Claudius æger,
Pauper, & insipiens, nil habet ipse trium.

123 *De Bardella, latrone Mantuano.*

Bardellam Monachus solans in morte latronem,
Euge, tibi in Cœlo cœna paratur, ait.

Respondit Bardella: Hodie jejunia servo;
Cœnabis nostro, si lubet, ipse loco.

124 *In futilem Floram.*

Cum quocunque cois, rem factam, Flora, fateris;
Plusque fatendo mali, quam faciendo, facis.

125 *In Quintilum.*

QUintillus cur nil dat amico? donat amicæ
Omnia; cui primum se, sua deinde dedit.

126 *Ad Aulum, de Quintio senec.*

QUintius indomitam quod duxerit, Aule, juvencam
Condis in insanum cur Epigramma senem?

Convenientius huic Epicedion esset amanti

Amenti; effodit jam * taphon ipse sibi.

* *Sepulcrum,*

127 *In Costum.*

TU peccas impune, at non tua mentula: nuper
Supplicium capitis pertulit ulla sui.

128 *Ad Cynthiam epistolam responsio.*

CAndida charta ad me tua venit; Epistola nigra:
Hæc index cordis; corporis illa tui.

129 *Ad Sextilianum, Sp.*

TE cum progenuit, non credo creare volebat
Te tuus, ac tantum se recreare, pater:
Si plus quam donum mens respicienda datoris,
Non debes vitam, Sextiliane, patri.

130 *In Porciam, Hypocritam.*

DIsplicet in nostro tibi mentula lecta libello:
Vis sine pene librum; non sine pene virum.

131 *Saturni tres filii.*

THeiologi ambigui; Juristæ lenti & iniqui;
Immundi Medici; Mundus ab his regitur.

B 5

132 *Ad*



132 *Ad amicum conjugatum de Cœlibatu.*

VÆ soli, sapiens Rex non sine conjuge dixit;

* Nil melius vita cœlibe, Paulus ait.

Væ nobis, inquit conjux: at væ mihi, cœlebs:

Væ nostrum simplex ergo, tuumque duplex.

* *Proverb. Cambro-Britannicum*: Gwelb iwguarfi, nagwaini. *id est*, *Melius est væ mihi, quam væ nobis.*

133 *In J. Corneum.*

AUdi, cerne, tace, cui publica contigit uxor:

Hæc tria præcipue verba notanda tibi.

134 *In Cajum.*

Accusaretur cum coram Præfule Cajus,

Confessus bigamum seque professus, ait;

Unius uxoris vir Episcopus esse jubetur;

Ergo licet Laïco nunquid habere duas?

135 *In Pomponiam.*

Corpore cum quæstum faciat Pomponia, punctum

(Utile nam dulci miscuit) omne tulit.

136 *In Pinotum, Colico morbo laborantem.*

SI non efflasset animam, Pinote, perisses:

Quod mors est aliis, hoc tibi vita fuit.

137 *In Pomponiam.*

Induit instabiles capiti Pomponia plumas:

Quodque insigne fuit Martis, erit Veneris.

Scilicet in Martis gerit has Cytherea favorem:

Indicat hoc, Marti quam sit amica Venus.

Suum cuique pulchrum.

Cic. Tusc. quæst. lib. 5.

138 *Ad*



138

Ad H. L.

Plus tibi vicini conjux, tua plus placet illi:
Cuique igitur pulchrum non solet esse suum.

139

Venus.

Cum tam Venalis quam Bacchus proftet in urbe,
Cur insigne suum non habet alma Venus?

Difficilia quæ pulchra.

140

Ad Marinum.

Si fit difficilis quæ pulchra, Marine; puellam
Accipe tu facilem, da mihi difficilem.

141

In Theodorum.

Uxorem tibi more novo fas ducere non est:
Quid refert? veteri nam tibi lege licet.
At tu * Mosaicam violasti bis quoque legem:
Nupta prior meretrix nam fuit: hæc vidua est.
* *Levit. c. 21. v. 7. 13. & 14.*

Strena Kalend. Jan. 1599.

142

Ad Germanicum.

Mitto tibi carmen, Germanice; muneris instar:
Mitte mihi munus; carminis instar erit.

143

Sara.

Quæ velit ancillam concedere nupta marito,
Res est hoc nostro tempore rara, Sara.

144 *Ad*



144

Ad D. T.

SERVUS discipuli cum sis, Dominique Magister,
Invideo titulis & miseresco tuis.

145

In Paulam, Atheam.

VIr ducatne duas, an nubat virgo duobus,
Quæritur: hanc litem solvere Paula volens;
Una viris, inquit, magis apta duobus: In una
Consistent aliter quomodo carne duo?

146

In medio virtus.

AMBulat in medio mulier pomposa virorum,
Virtus jam medium perdidit ergo locum.

147

In Acerram.

FELIX, quem faciunt aliorum cornua cautum,
Sæpe suo celebs dixit Acerra patri.

148

Ad Pinotum.

ESSE velim Venerem qualem, Pinote, requiris?
Venalem nolo, vendibilemque volo.

149

In Quintum & Quintinam.

CONjugis observat nutus, ut Numina, Quintus;
Verba putat leges, imperiumque preces.
Ducit, agit miserum, quo vult, Quintina, maritum;
Ut dubites, habeat, non habeatne virum.
Contra naturam, & mores, legesque loquendi,
(Grammatici fugite hinc) hæc Vir, & hic Mulier.

150 *Ad Amicam absentem.*

URor amore miser, tantoque potentius uror,
Quanto qui me urit longius ignis abest.

151 *In Paulinam.*

PRimo infida viro Paulina, infida secundo:
Toto interregni tempore casta fuit:
Casta metu famæ, plusquam formidine culpæ,
Frustrifero metuens credere semen agro;
Multus eam peteret licet importunus amator,
Concessit nulli, sede vacante, locum.

152 *In Gelliam.*

DICere si sacris pretium est Simonia rebus;
Et rem divinam mercis habere loco:
Tu Simoniaca es vere, quæ vendis amorem,
Gellia, nam res est spiritualis amor.

153 *In quandam.*

REs tibi in immensum quam parvo tempore crevit!
O mega nunc, annos O micron ante duos.

154 *Ænigma.*

DIC, quibus hoc animal terræ nascatur in oris?
Masculus est mater cui, Mulierque pater.

155 *Aliud, ad Ponticum.*

ESse duos oculos miror tibi, Pontice; cujus
Unocula est mater, unoculusque pater.

156 *In D. Vitum.*

AN sis cornutus, Vite, nescio; Te scio Taurum:
Nuper enim nati sunt tibi tres Vituli.

Dacty-



Dactylus.

157 *Ad Amatorem.*

AD Dominam intrepido vis tendere carmina curſu?
 Scire operæ pretium eſt, quo pede verſus eat:
 Nimirum pedibus metrorum ex omnibus, unum
 Præ reliquis mulier Dactylon omnis amat.

158 *Amor descendens.*

INCIPIT à geminis, perque os descendit, ocellis,
 Incidat in centrum donec Amoris, amor.

159 *In Balbam.*

BALBA vale ſponſo cum diceret, inquit; Apud nos
 Spero futu-tu-rum te Phi-Philippe brevi.

De Furto, problema.

160 *Ad Juristas.*

QUI domino invito rem contrectaverit, eſt fur.
 Quid ſi hoc invita non faciat domina?

161 *In Ponticum.*

POLLICITUS nonnulla, nihil mihi, Pontice, præſtas?
 Ut medicus, quamvis nil det, ait, Recipe.

162 *In Cerelliam, eunucho Gallo nuptam.*

NUNC ego Spartanos iterum deſidero mores,
 Spondeat ut nudo nuda puella viro.
 Nuper enim ſterili deſponſa Cerellia Franco,
 Crediderat Gallo nubere; nupta Capo eſt.

163 *De Cornibus, problema.*

SI quando sacra jura tori violaverit uxor,
Cur gerit immeritus cornua vir? Caput est.

164 *Ad Germanicum Calend. Jan. 1600.*

VEL munus donato mihi, vel reddito versus;
Quos hac donavi conditione tibi.

165 *Christ Church Colledge in Oxford.*

SI domus imperfecta licet, similisque ruinæ;
At patet in laudes * area lata tuas.
* *Christ Church quadrangle.*

166 *In Phyllida.*

PHYLLIS amica capi nostro se carmine fingit:
Carmen amat; carnem sed magis Phyllis amat.

167 *Ad Samuelem Daniel.*


TEMPORA consumo nugis & inanibus, & sis
Ne pereant, vitæ tempora perdo meæ.

168 *Ad Lectorem, de seipso.*

NOstra tibi brevis ignavia forte videtur:
Crede mihi, labor est non levis, esse brevem.
Non facio ut multi, qui multa & stulta loquuntur:
Sermo meus stultus forte; tamen brevis est.

169 *In gloriosum Thraſonem.*


CUr immensa gerat miles calcaria Thraſo?
Quæritur: Immenſum gloria calcar habet.



170

De seipso.

Qui petit, accipiet, Jacobus Apostolus inquit:
O si Jacobus Rex mihi dicat idem!

171 *Musica Aulica duarum vocum.*


dum tollitur, Aulicus
inquit:



dum cadit, alter ait.

172

Ad Lectorem.

Tabificum non accendat liber iste Tabaccum:
Terge libro potius posteriora meo.

173


Ad Librum.

ME vivo, moriere Liber fortasse: quid inde?
Sæpe senem moritur filius ante patrem.
Seu moriari igitur vivo me, five superstes
Sis mihi; Mortalem me genuisse scio.

FINIS LIBRI PRIMI.



JOAN.



JOANNIS AUDOENI
EPIGRAMMATUM
LIBER SECUNDUS.

I *Ad Lectorem.*

NE placeant stultis, quorum sunt omnia plena,
Carmina non multis nostra placere volo.
Sat mihi sunt pauci lectores; est satis unus:
Si me Nemo legat, sat mihi Nullus erit.

2 *Ad incomparabilem Heroïnâ D.
Mariam Neville, Patronam suam.*

EX vatum ingeniis multorum gloria pendet;
Debetur merito laus tua tota tuo.

3 *Ad eandem.*

SI quem forsan habes, inimico nil male, amicis
Omnibus ex animo visque facisque bene:
Unum hoc est, quod tu non oblivisceris unquam:
Unum illud, nunquam quod meminisse soles.

4 *Ad eandem.*

Pingitur in tabulis formæ peritura venustas:
Vivat ut in tabulis, quod perit in facie.
Non possum in tabulis; quod possum, carmine pingo:
Vivat ut in chartis, quod perit in tabulis.



In tabula quanquam te ponere solus Apelles
Dignus, & in versu solus Apollo fuit.

5 *Ad D. J. Poëtam ingeniosissimum.*

EGregius non sum vates : tamen è grege vatum :
E grege tu vatum non es ; at egregius.

6 *Quid novi? ad D. J. Harington Equit.*

Stulta rogatorum me turba moratur euntem ,
Quæritat in lingua dum nova quisque sua ,
Nunquid Oëne novi ? Nil novi scilicet inquam ;
Aut si quid novi, nil tamen , ajo , novi.

7 *Aula.*

Quisquis in ambigua se non accommodat aula
Omnibus ingeniis, non habet ingenium.

8 *In Aulum.*

Factus eques quare es ? te pluris ut æstimet uxor ?
Jam non te ; sed se diliget , Aule , magis.
Et tibi constabit pluris , quam constitit olim ;
Carior ergo tibi , quam fuit , uxor erit.

9 *In Chymicum.*

Rem decoxit iners Chymicus , dum decoquit aurum :
Et bona dilapidat omnia pro lapide.

10 *Trojanus.*

Trojani everfa sapuerunt denique Troja :
Quis non * Trojanum se fateatur in hoc ?

* *A true Trojan.*

11 *De Remedio amoris.*

IGni subtrahito lignum (jejunia fervans :)
 A muliere sede (sicut ab igne) procul.
 Si tuus istorum neutro consumitur ardor,
 Uxor ducenda est. Hæc erit instar aquæ.

12 *Troynovant. Ad Londinenses.*

EX cinere ut Phoenix Phœnicis nascitur alter,
 Londinum Trojæ prodiit è cinere.

13 *J. Consultorum Deus.*

Magnus in urbe Deus Romana Terminus olim:
 Est Westminsteria major in æde Deus.

14 *Terra.*

OMnibus in rebus medium laudare solemus:
 Scilicet in medio credimus esse modum.
 Est igitur cœlo tellus laudatior alto.
 In mundo medium nam tenet illa locum.

15 *Ad Jacobum Regem, Defensorem fidei.*

Maximus es Regum fidei qui castra sequuntur:
 Nempe tuæ fidei creditur ipsa Fides.

16 *Ad illustrissimum Comitem Dorcestria,
 Thomam Sackevile, summum Angliæ
 Thesaurarium, &c.*

Thesaurarius es regni regnoque fidelis:
 Præstat thesauris omnibus ista fides.

36 LIBER SECUNDUS.



17 *Ad illustrissimum Comitem Salisburia,
Robertum Tacilium, Regis summum
Secretarium, &c.*

TU secreta tibi regnorum credita servas:
Estque tuæ fidei semper habenda fides.

18 *Ad magnificos Venetos.*

Imperii Emporii (mirum) fundamina vestri
Funditus in fluido sunt solidata salo.
Ne solum mutis habitentur piscibus undæ,
Æquoris incultas incoluistis aquas.
Orbis in Oceano quæ quondam pars fuit, urbs est:
Natura ante Salum quod fuit, arte Solum.
Imperio sedem hanc æterno plus prope vobis
Quam sibi constantem constituistis aquam.
Quid mirum vestram consistere legibus urbem,
Legibus exleges cum teneatis aquas?

19 *Ad nobilissimum Heroa D. Thom.
Egerton, Angliæ Cancellarium.*

Legem ne violet Vis adversaria juris
Maxima, justitiam callida jura premant:
Jure tibi in leges permissa potentia, summum
Intra cancellos Jus cohibere suos.

20 *Ad illustriss. D. Henric. Howard,
Comitem Northamptonia, &c.*

Sis claris, Howarde, licet majoribus ortus,
Jamque renascentis nobilitatis honor:
Tu tamen (in prisco mirabile quod fuit ævo:
At nunc prodigii pondus & instar habet)

Post.



Postponis meritis mercedem, legibus arma,
Virtuti vires, ingenioque genus.

21 *G. Cæcilius nuper Angliæ Thesaur.*
1596.

PERparvi sunt arma foris, stratagemata parvi,
Sit nisi consilium, Cæciliusque domi.
Cæcilius, velut alter Atlas, divinitus ortus:
Hic humeris cælum sustinet, ille Statum.

Virtute duce, Comite fortuna.

22 *De eodem.*

FORTunam Comitem regina creavit Elisæ:
Cur non Virtutem fecerat ergo Ducem?

23 *Ad Reverendiss. D. Richard. Vaghan,*
Episcopum Londinensem.

PRæsul es (ô Britonum decus immortale tuorum!)
Tu Londinensi primus in urbe Brito.

24 *Ad eundem.*

HI mihi doctores semper placuere, docenda
Qui faciunt, plus quam qui facienda docent.
Pastor es Anglorum doctissimus, optimus ergo:
Nam facienda docens, ipse docenda facis.

25 *Ad Reverendiss. D. Thomam Bilson,*
Episcopum Wintoniensem.

TU mihi præceptor quondam, Bilsone, fuisti:
Debeo præceptis, scribo quod ista, tuis.



26 *Gulielmi Wicham, Episcopi olim Wintoniensis, Vita, à Martino J. L. Doctore latine edita.*

DEfunctum vitæ defuncto reddere vitam,
Non est cuiusvis: hic labor, hoc opus est.
Quod nisi fecisses, jam tu, Martine, perisses:
Ergo per hunc unum vivitis ambo librum.

27 *Collegium Wintoniense.*

Prima Scholas Europæ inter Wintonica; cujus
Pars ego, quæ mea laus maxima, parva fui.
Hunc tibi primatum nec Zoilus ipse negabit,
Si tibi Wichamum noverit ipse patrem.

28 *Philippus Sidnejus.*

Quod fit ab antiquo tantum cantatus Homero,
Felicem Macedo Rex vocat Æacidem.
O me infelicem! quia tu, divine Philippe,
Felix carminibus non potes esse meis.

29 *Ad eundem.*

Qui scribenda facit, scribitve legenda, beatus
Ille; beatior es tu, quod utrumque facis.
Digna legi scribis, facis & dignissima scribi:
Scripta probant doctum te tua; facta probum.

30 *In Nuptias Gulielmi, Com. Penbrokia;
& Maria, Comitis Salopia filia. 1605.*

Moribus, ingenio, formaque, ætate, bonisque
Estis, & heroïca nobilitate, pares.
Nobiliore tamen longè te conjuge dignum
Censeo; te dignam nobiliore viro.



31 *Ad Elisabetham, Comitiss. Rutlandia,
Philip. Sidneji filiam.*

QUod pater ille tuus fuerit, laus magna Philippi est;
Laus tua, quod tanti filia patris eras.

32 *Ad Luciam, Comitissam Bedfordia.*

PRAclarum lux ipsa dedit tibi, Lucia, nomen;
Luceat in toto nomen ut orbe tuum.

Te pater illustris generosaque mater in orbem,
In lucem virtus, ingeniumque tulit.

Annulus equestris.

33 *Ad D. Henricum Goodyeer, Equitem
dignissimum.*

NOBilitas aurum, Virtus tua gemma sit: usque
Versetur digitis Annulus iste tuis.

34 *Ad D. Joann. Harington, Equitem
doctissimum.*


CARmina non sine re tua sunt, sine nomine quanquam:
Scriptores alii, re sine, nomen habent.

35 *Ad D. B.*

SI bene qui latuit, bene vixit; tu bene vivis,
Ingeniumque tuum grande latendo patet.

36 *Ad D. Thomam Chalonerum Equitem,
Præpositum Domui Principis.*

PRincipis efformas tenerum sic pectus, ut olim
Non modo regnorum Rex sit, at ipse sui.



Quatuor hoc quintum regnis ut præferat unum,
Imperiumque sui quatuor Imperiis.

37 *Ad D. Adamum Newton, Principi
à studiis.*

TERgemini Britonum regni spes altera Princeps
Jam docilis docto discit ab ore tuo.
Quem sic instituis, ventura ut nesciat ætas,
Rex fuerit major, doctior, an melior.

38 *Ad D. Gualterum Gwyn.*

PRincipis incrementa boni, vates pius, optas;
Et, * Cresce Arthuri in sede futurus; ais.
Ingenium natura dedit, fortuna secundet;
Et crescente tuus Principe crescat honos.

* *Fatale quasi Anagramma Principis, ut exstat in li-
bro Anagram. Domini G. Gwyn, in Scotia ante
renatam Britanniam edito.*

39 *Franciscus Drakus.*

DRake, pererrati novit quem terminus orbis,
Quemque semel mundi vidit utrumque latus;
Si taceant homines, facient te sidera notum.
Atque Polus de te discet uterque loqui.
Plus ultra Herculeis inscribas, Drake, columnis;
Et magno, dicas, Hercule major Ego.

40 *Vires Britannia, Ad Principem.*

ANglorum portæ sunt portus, mœnia classes,
Castra æquor, valli corpora, corda duces.

41 *Globus terrestris.*

TERra atque unda globum faciunt (quis crederet?) unum:
Scilicet hæc semper manat; at illa manet.

42 *Infana Sanitas.*

QUo tibi potarum plus est in ventre Salutum,
 Hoc minus, epotis hifce, salutis habes.
 Contingant utinam tales tibi mille falutes,
 Non equidem invideo; mi fatis una falus.
 Una falus fanis nullam potare Salutem;
 Non est in pota vera falute falus.

43 *Theologus.*

SCire tuum nihil est, nifi te fcire hoc fciat alter:

Politicus.

Si fciat hoc alter, fcire tuum nihil est.

44 *Omnia appetunt bonum.*

FAllor! an à Verbo Nomen trahit optimus? opto:
 Optat enim fapiens optima quifque fibi.

45 *Rara avis in terris.*

VIrgo puellari morbo Burgunda laborans,
 Jam desperata fæpe falutis ope,
 A Medicis mentam confultis juffa minutam
 Sumere, quæ multis utilis herba fuit;
 Quam per peccatum vel vivere, maluit (id quod
 Peccati pretium debuit effe) mori.

46 *Democritus & Heraclitus.*

ILle nihil nifi rifit: & ifte nihil nifi flevit:
 Iftene ridendus, flendus an ille magis?

47 *In Langam.*

LAnga Lutherano nubens Papana marito.
 Ansam ut diffidii tolleret omnis, ait:
 Jurgia ne pacem perturbent ulla futuram,
 Tu mihi sis facilis, non ero dura tibi:
 Arbitrii libertatem mihi credito, eritque
 De reliqua tecum lis mihi nulla fide.

48 *King Arthurs round table.*

Cur præfers mensam quadratæ, Arthure, rotundam?
 Fecerunt homines quadra; rotunda Deus.

49 *Ad Annam.*

Multum amet, ingenii nec sit vulgaris oportet,
 Ex merito qui te laudet, ametque tuo.

50 *In Hernicum.*

Commendans animam cælo, terræque cadaver,
 Hernicus horrendum mortis iturus iter,
 Uxorem interea tempus captare, novumque
 Audivit sibi jam conciliare virum.
 Invidus audito hoc, delusa uxore, revixit
 Denuo; decreffet cum tamen ante mori.

51 *De Amore & Fide.*

Fecerunt Amor atque Fides divortia? nusquam
 Non suspecta Fides, suspiciosus Amor.

52 *Amator.*

Pes incerta, timor constans, fugitiva voluptas,
 Gaudia mœsta, dolor dulcis, amarus Amor.

53 *Ætas aurea.*

Cognita Tartarei cum nondum vis foret auri,
Aurea cur ætas illa vocata fuit?

54 *In Alanam.*

IN thalamo Natura locum cui præbuit imum,
In mensa summum furnit Alana sibi:
Stilicet imperium facilis cum conjuge conjux
Dividit, hic noctes regnat, & illa dies.

*Mors Germanica.*55 *Ad Polynicum.*

Mors (inquit Seneca) est non esse, Polynice: contra
Germanus mortem, non bibere, esse putat.

56 *In Philodemum.*

Rara fugis propter pretium: communia quaris:
Carior est cara vilis amica tibi.

57 *In Battum.*

Batte, tacenda ultro loqueris, veniamque precaris:
Visne tibi venia nil opus esse? tace.

58 *Gordius nodus.*

QUEM solvit Rex ense suo, magis estne solutus
Ingenio nodus Gordius, an gladio?
Ingenio nodum potes hunc dissolvere nullo:
Sed nec Alexander scinderet ense suo.

59 *Amor.*



59

Amor.

Bellum, pax rursus; vitia hæc in amoribus insunt:
Se comitantur enim semper Eros & Kris.

60 *Lites. Leges. Ad D. Guil. Jones, J. C.*
Cognatum suum.

Lis genuit leges; legum lis filia: vivi
Non sine lite solet, nec sine lege potest.

61

Parcus & Prodigus.

Rhetoricæ studiosus ego sum, Prodigus inquit:
Parcus ait, Logicæ sum studiosus ego.
Semper clausa manus Logicam designat avari:
Prodiga Rhetoricam semper aperta manus.

62

Πόνος.

Romanis gnavis cum vix dolor ipse labor sit,
Ignavis Grajis est labor ipse dolor.

63

Vir bonus, fortis, sapiens.

Divitiis plerumque caret bonus (intus abundans)
Ingenio fortis vir, sapiensque fide.

64

Ordo velleris aurei.

Dux Burgundorum, vetus ut fert fama, Philippus
Ordinis aurati velleris autor erat.
Auriferos oujus nunc hæres possidet Indos:
Non igitur fuit hic Ordo, sed Augurium.



65 *In Comitibus Dorcestriae Angliae Thesaurarii dictum :*

Nec temerè, nec timidè.

Omnia despera prudenter : & omnia spera
Fortiter : ut caveas omnia , nil metuas.

66 *In D. Henrici Neville ejusdem Generi dictum.*

Ne vile velis.

Nil vanum nec vile velis , generose Neville :
Nil prope cum valeant vilia , vana nihil.

67 *Ad D. Philippum Sidnejum , de ipsius Arcadia.*

Ipsæ tuam moriens (vel conjuge teste) jubebas
Arcadium sævis ignibus esse cibum.
Si meruit mortem , quia flammam accendit amoris ,
Mergi non uri debuit iste liber.
In librum quæcunque cadat sententia , nulla
Debuit ingenium morte perire tuum.

68 *Ad Janam Audoënam , doctissimam feminam.*

Nulla tuarum audita mihi , neque visa sororum ,
Longævus genuit , quas tibi quinque pater.
Quot sint ergo scio ; quales tibi Jana sorores
Nescio ; si similes sunt tibi , Jana , scio.

69 *Ad*



69 *Ad D. Joannem Thorium, amicum suum.*

NULLI inimicus ero, sed nec bis amicus amico:
Nam cuicunque semel, semper amicus ero.

70 *Grammatica Fæneratorum.*

Serpentes, nantes, gradientes, atque volantes,
Hos, has omnes, hæc omnia vincit Amor.
Hic, hæc, hoc, Nummus, regina Pecunia, & Aurum.
Sunt tria, quæis vincens omnia cedit Amor.

71 *Ad quendam neutri parentum similem.*

Cur tam dissimilem sibi te genuere parentes,
Qui tamen unanimes te genuere simul?
Certa tibi cecidit neutrius forma parentis,
Dum, te formet uter, certat uterque parens.

72 *Ad duos Anonymos, Venetiis reduces.*

Expensas quadruplex ut compensatio vobis
Redderet, ad Venetos instituistis iter.
Unde lucro simul ac vestro rediistis; amici
Gaudebant damno vos rediisse suo.

73 *Adulterium & Fornicatio.*

Ignavus Mœcho tantum distare videtur
Scortator, quantum Comicus à Tragico?

74 *De Hercule, Ad C. D.*

Frangere quem nulla valuit virtute, labores
Quis fuit Herculeos maximus inter? Amor.
Lenam non potuit, potuit superare Lenam;
Quem Fera non valuit vincere, vicit Hera.

75 *Osculum salutationis.*

BASIA da tria Phylli mihi: tria si dare non vis
 Oscula, da saltem tot, quot habes labia.
 Das unum, fumisque; negas duo basia, Phylli;
 Vêl tibi fume tuum, vel mihi redde meum.

76 *Problema ad Physicos, de basiis.*

SI nihil ad suavem spectarent basia gustum,
 Oscula cur solo semper ab ore damus?

77 *In Labienum.*

SIC, inquit, petitur cœlum; sic itur ad astra?
 Adscendens furcam fur Labienus ait.

78 *In Alexandrum.*

UNUS Pellæo juveni non sufficit orbis;
 O juvenis! mundo mens tibi major erat.
 Uni Pellæus juvenis non sufficit orbi;
 Magnus Alexander, sed tamen orbe minor.

79 *Ad Firmicum; in Aulum.*

TU credis nullis; omnes tibi, Firmiœ, credunt:
 Omnibus, Aule, soles credere, nemo tibi.

80 *In quendam Carminificem.*

SIC potas, tanquam sine potu nemo Poëta,
 Aut tanquam potu quisque Poëta foret.
 Ebrie Carminifex, dematur syllaba primæ
 Proxima; tum titulis, quod manet, adde tuis.

81 *In anonymi cujusdam mendaces epistolas.*

AD nostras non rara manus tua epistola venit:
 Aut raro aut nunquam scribis Evangelium.

82 *Me-*

82 *Medice cura teipsum. Ad Gilbertum.*

UT teipsum cures frustra, Gilberte, moneris :
Est tibi nam semper maxima cura tui.

83 *In feneratorem quendam Anonymum.*

MUtua quæ Flavæ sestertia mille dedisti,
Fœnore cum solito restituenda petis.
Si tibi reddiderit sortem, nil nomine debet
Fœnoris : * usuram corporis ejus habes.
* *Quod non habet in ære, luit in corpore.*

84 *In Hypocritam.*

OMnia dissimulans simulansve facis : licet ingens
Dissimulare dolor sit, simulare labor.

85 *Erasmi Moria.*

STultitiæ laudem scripsisti primus, Erasme ;
Indicat ingenium Stultitia ista tuum.

86 *Anagrammatiste.*

QUonam Vocales huc illuc pellere tandem
Vultis, & infantes cogere litterulas ?
Otia ut Augusto faciente, solebat in unum
Cogere Thyrsis oves rure, capras Corydon.

87 *In quendam Doctorem indoctum.*

ARtis nuper eras imberbis inersque Magister :
Barbatus nunc es Doctor, inersque magis.

88 *Nudus Amor.*

QUæ villis Natura feras, & gramine campos
Ornat, aves pluma, vellere vestit oves :
Denique



Denique frigidulo quodcunque sub aëre nasci
 Contigit, innata veste vel arte tegit.
 Vestivit nudum cur omnia præter amorem?
 Quo nudus magis est, hoc minus alget amor.

89 *De Fisco. Ad D. Jo. Pitt, amicum suum.*

INfluit in fiscum collecta pecunia; sicut
 Undique flumineas imbibit æquor aquas.
 Effluit ex fisco dispersa pecunia, et sicut
 Æquoris in fontes versa recurrit aqua.
 Nec dum fluminibus saturæ sunt æquoris undæ,
 Nec jugis fontes evacuantur aquæ.

90 *In perfidam.*

CREdendo vanis, didici non credere, verbis:
 Spes desperantem me mea falsa facit.

91 *Peccatum argenteum.*

VIDERunt nullos Saturnia sæcula mœchos:
 Mundus erat, donec sub Jove Mundus erat.

92 *Lena.*

NULLa tibi pars est non vendita corporis; ipsam
 Distraheres animam; nemo licetur eam.
 Distraheres animam, si non emptore careres;
 Nullus eam pretio, Dæmona præter, emet.

93 *Philautia.*

TU persona secunda, Ille ultima, prima Ego: nostrum
 Nemo tamen sibi non esse videtur Ego.



94

Sapientia.

QUIS dives? sapiens; quis pauper? stultus inersque:
 Si sapio ergo, brevi tempore dives ero.
 Quis sapiens? dives; quis stultus? pauper inopsque:
 Ergo, si dives non ero, stultus ero.

95

Etymon Veneris.

DICITUR (ut * Cicero) quod ad omnia sponte veniret;
 An quod veniret omnibus alma venus?
 * de nat. Deorum, lib. 2.

96

In ebriosum quendam.

TAM potabile si foret aurum, optabile quam sit;
 Quanta tuus venter aurifodina foret?

97

Ad Pollam.

BAFIA, Polla, negas nulli; das oscula nullo
 Humida, sed siccas vertis ad ora genas.
 Imponenda novis si sunt nova nomina rebus,
 Oscula jam debent nomen habere novum.

98

Amicus & conjux.

SPIRITUS est carus nobis; hinc carus amicus:
 Cara viro conjux cur? quia cara caro.

99

Ira.

AN quia virtutem soleat calcare, vocavit
 Iram Virtutis calcar Aristoteles?

100

Flora Romana.

QUAE vestigalem totum sibi fecerat orbem,
 Vestigalis erat Roma superba tibi.

Nam



Nam pro vestura quicquid tibi, Flora, dabatur,
Vestigal potes hoc jure vocare tuum.

101 *Etymon Anglica vocis Anger (ira.)*

Angitur iracundus homo: non re modo, verum
Nomine: quam prope sunt *Anger* & *Angor* idem?

102 *De seipso.*

Ludicra dum tracto graviter, studeo quasi ludens;
Dum leviter tracto seria, ludo studens.

103 *Tituli Muliebres.*

Vir quamcunque Comes duxit, Comitissa vocatur;
Non semper, nupsit cui Comitissa, Comes.

Sic à Sole suum derivat Cynthia lumen:
Sol à se lucem, non aliunde, petit.

104 *Ad Zoilum.*

Laudatur merito laudator, amatur amator:
Ergo ut lauderis lauda; ut ameris ama.

105 *Media ætas.*

Ultima dum fragilis ducatur linea vitæ,
Certa tenet medium linea nulla locum.
Quæ Media à doctis & vulgo dicitur Ætas,
Ante obitum, quæ sit, dicere nemo potest.

106 *Ad tinctorem quendam canescentem.*

Qui barbæ color ater erat, mutatus in album est:
Natura hoc fieri, non tamen arte solet.



107

Ad Aulum.

EXegit regem nova Roma, 'superba Superbum :
 Quid mirum ? reges nemo superbus amat.
 Dic cur tam pauci regum inveniantur amici ?
 Sunt quoniam pauci regibus, Aule, pares.

Bed.

108

*Ad D. Mauritium Griffin ,
 popularem suum.*

Angli *Bed* Lectum vocitant, Cambrique Sepulchrum ;
 Lectus enim tumuli, mortis imago fopor.

109

Bibliotheca Rideri.

Quid sibi ridendi vult Bibliotheca Rideri ?
 Unus enim non est Bibliotheca liber.
 Verborum cum theca sit hæc, non theca librorum ;
 Lexicon hoc dici Distiotheca potest.

110 *Nummus. Ad J. Tovey, amicum suum.*

Anne nummum vocitant Critici ; numisma Latini ;
 Quod nomen Argivi, quodque nomisma vocant ?
 An quia, Numme, potens, numerata pecunia vulgo
 Diceris, à numero tu quoque nomen habes ?
 Anne, Deam quia te, Regina pecunia, mundus
 Æstimat, & nummo Numen inesse putat ?

111

In J. S. avarum.

Ferrea cista auri custos tibi ; ferrea porta ;
 Ferrea tota domus : ferreus & dominus.

(

112 *De*

112 *De Flora Romana. Ad Grammaticos.*

PLacabant Floram pro frugum floribus olim
 Romani, & Floram constituere Deam.
 Corporis atque bonæ nimium quæ prodiga famæ,
 Dicitur ad frugem non rediisse bonam;
 Sed se prostituens in primæ flore juventæ,
 Cum fructu florem perdidit ipsa suum.

113 *In J. Protum.*

Sicut ab arboribus ventoso sidere quassis
 Autumni, frondes decutiuntur humi:
 Omnia gesticulans moto sic vertice Calvus
 Decussit crines concutiendo caput.

114 *In Theodorum.*

JAm septendenos ageret cum rex David annos,
 Fovit ei gelidum pulchra puella latus
 Cui ne dissimilis tanto videre Prophetæ,
 Duxisti juvenem jam, Theodore, senex.

115 *Anglica plaga. 1603.*

Consumptis tot peste viris, tot peste puellis;
 Vix habet in nobis jam nova plaga locum.

116 *Ad quandam.*

Quam natura tibi, si tam fortuna faveret,
 Ditior Anglarum fœmina nulla foret.
 Tempore Trojani belli si nata fuisses,
 Digna fuit causa Troja perire tua.



117 *In perjurum, proprio chirographo
convictum.*

Perfidus es, frustra verum qui voce negasti;
Cum prodat te non inficienda manus.
Major ut in dictis constantia quam sit in actis,
Os idcirco tibi, non dedit ora Deus.
Cui binas Deus ergo manus, linguam dedit unam:
Unde manus simplex est tibi, lingua duplex?

118 *In Cottulam Grammaticastrum.*

Exposuit Græcam Labyrinthi Cottula vocem,
Reddat inaccessum quod Labor-intus iter.

Anagramma Romæ.

119 *Ad Carthaginienses.*

Annibal in paucas fortunam distulit horas,
Non bene Romanas præmeditatus opes.
Vincere cum sciret, fortuna nesciit uti
Pœnus homo, quamvis Afer, eoque vaser.
Heu, quantum Annibali nocuit differre parato?
Servata est minima maxima Roma mora.

120 *In magnum Clericum.*

Plurima degustat stomachus, nil concoquit, æger;
Sic tu scis, fateor, multa; nihilque sapis.

121 *In quendam Davis, jam nuper
defunctum.*

Davisiliis jactas te Londinensibus ortum,
Cambrensem nactus ne videre patrem:
Quæ tua nobilitas (saperes modo) summa fuisset,
Respis, obscuros & tibi quæris avos.

Quam



Quam male cum patria tibi convenit, & bene, terra?
Namque pudet patriæ te, patriamque tui.

122 *In Aulum.*

Quicquid es, insipiens sapientibus, Aule, videris,
Et stultis sapiens esse; quid ipse tibi?

123 *In Linum, Doctorem.*

Cur tam pro forma cupide facis omnia: famam
Negligis ingenii? Forma dat esse rei.
Audeat hoc si quis Physicum, Line, dogma negare,
Affero: Doctori Forma dat esse tibi.

124 *In Thaida.*

O utinam vel bella minus, bona vel magis esses:
Turpius est pulchra nam meretrice nihil.

125 *Polygraphus anonymus.*

Cum premeret te dira fames, urgeret egestas,
Finderet & fauces infatiata sitis;
Distraxti miseros, distractior ipse, libellos;
Quid faceres? suavit sic malefuada fame.
Paupertate tibi sic imperitante, coactus
Es libros tu nunc edere, tunc edere.

126 *In Calvum.*

Ecce tibi nulli superant in vertice crines;
Nullus in infida stat tibi fronte pilus.
Omnibus amissis à tergo & fronte capillis:
Quid tibi jam præstat perdere, Calve? Caput.

127 *Ad Claudium & Linum.*

Nisi nisi velle deest, bonus ut sis, improbe Claudii ;
Improbis ut, Line, sis, nil nisi posse deest.

128 *Ad G. R.*

S ive Georgius in nostro vis esse libello,	Nom.
Quam lente in verbum progrediare vides.	
Sive tui Generis celebrarem carmine laudes,	Ger.
Difficilis fieret mentio crebra tui.	
Seu meritas vellem verbum tibi reddere grates,	Dat.
Nulla tibi posset gratia digna dari.	
Est bene, quod verbum non accuseris in ullo ;	Acc.
Hac una nomen conditione placet.	
Si te appellari mallet, generose Georgi ;	Voc.
Semper in extremum conjiciere locum.	
Hei mihi, sermones tecum producere longos	Abi.
Non possunt ullo carmina nostra modo.	

129 *Militat omnis amans.*

Non male militibus meretrices contulit Aulus ;
Mars locat armatum corpus, inerme Venus.

130 *Sacramentum militare.*

Sacramenta vocant sacra juramenta Latini,
Quæ præstat lecto bellica turba duci.
Si Sacramentum nihil est nisi juramentum,
Sacramenta quidem plura duobus erunt.

131 *In Alanum & avarum & mancum.*

Munera si gratis manco donaris Alano,
Fiet centimanus, sed modo mancus erat :



Si tamen expectes aliud pro munere munus ;
Quamvis centimanus sit , tibi mancus erit.

132 *Regum status.*

DUm non vult alter , timet alter dicere verum
Regibus. O miserum Regis in orbe statum !

133 *Vis , Jus. Ad D. Guil. Jones J. C.
Cognatum suum.*

VI Jus adversum , Vis adversaria Juri ,
Inversum adversum nomen utrumque sibi.

134 *In Marcum.*

UXores , viduas , ancillas , scorta , puellas
Diligis ; uxorem negligis ipse tuam.
Inter tam varix Veneris certamina , quare
Quod licet , hoc solum non tibi , Marce , libet ?

135 *Desperate debt.*

DEbitor uxoris quis non ? solvendo quis autem ?
Uxori Solidum * solvere nemo potest.

**Solvendo esse non intelligitur nisi quis solidum
potest solvere. Jabol. de verb. sign. I. Solvendo.*

136 *In Cilianum.*

Vir sapiens * miraculum : Hodie miracula cessant ;
Hoc igitur nostro tempore nemo sapit.
At , Culiane , sapis : quare miracula nondum
Cessant ; aut nondum tu , Culiane , sapis.

** Cic. de Divin. lib. 2.*



137 *In Marcum, hominem venustum.*

MArce, tui partem Venus improba aduffit; ut effes
Ex aliqua faltem parte venustus homo.

138 *In Adr. V.*

Ridiculos verſus, ridenda Epigrammata ſcribis,
Ridendum in quibus eſt, ridiculumque nihil;
Nullus in his jocus eſt, at riſit lector; id ipſum
Riſit, in his nullum verſibus eſſe jocum.

139 *Ad quendam Grammaticaſtrum.*

Ego, Tu, Ille,
Nullus homo eſt qui ſe non præferat omnibus unum;
Hinc perſonarum prima vocatur Ego.
Præſentem laudas, abſentem lædis amicum;
ſcilicet hinc mihi Tu proximus, Ille tibi.

140 *Petite & dabitur vobis.*

Quæ fuit à Domino promiſſa petentibus olim
Gratia, nunc ſolis dantibus illa datur.

Date, & dabitur vobis.
Dant homines hodie gratis nihil, omnia gratia;
Ex nihilo nil fit: da, dabiturque tibi.

141 *Conjuges, Liberi, Parentes.*

Sunt unum vir & uxor, erant duò corpora: at unum
Corpus erant; duo ſunt, filius atque pater.

142 *In Marcum Cauſidicum.*

Ipſe tibi cauſas dicis, non, Marce, clienti;
Qui tibi Londinum, non ſibi, portat opes.



Certa tibi lex est; lis est incerta clienti:

Tu lucri, damni certus & ille sui.

143 *Ad patrem.*

Vir quanto præstantior est, quam femina, tanto
Parte mei natus sum meliore tuus.

144 *In Atilum.*

Atilus antiquos referens ab origine mores,
Conjugis inclusæ vir dominusque suæ est.
Scilicet hoc præstat mulieri, quod Deus Evæ
Dixerat: Ærumnas multiplicabo tuas.

145 *Qualem uxorem velit. Ad amicum
suum G. Guil. Batton. 1606*

Hanc volo, quæ facilis sit amari, eadem sed amare
Difficilis, bello corpore, mente bona.
Rivales in amore volo; mereatur amorem
Multorum quod amo; nil ego solus amem.

146 *Ad quendam, quod nullos sibi similes
liberos gigneret, conquerentem.*

Visne tibi similem generari ex conjugis prolem?
Uxorem primo quære tibi similem.

147 *Ad Maritos. De amore conjugali.*

Cum pater uxorem noster sibi sumeret Evam,
Quem plus diligeret conjugis, nemo fuit.
Ergo maritalis summus, velut ordine primus;
Patrius est, nata prole, secundus amor.

148 *Epitaphium Draki.*

Religio quamvis Romana resurgeret olim,
 Effoderet tumulum non puto, Drake, tuum.
 Non est quod metuas, ne te combusserit ulla,
 Posteritas: in aqua tutus ab igne jaces.

149 *Epitaphium nobilis pueri avo & patre superstite defuncti.*

Non servat methodum, Logicæ mors nescia nostræ;
 Occidit ante patrem natus, avumque nepos.

150 *Epitaphium Mauri.*

Corpus mente sua caret, & mens corpore Mauri;
 Maurus utroque caret, nil nisi nomen habet.

151 *Epitaphium Pyrami & Thisbes.*

Abstulit hunc vobis mors, hostis amica, dolorem,
 Qui mortem vobis attulit ante dolor.

152 *Morus moriens.*

Abscindi passus caput est à corpore Morus;
 Abscindi crines noluit à capite.

153 *Tres lingue crucifixæ.*

Lingua Pelasga artis custos, Sophiæque vetustæ;
 Romana imperii, tertia lingua Dei.

154 *Don Antonio Rex Portugallie*

Inter te regnumque tuum divortia nuper,
 At sine consensu, facta fuere, tuo.



Dicere de regno potes ipse tuo, quod & olim
Christus * de regno dixerat ipse suo

* *Regnum meum non est de hoc mundo.*

155 *Alexander, Aristoteles.*

Maximus hic Regum, doctissimus ille Sophorum;
Magnus Alexander, major Aristoteles:
Doctus Alexandrum meliorem reddidit ille;
Non hic majorem magnus Aristotelem.

156 *Plato.*

Quæ primum in labris pueri sedere Platonis,
In libris resident usque Platonis, apes.

157 *Georgica Virgilii.*

Carmina de terris scribis, Maro, culta colendis:
Tu lectoris agros ingeniumque colis.

158 *Persius Poëta.*

Scripta tenebrosi lego, non intelligo, Persi;
Lectores nimium negligit ille suos.

159 *Tacitus.*

Veracem fecit probitas, natura sagacem;
Obscurum brevitatis; et gravitasque brevem.

160 *Ad Martialem.*

Dicere de rebus, personis parcere nosti:
Sunt sine felle tui, non sine melle sales.

161 *Ad Petrarcham.*

SEmp̄er dum tua Laura legetur, lis erit, utrum
Tu Laura, lauro dignior anne fores.

162 *Plinius à Ph. Hollando medico
Anglicè versus.*

PLinius est longus, quia multa; brevis, quia multum
Scribit; at Hollandus * longior, & † brevior.

* Quia plenior, † Quia planior.

163 *De Cicerone, ad Catullum.*

TU quod dixisti, verum; verumque, Catulle,
Quod prædixisti de Cicerone, fuit.

164 *In Historicos hujus seculi. Ad D. Th.
Sakeville, Comit̄is Dorcestria filium.*

MEndacem historico non esse, satis fuit olim;
Mendacem contra nunc satis esse, sat est.

Hic negat, alter ait: credet miserabilis utri

Proxima posteritas? hic ait, ille negat.

Scinditur historicum studia, in contraria vulgus:

Vixque minor constat cui sit habenda fides.

165 *Reges. Populus.*

LABitur indocto populus sub Principe: sicut
Præ capitis titubant ebrietate pedes.

166 *Senatus.*

REx regnat solus, cur non regit omnia solus?
Qui regit & regitur, rectius ille regit.

Histo-



Historia.

167 *Ad D. Th. Sackeville.*

Historias versando peritus, id absque periculo,
 Quod docti damnis experiuntur, habes.
 Nec tam multa gravis iterum experientia longo
 Tempore, quam parvo te docet Historia.

De Diæta.

168 *Ad D. Joan. Harington, equitem.*

Si tarde cupis esse senex, utaris oportet
 Vel modico medicè, vel Medico modicè.
 Sumpta, cibus tanquam, lædit medicina salutem:
 At sumptus prodest, ut medicina, cibus.

169 *Pares Franciæ.*

Non omnino pares estis: tamen est quoque quædam
 Imparium paritas, imparitas parium.

170 *P. Magnus. C. Major. F. Maximus.*

Maximus hic Magno minor est, Majoreque major:
 Quis fuit istorum maximus ergo trium?

171 *Ad doctissimum D. Thomam Sackeville, Comitæ Dorcestriæ filium.*

Judicium, ingeniumque tuum describere versu,
 Ingeniumque mihi, judiciumque deest.
 Judicio, ingenio polles, potes omnia, si non
 Fallor ab ingenio judicioque meo.
 Judicium ingeniumque meum quodcunque sit, haud sum
 Falsus in ingenio judicioque tuo.



172 *De seipso. Ad D. Sam. Danielelem,
Poetam.*

SI bona non facio, quid mirum, Epigrammata : nunquam
Verificans unguis rodo, caputve scabo.

173 *Quinque Sensus.*

QUinque voluntatisque voluptatisque ministri
Officium faciunt, an magis officiunt?

174 *Visus.*

QUo similis menti magis est, magis advocat illam
Visus, & ad nutus ducit agitque suos.

175 *Auditus.*

QUam cito vocalis vanescit in aure voluptas?
Quæ velut aura venit, quæ velut aura fugit.

176 *Odoratus.*

OS oculosque inter, naris gnarissima, quiddam
Carnale, & quiddam spirituale sapis.

177 *Gustus.*

QUo vis ut gustus major sit in ore voluptas,
Hoc tibi constabit pluris, emenda fame.

178 *Tactus.*

EST qui delectet nos tantum, est quiue titillet
Tactus: & hic juvenes afficit, ille senes.

179 *Objecta sensuum.*

Visa, audita, olfacta mihi, gustataque, tactaque
Afficiunt sensus, inficiuntque meos.

180 *Tactus & Gustus.*

Sunt qui nare nihil, sunt qui nihil aure juventur;
Sunt etiam quorum lumina luce carent.
Gustu autem tactuque caret cur nemo? tuetur
Ille Individuum sensus, at hic Speciem.

181 *Epigramma. Satyra.*

Nil aliud Satyræ quam sunt Epigrammata longa:
Est præter Satyram nil Epigramma breve;
Nil Satyræ, si non sapiant Epigrammata, pungunt:
Ni Satyram sapiat, nil Epigramma juvat.

182 *Mutus.*

Abra movet, veris non verberat æra verbis:
Quid velit, interpret dicat Apollonius.

183 *Cecus & Surdus.*

Cur oculis pollet magis hic, magis auribus ille?
Hic oculis audit; auribus ille videt.

184 *Dentes & Lingua.*

Dens quasi dictus edens, lingua à lingendo vocata:
Traxit ab officio nomen uterque suo.

185 *Phœnix & Vipera.*

Tu pereundo paris viventem mortua Phœnix;
Vipera vi pariens, tu pariendo peris.

E

186 Bom-



186

Bombyx.

ARte mea pereo, tumultum mihi fabricor ipse,
Fila mei fati duco, necemque neo.

187

Dextra.

SIve quid accipio, seu do, cur porrigo dextram?
Ne, mea quid faciat dextra, sinistra sciat.

188

Læva.

ALævare datum nomen tibi, Læva; laboris
Impatiens longi, desidioſa manus.

189

Dies Solis.

QUa prima emicuit lux, nondum Sole creato;
Unde fit, ut solis dicta sit illa dies?

190

Terra di Lavoro.

Plena voluptatis, tellus Campania quondam,
Cur hodie nomen, Terra Laboris, habes?

191

Vestes.

ANtiquata viget novitas, renovata vetustas
Nascitur; & veteres nunc novitate placent.

192

Vinum.

Anguſto tristem pellens ex corde dolorem;
Tu cor lætifica lætificando meum.

193

Ovis.

Seu caro, seu corium, foetus, fimus, alea, chorda,
Lanave, lacrye deest: omnia præstat ovis.

194 *Agro-*

194 *Agrorum stercoratio.*

Ville excrementum stercus, sed inutile non es :
Tu nutrimento das alimenta meo.

195 *Harmonia.*

Inter dissimiles voces concordia major
Quam similes : Hominem vir mulierque facit.

196 *Psittacus.*

Si rerum sit fas invertere nomina, Parret
Garrulus inverso nomine Prater erit.

197 *Atramentum & Charta.*

Certius ut feriat dubios color ater ocellos,
Poscit ab opposito lumen, opemque suo.

198 *Comædia.*

Indicat in scena nostros Comædia mores :
Non habet in nobis fabula ficta locum.

199 *Palliatus & Togatus.*

Palliatus.


Longius à terra, quam nos, sunt pallia nostra :

Togatus.

Verro togâ terram, mens super astra volat.

200 *Satyra.*

Idem qui legum, Satyrarum finis, idemque
Principium ; mores hâs genuere mali.



201

Eunuchus.

Testibus exfectis periit mihi mascula virtus.
Me tamen esse virum mentula * testis erit.

* *Falsum testimonium.*

202

Clepsydra.

Clepsydra mentitur verissima : nempe foramen
Tempore fit semper majus ; arena minor.

203

Mercator.

Dives utrum , pauperne fit , haud mihi dicere prom-
ptum est ,
Qui spes infido credit opesque mari.

204

Libido.

Deformem nigra formosam nocte videri ,
Non nox atra facit : cæca libido facit.

205

Domina.

Quo magis uxori dominatur nemo vir , unus
Uxorem Dominam cur vocat ille suam ?

206

Miles.

Infigat Mars multa licet tibi vulnera , non tam
Mars nocet armatus , quam tibi nuda Venus.

207

Exercitus.

Gens ingens , fidei malefida , immanis , amansque
Cædis , & humano sanguine tincta manus.

208 *Aman-*

208 *Amantium lacrymæ.*

HUmorem fervens ex ligno expellit ut ignis,
Ex oculo lacrymas elicit intus amor.

209 *Stella.*

Impare qui numero gaudet, mihi credere par est,
Impare quod numero condidit astra Deus.

210 *Venetia.*

UT mare nil nisi aquæ, cælum nil est nisi stellæ:
Sic sunt Venetiæ nil nisi Divitiæ.

211 *Lyra.*

IN tam diversis cum sit concordia chordis;
Tam discors hominum non pudet esse genus?

212 *Auceps.*

EXcipe crudelem, qui ludere nescius, ignem,
Cuncta elementa tuis dant alimenta jocis.

213 *Echo.*

VOcem nulla potest ars sculperè, pingere nulla:
Sola repercussos exprimit Echo sonos.

214 *Speculum.*

Pingere non Phydias, nec Apelles pingere motam
Novit: tu Phydias plus & Apelle facis.

215 *Echo & Speculum.*

Nil in se, præter vocem, vitale habet Echo;
Ut vivat, speculum non nisi voce caret.

E 3

216 *Musi-*



- 216 *Musica. Ad amicum suum*
D G. James.

Optima Musarum est; reliquis idcirco negatum
Artibus, à Musis Musica nomen habet.

- 217 *Ad D. Henricum Fanshew, Equi-*
tem, Musarum Mecænatem.

Tres tibi donavi * libros: Tu tres mihi libras:
Nullus adhuc nostrum carius emit opus.

* *Exemplar prima editionis.*


Albion.

- 218 *Ad Regem.*

Distracta imperiis olim fuit Anglia septem:
Divisa in partes Infula tota novem.
Infelix quondam divisa Britannia, sub te
Principe jam felix, Albion * Olbion est.

* *Beatum.*





JOANNIS AUDOENI
EPIGRAMMATUM
LIBER TERTIUS.

- 1 *Ad Illustrissimam & laudatissimam
Dom. Mariam Neville, Patronam suam.*

TE quoties laudo, nil mentior, at nec adulator;
Laudis nulla capit plusve, minusve cupit.
Non quæris, sis laude licet dignissima, laudem:
Est inter laudes hæc prope summa tuas.

- 2 *Ad eandem.*


QUæ parientis onus, cum nondum nata fuisses,
Matris erat, nunc es nata parentis honos.

- 3 *Ad Lectorem de suo libro.*

NE tibi non placeant, vereor, mea carmina, lector
Candide; ne placeant, lector inepte, tibi.

- 4 *Elizabethæ nuper Anglorum Reginae
Virginis Partus.*

SCotia nobiscum gentem concrevit in unam;
Iste tuæ partus virginitatis erat.
Est unire magis, quam multiplicare, beatum:
Tuque magis felix non pariendo parens.



5 *Ad Hollandum. 1602.*

TU non invita gessisti bella Minerva,
Anglorum Pallas dum tibi ferret opem.
Fortunæ rota versa tuz est; mors (alter Ulysses)
Pallada surripuit, Palladiumque tuum.

6 *Ad Jacobum Regem Britannia, &c.*

AUrea præfati venit jam Principis ætas;
Bruti indivisum qui diadema gerat,
Et penitus toto divisus orbe Britannos
Uniat, & palmam pacis in orbe ferat.
Ut qui pacifice sentit, jam dicere possit
Omne bonum nobis ex * Aquilone venit.
* *Owenus enim Henrici VII. avus ex Boreali Wallia;
Jacobus I. ex Boreali Britannia ortus.*

7 *Ad Henricum Principem.*

SPes Britonum, soboles tanto speranda parenti,
Dimidium matris, dimidiumque patris:
Nobilium exemplar, sed vix imitabile, morum,
Quos cuncti, quamvis pauci imitentur, amant:
Insevitne tibi pater hos ex traduce mores?
An dedit in mammis mater? utrumque puto.

8 *Βασιλικὸν δῶρον.*

Non opus autorem hunc; nihil hunc laudare libellum;
Hoc opus autorem laudat, hic autor opus.

9 *Ad Dominam Mariam Neville Comitissæ
Dorcestriae filiam, Patronam suam.*

Dicit te Speculum formosam, Fama pudicam;
Mentitur Speculum nil tibi, Fama nihil;
Fama



Fama malum, quo non aliud velocius ullum,
Aufa tamen de te nil male Fama loqui.

10 *De Cecilia ejusdem filiola. Ad eandem.*

Nemo potest animi mores effingere pictor:
Attamen hæc mores monstrat imago tuos.

11 *Ad Lectorem candidum.*

Optima, quæ bona sunt; mediocria, quæ mala, dices
Carmina judicio, lector amice, tuo.

12 *Ad Lectorem nigrum.*

Pessima quæ mala sunt; mala, quæ mediocria, dices
Carmina censura, lector inique, tua.

12 *Herculis bivium. Ad nobilem opt. spei
adolefcentem, D. Thomam Puckering.*

Sunt qui in quadriviis triviisque insigniter errant:
Herculis in bivio maximus error inest.

13 *De virtute. Ad Mauritium Merick,
cognatum suum.*

Contemnit laudem virtus, licet usque sequatur
Gloria virtutem, corpus ut umbra suum.
Est etenim virtus aliquid, nil gloria: sicut
Est aliquid corpus, corporis umbra nihil.

14 *Horologium vite. Ad D. Joannem
West, amicum suum.*

Latius ad Occasum, nunquam rediturus ad Ortum,
Vivo hodie, moriar cras, hæc natus eram.

E 5

15 De



15

De Deo.

TAntus es, Euclides quantum comprehendere nescit;
Et talis, qualem nescit Aristoteles.

16

De Atheo.

Insipiens in corde suo, non est Deus, inquit;
Dixit, at hoc nullus credidit insipiens.
Insipiens negat esse Deum si nemo, quis ergo
Atheus est? Nullum qui cupit esse Deum.

17

Caritas.

UT nisi quæ sit amans, conjux est nulla fidelis;
Sic ibi nulla fides est, ubi nullus amor.

18

Dives & Lazarus.

Est in Evangelio, verum sine nomine, Dives;
Pauper, ubi æternum, Lazare, nomen habes.

19

Crescite & Multiplicamini.

PRimus homo fuerat primum res unica; postquam
Facta fuit mulier prima, fit ipse duo.
Divisum postquam Deus Evæ junxit Adamum,
Ante velut fuerat, non duo, at unus erat.
Multiplicavit eum primo Deus ergo; deinde
Uniiit, ut posset multiplicare magis.

20

Unio.

UNio divina est, Divisio Dæmone nata:
Unus enim Deus est, Dæmones innumeri.

21 *Tres*

21 *Tres tentatores.*

TRes, Caro, & immundus Mundus, Satanasque, Sophista:
Hic Logicus, reliqui Rhetores ambo boni.

22 *Spiritus & Caro.*

Spiritus huc, illuc miserum Caro me trahit: in me
Divisum Imperium cum Jove Cæsar habet.
Pax vobis; siquidem vos inter amabilis esset
Pax semel, in toto pax simul orbe foret.

23 *Homo homini Lupus. Homo homini
Deus.*

Humano generi Lupus & Deus est homo: quare?
Nam Deus est homini Christus, Adamque lupus.

24 *Verbum Domini.*


Pauca vident homines, Deus omnia prævidet: inde
Vanus homo loquitur sæpe, Deusque semel.

25 *Vita lata & angusta.*

Jussit ad angustam magno conamine vitam
Ire per angustam littera sacra viam.
In latum te angusta locum nisi semita ducat,
Ducet in angustum te via lata locum.

26 *S. Johannes Baptista.*

Anteivit Christum Baptista, ut nuncia Phœbi
Solem præcurrit lux, aperitque diem.



27 *De Autumno, ad anicum suum,
D. Richardum Conck.*

Aufert arboribus frondes Autumnus, & idem
Fert secum fructus: nos faciamus idem.

28 *Miseria vita.*

Vivere quisque diu, quamvis & egenus & æger,
Optat; id est, miserum se cupit esse diu.
Invitus moritur miser & miserabilis Irus;
Hoc est, invitus desinit esse miser.

29 *De Natura & Gratia. Ad Theodo-
rum Prife Theologum, cognatum suum.*

Natura obscuram lucem, ceu luna, ministrat:
Sol quasi, splendidus Gratia lumen habet.

30 *Catechismus.*

Sunt credenda tibi bis sex, orandaque septem,
Si salvus fieri vis, facienda decem.


31 *Dives.*

IN cœlum dives cur raro ascendit? Avarum
Pœnitet expensæ, præterea nihili.

32 * *O spes fallaces! Ad fratrem suum,
Thomam Ooven.*

* Cic. pro Milone.

O Res fallaces potius! spes verò fideles;
Quæ vel ad extremum nos comitantur iter.

33 *Redemptor.*

UNUS Homo nobis moriendo restituit rem,
 Unus ut humanum perdidit antè genus.
 Non ponebat enim rumores ante salutem,
 Opprobrium causa factus, Adame, tua.

34 *Spiritus Sanctus.*

UT semper veniunt ad candida testà columbæ;
 Ingreditur Sanctus candida corda Deus.

35 *Fortitudo.*

SCIT Sapiens, vult cuique suum jus reddere iustus:
 Qui facere hoc audet, Fortis habendus erit.

36 *De Rege.*

LEX sine Rege, velut lumen sine Sole fuisset:
 Rex sine lege, velut Sol sine luce foret.
 Grex Regem primo legit, Rex cum grege legem
 Condidit: hinc legem Rex regit, atque gregem.

37 *Cambro - Britannus.*

TECUM participant in nomine Scotus & Anglus:
 Jam tu non solus, Walle, Britannus eris.

38 *Anglo-Scoti.*


LEGIBUS inter se varii qua lege coibunt?
 Jungat eos regni, lex ea summa, salus.

39 *Ad Regem.*

Henricus Rosas. Regna Jacobus.

CANDIDUS Anglorum celebres rubeusque colores
 Secum Cadmæas conseruere manus;

Ovige.



Ovigenæque velut gemini, duo sidera, fratres
 Alternas obeunt lucis in orbe vices;
 Utque dies nocti succedit, noxque diei,
 Utraque sic vidrix, victaque sæpe Rosa est;
 Donec quæ mater * Cambrorum Mona vocatur
 Insula quam Taciti non tacuere libri.
 (Felix prole parens) Oweni † Britonis ortu
 Clara, *Θεὸ δαΐμον* nomine reque tulit.
 Ejus enim æterna Princeps de stirpe Rosarum,
 Altera cui conjux, altera mater erat.
 Post varios casus & mille pericula regni
 Conaubio stabili junxit utramque Rosam:
 Quarum ne fierent aliquo divortia casu,
 Regna maritali tu, velut ille Rosas.

* *Proverbiū Britann. Mon man Gymri.*

† *Hic non indignum notatu est Britannico sanguini ter-
 geminum Britannia imperium occulto quodam fato
 restitutum: 1. Regn. Scotia per Stuartum. 2. Re-
 gnum Angliæ per Tyderum. 3. Imperium totius In-
 sulæ per Jacobum I. ex utroque oriundum.*

40 *Apocalypsis Joannis Nap.*

NONaginta duos durabit mundus in annos,
 Mundus ad arbitrium si stat, obitque tuum.
 Cur mundi finem propiorem non facis? ut ne
 Ante obitum mendax arguerere: Sapis.

41 *Deus homo.*

Nec sentire Deus, nec mortem homo vincere solus
 Possit: utrumque facit Christus; utrumque fuit.

42 *Mors.*

Mors vitanda malo, sancto invitanda, malorum
 Ultimus est finis, vel fine fine malum.

43 *Deus.*



43

Deus.

Immensus Deus est, qui scilicet omnia mensus;
Innumerabilis est, unus enim Deus est.

44

Miraculum.

Miretur populus miracula: nil mihi mirum est.
Præter eum, solus qui facit illa, Deum.

45

Adami lapsus.

Theologis animam subjecit lapsus Adami,
Et corpus Medicis, & bona Juridicis.

46

Ad Adamum.

EVa, parens mortis, malo te falsa fefellit;
Cumque tuum strueret VÆ, tibi dixit AVE.

47

Ad Prædicatores.

Nuncius auroræ, prius ut se suscitet ipsum
Quam reliquos, alas explicat ante suas:
Gallorum ritu, verbi sic præco feracis,
Ut moveas alios, tu moveare prius.

48


Tentator.

Sic, velut in muros mures, in pectora Dæmon
Invenit occultas, aut facit ipse, vias.

*Mortificatio.*49 *Ad amicum quendam senescentem.*

Mortuus ut vivas, vivus moriaris oportet:
Assuesce ergo prius quam moriari mori.

50 *Hodie*



50

Hodie.

HOc quod adest Hodie, quod nomen habebat Heri? Cras.
 Cras Hodie quodnam nomen habebit? Heri.
 Cras lentum quod adest nunquam, nec abest procul unquam,
 Quonam appelletur nomine cras? Hodie.

51

** Tibi soli peccavi.*** Psal. 51.*

Subditus in legem peccat, Regemque Deumque:
 Rex peccat soli (rex quia nempe) Deo.

52

Oratio.

Christus uti clausis penetraverat ostia portis:
 Sic cœli penetrant invia claustra preces.

53 *Mariæ Magdalene fletus: Ad Cognatum suum Elizeum Win.*

VAna videndo vagus quidquid peccavit ocellus
 Abluit erratis illacrymando fuis.

Fallor, an hinc oculo plorandi infusa facultas,

** Peccandi quoniam fons & origo fuit?*

** Gen. cap. 3. vers. 8.*

De Spe & metu.

54 *Ad Amicum suum, Robertum Bowyer.*

Divitiæ atque metus comites sunt, spes & egestas:
 Res optanda tamen spes, miseranda metus.

Pauperis est sperare, timereque divitis; isto

Quam sperare equidem malo timere modo.

55 *Ma-*



55 *Mathusalem mortuus est.*

NON vixisse diu vita est ; at vivere , vita est :
Quid juvat ergo diu vivere , deinde mori ?

56 *De Jure & Justitia. Ad amicum suum,
Ric. Trevor L. L. Doct.*

TRita magis Juris quam Justitiæ via ; quanquam
Juris iter longum , Justitiæque breve est.

De Hominum Intemperantia.

57 *Ad Joannem Gifford , Medicina
Doct. doctiss.*

QUI fragilem longe cupimus producere vitam ,
Luxuria vitæ cur breviamus iter ?
Nolumus , & volumus produci tempora vitæ ;
Nolumus à nobis , malumus à Medicis.

58 *Ad Ponticum.*

PAuper es ? haud facile est fieri tibi , Pontice , ditem :
Dives es ? ex facili ditior esse potes

59 *Pharisei.*

Dicunt , non faciunt , culpa est ea temporis hujus :
Fiat quod dictum est ; Dicitur inde Fides.

60 *Libertas.*

SI felix est qui , quæ vult , habet omnia , quare
Velle solent homines , quæ voluisse dolent ?

Virtus libertas est optima maxima ; solus
Ille potest ut vult vivere , qui bene vult.

F

61 *Chri-*



61

Christus Cujas.

Conceptus Nazareth, ortus tibi conscia Bethlem;
Ut quod Naturæ, tot tibi sint Patriæ.

62

Christus Crucifixus.

Erranti, pereunti, ægro, via, vita, salusque,
Mors mortis pendens in cruce, cruxque crucis.

63

Crux Christi.

Crux Christum tulit ista, crucem Christus tulit istam:
Pro nobis illum crux tulit, ille crucem.

64

*De Religione. Ad amicum suum,
Joan. Bovoman, Theolog.*

Arbor amœna pio plantanda in pectore, cujus
In radice labor, fructibus insit honor.
Primus in orbe Deqs fecit timor, haud male dictum,
Est etenim pietas prima, timere Deum.
Fel in radice est pietas, in vertice mel est:
Religionis enim fons timor, amnis amor.

65

In Prodigum & Parcum.

Hic nisi post mortem veteri nil donat amico;
Ille nihil, quod post funera donet, habet.

66

Conjuges.

Uxorem vir amato, marito pareat uxor:
Conjugis illa sui Cor, Caput ille suæ.

67

Studium.

Amentes fiunt studiosi scire studentes:
Nemo fit insanus, qui studet esse bonus.

68 *Memento mori.*

Mors incertarum rerum certissima; cunctis
 Incertum quando, certum aliquando mori.
 Nullus ab occasu procul est homo, nullus ab ortu:
 Nec tamen illius, nec memor hujus homo.

69 *B. Virgo.*

Spōsa Dei, Patrīque parens, & filia Fili:
 Virgo, nec absque virō; mater, at absque viro.

70 *Quod rarum non carum.*
Paradoxon.

Commune est vitium, tamen est nil carius illo:
 Res vilis Virtus, rara sit usque licet.

71 *Bellua.*

Præteriti spes nulla manet: spes sola futuri;
 Res abeunt sine spe; spes redeunt sine re.
 Dum nos præteriti dolor angit, cura futuri:
 Bellua quod præsens est capit; illa sapit.

72 *Ratio.*

Rerum regina est ratio, naturaque mater:
 Nam natura parit res, ratioque regit.

73 *Natura.*

Natura ingenuit rationem provida nobis;
 Naturam ratio nos jubet ergo sequi.

74 *Παρηγορία*

Libertas, infanda loqui, tibi sola videtur:
 Libera lingua sat est, cui tacuisse licet.

75 *Ad Marcum Problema.*

SIs bonus, anne malus, quid refert, Marce? premuntur
Jure mali, quasi vi, vi quasi jure, boni.

76 *In Antiquarios & Novatores.*

STulta hæc invidia est, cui cuncta recentia sordent.
Invida stultitia est, cui nova sola placent.

77 *Mors Christiana.*

DUcet ad æternam te mors brevis, ut via, vitam:
Ut mors interitus non sit, at introitus.

78 *Ad Christum.*

ANchora spei nostræ, navis fidei, mare amoris,
Terræ sal, cœli sol, animæque salus:
Morte tua letum deletum, mortua mors est:
Crederet at mortem quis potuisse mori?

79 *Philautia.*


CRimina qui cernunt aliorum, nec sua cernunt;
Hi sapiunt aliis, desipiuntque sibi.

80 *Vitæ Sanctorum.*

SANctorum vitas legere, & non vivere, frustra est:
Sanctorum vitas degite, non legite.

81 *Patria.*

EST domi ubique Bonus, Sapiens non exulat usquam;
Omne solum Forti patria, & omne salum.
Exilium est ubicunque male est, patria est, ubi contra;
Patria ubique bonis, exiliumque malis.

82 *In Atheum.*

PRæteriti tibi nulla fides, spes nulla futuri;
Præsentis totum te tenet unus Amor.

83 *In Hæreticos.*

AUrum Virgilius de stercore colligit EnnI:
Ex auro stercus colligit Hæreticus.

Laudationis multiplex effectus.

84 *Ad Encomiasticos*

Fit mellor laudando bonus, pejorque malignus,
Cautior astutus, simplicior stolidus.

85 *Festina lente.*

Nemo repente bonus: lente properare memento,
Virtutis quamvis ingrediare viam.
Utile consilium fit inutile festinanti:
Collige primo animum, corrige deinde, tuum.

86 *Invidus & stultus.*


Deficit hunc ratio recta, illum mens bona; verum
Cernere dum non vult ille, nec iste potest.

87 *Λόγος.*

Sermo Dei totus Ratio est, Oratio noster:
Sic Λόγος est, loquitur quo Deus, & quod homo.

88 *Opinio.*

Credere vult nemo, credi sibi quisque; fidemque,
Sicut amicitias, utilitate probat.



89

Ars.

Naturæ in gremio Deus artes condidit; ut sit
Usque quod acquirat, quoque requirat homo.

90

Apologia Adami.

Cur ego peccati quasi princeps arguor autor?
Non ego peccavi primus; at Eva prius.

91

Serpens.

Tentator tuus ipse, tuus deceptor es idem;
Te qui tentaret, tu nisi, nullus erat.

92

Semper eadem.

Unus in orbe Deus semper fuit, est, erit idem:
Cur non est eadem semper & una fides.
Una fides, velut una dies, illuminet orbem,
Unus ut in cœlo Sol, & in orbe Deus.

93

Oratio mentalis.

Sit purum pectus domus oratoria, lector
Spiritus, & mundum cor manuale precum.

94

Quinque vulnera.

Pharmaca sunt potius, quam vulnera, vulnera Christi;
Curat enim plagis vulnera nostra suis.

De Amicitia adumbrata.

95 *Ad D. Joannem Suckling, amicum suum.*

Dum Sol obscurum radiis illuminat orbem,
Est individuus corporis umbra comes.

Quam



Quamprimum liquidus nebulis offunditur ær.

Ecce repente tūm deserit umbra latus.

Te, bona dum splendet fortuna, sequuntur amici,

Ut te, dum lucet Sol, solet umbra sequi.

96

Virtus.

Non est in verbis virtus, at rebus inhæret;

Res sunt, non voces, Spes, Amor, atque Fides:

97

Rachel.

Sublatum natum quare fies; cumque dolore

Perdis eum, quem non absque dolore paris.

98

Salomon.

Prudentes quot sunt, tot sunt miracula mundi;

Nam mirabilius quid sapiente viro?

At Salomon septem senior Sapientibus: ergo

Octavus non est; primus at esse potest.

99

Spes.

Cum mihi sit casus prudentia nulla futuri,

Quid speremve boni, quid metuamve mali;

Non despero tamen: cum spe mihi spiritus exit:

Producit vitam spes mihi longa brevern.

100

Ignorantia humana.

Vivere vix quid sit novi; mirum nihil ergo,

Si quid sit nasci nescio; quidve mori.

101

Christus via.

Ad cœlos vis scire viam tibi qua sit eundum?

Ad te descendit cœlitus ipsa Via.

F 4

102 De



102 *De Fama. Ad Nobiliss. max. spei adolescentem, D. Joan. Harington, Equitem.*

Quærit virtutes, virtutum spernit laudes :
Nominis est etenim gloria non hominis.

103 *Fides.*

Pythagorea, Fides est, inter dogmata, Princeps,
Quicquid Pythagoras dixerat, Ἀντὸς ἔφα.

104 *Æquanimitas.*

Seu mortis venit, seu nondum venerit, hora ;
Culpa est nolle mori ; culpaque velle mori.

105 *Tempora novissima. Ad Amicum suum Carolum Rives, Theologiae Doctorem.*

Tempora, si non erro, novissima, prima fuerunt :
Nempe novum tempus, cum novus orbis, erat.
Dic mihi jam veterum lector studiose, librorum,
Hoc tempus nostrum sit vetus, anne novum ?

106 *Voluntas.*

Vls bonus esse ? velis tantum, fiesque volendo :
Is tibi posse dabit, qui tibi velle dedit.

107 *Ad Solem.*

Phœbe bis octogies terra pulcherrime major,
Innumerabiliter cum videre minor :
Qui mihi tantillo vermi, Sol tante, videris
Tantulus, heu videor quantulus esse tibi ?

108 *Pro-*

108 *Probitas.*

VIr sapiens plerumque bono est sapientior ; esto :
Dummodò sit melior vir sapiente bonus.

109 *Homo.*

COr, nisi cura, nihil ; caro nil, nisi triste cadaver ;
Nasci, ægrotare est ; vivere, sæpe mori.

110 *Multiloquium. Ad Predicatores.*

SErmones crebri morum sunt signa malorum :
Nam quid opus verbis est, ubi facta vides ?

111 *Mors contra & secundum naturam.*

NOn prius auferres prolem, quam, dura, parentem,
O Mors, naturam si sequerere ducem.
Naturam in vita, naturam in morte sequamur ;
Vult Natura hominem vivere, vultque mori.

112 *Eloquentia.*

PAcundus non est, qui multa, at qui bene dicit ;
Ut nec fœcundus, qui mala gignit, ager.

113 *Deus.*

UT prohibent oculum nebulae discernere cœlum :
Sic videt ob mentis nubila nemo Deum.
Nemo Deum vidit ; pauci audivere loquentem :
Hinc tam rara * fides ; at magis rarus † Amor.
* Fides ex auditu. † Amor ex visu.

114 *Ad Ponticum.*

Sæpe rogas, Quot habes annos ? respondeo, Nullos.
Quomodo ? quos habui, Pontice, non habeo.



115 *Ad Carolum Rives, Theolog. Doct.
veterem amicum. De Amore & Amicitia.*

Natura à longa quod consuetudine differt,
Hoc ab amicitia, Carole, distat amor.

116 *Principes.*

PRæ vobis pietatem & Religionis honorem
Semper & antiquam fertis in ore fidem:
Religio sed vos augendi accendit honoris,
Non restaurandæ Religionis honor.

117 *O tempora! ô mores!*

CUr accusat homo mores ac tempora, culpam
Moribus adscribens temporibusque suam?
Non in temporibus vitium est, aut moribus ullum,
Non vitiamur ab his temporibus, sed in his.

118 *Philosophia.*

Plurima scire volunt omnes, at credere pauci:
Hinc multi credunt plurima, pauca sciunt.

119 *Malum infinitum.*

Mille modis morimur mortales, nascimur uno:
Sunt hominum morbi mille, sed una Salus.

120 *De Controversiis.*

Theologi certant, & adhuc sub iudice lis est;
O utinam lis sub iudice tota foret!
Theologi certant, & adhuc de iudice lis est:
O utinam lis de iudice sola foret!
Tanta vel in nobis utinam lis esset amoris,
Quantus, in hoc lacero tempore, litis amor!

121 *Christus in cruce.*

IN medio Christus latronum quando pependit,
Aut nunquam, aut Virtus tunc fuit in medio.

122 *Temporis filia.*

Quod verum est, lateat quamvis, aliquando patebit;
Hinc & apud Grajos nomen ἀλγες habet.

123 *De Medicina & Jurisprudencia. Ad
Henricum Martin. Doct. U. Juris prudentiss.
& Joannem Gifford, Doctorem Medicina
peritissimum, amicos suos.*

Vivere naturæ si convenienter amarent
Mortales, medica nil opus esset ope.
Si saperent homines, rixis avidisque carerent
Litibus, & queruli garrulitate fori.
Sic incompotus post scrinia Bartolus iret,
Et mus illectum roderet Hippocratem.

124 *Conjuges.*

Discordes nos tota domus non continet ambos,
Concordes lectus nos tamen unus habet.

125 *Dies brevissima.*

Una dies nostræ suprema brevissima vitæ;
Est etenim fini proximus ille dies.

126 *Querimonia virtutis.*

Rarus amoris amor, virtutis nullus amator;
In pretio pretium nunc, in honore honor est.

Divi-



Divitiæ prostant, emiturque pecunia nummis;
Et sua jam virtus præmia vilis emit.

127 *Durus pater.*

In gnatum quo, dure parens, es parcior, hoc es
Largior; huic moriens omnia namque dabis.

128 *Oratio ad Deum in Morbo.*

Naturæ natura, Deus bone, cum mihi posse
Vivere sustuleris, da mihi velle mori.

129 *Ad Litigatores.*

Si iudex tibi surdus erit, desertus abibis:
Et frustra, amissa lite, disertus eris.
Judicibus plus quam juri studuisse juvabit;
Hos tibi, quam leges, conciliato prius.

130 *In Brunonium.*


Instituere patres ideo jejunia nostri,
Ut caro spiritui pareat, ille Deo:
Tu semper plena servas jejunia mensa,
Spiritus ut carni ferviat, illa tibi.

131 *Tempus.*

Omnia fert ætas secum, aufert omnia secum:
Omnia tempus habent, omnia tempus habet

132 *Cessatio miraculorum.*

ABreviata Dei, siquidem miracula cessant,
Est manus? an potius nostra minuta fides?

133 *Ad Irum.*

Vivere te semper velles; tu vivere semper
Non potes: at semper vivere velle potes.
At cum tam miserè vivas, ego nescio quare,
Velle licet possis vivere, posse velis.

134 *Scientia.*

Judice me, soli semperque perinde beati
Sunt, quicumque sciunt omnia, quique nihil.

135 *Christus.*

Finis noctis ut est aurora, & origo diei;
Tu finis mortis, fonsque salutis eras.

136 *Quis tu?*

Quis oculos videam ipse meos, oculi mihi defunt;
Qua mentem videam, mens mea mente caret.
Si mens, una mei pars optima, nescio quid sit,
Unde tibi possum dicere, sim quid ego?

137 *Regnum Cælorum.*

Regnum Cælorum, quo non patet amplius ullum,
Cur ad tam paucos pertinet? arcta yia est.

138 *Dolor & voluptas.*

Cor corpusque dolor præsens! gravat, usque futurus
Suspendium cruciat, præteritusque juvat.
Præsens præterito juvat emta dolore voluptas;
Venturo præsens emta dolore nocet.

139 *Petrus.*

Ultimus in Solyma Kaiphas fuit urbe sacerdos,
Ut perhibent, Roma primus in urbe Kephas.



140

De somno.

SI somnus nihil est nisi mors, nil mors nisi somnus;
Quo plus in vita dormio, vivo minus.

141

Roma.

INcepto fratrem Cain orbe occidit Abelem,
Incepta fratrem Romulus urbe Remum.
Roma Remi polluta recens, ut Mundus Abelis,
Sanguine: principium est Orbis & Urbis idem.

142

Hominis perfectio.

UNiuscujusque rei perfectio summa
Est, ad principium posse redire suum.
Tunc igitur perfectus homo, summeque beatus,
In cœlum & terram quando refertur, ero.

143 *Domine, adauge fidem nostram.**Luc. Cap. 17.*

NON augenda fides, potius minuenda videtur,
Vix cum sint homines tot, quot in orbe fides.
Sortitur sibi quisque fidem, sibi quisque magistrum?
Nunquam plus fidei, perfidiæque fuit.
Domine, diminue fides nostras.

144

In Avarum.

IMprobus Herculeum Nihil-ultra transit: avarus
Plus ultra Caroli semper habere cupit.

145

Bonum Transcendens.

TRANscendit Genus omne Bonum, nullisque tenetur
Finibus; est igitur nullus in orbe Bonus.

146 *Omnia*

146 *Omnia vanitas.*

DEfleret mores, si viveret, Heraclitus;
 Nostraque rideret tempora Democritus:
 Quanquam, ad ridendum curas & innania mundi,
 Splenis Democritus non satis unus habet:
 Ad casus hominum, lacrymarum rore rigandos,
 Heraclite, oculi non satis ambo tui.

147 *In Epicureos.*

SÆpe ego de Veneris juvenes brevitate querentes
 Audivi, & vitæ de brevitate senes.
 Vita voluptatis brevis est, vitæque voluptas;
 Qui pariter parvipendit utramque, sapit.

148 *Opera.*

Qui bene fecerunt, illi sua facta sequentur;
 Qui male fecerunt, facta sequentur eos.

149 *Initium sapientie timor.*

Speraret cælos nemo, si nemo timeret
 Infera, prudenti spem facit ipse metus.


150 *In Battologum.*

Non contentus eo, doctas quod inanibus aures
 Vocibus, & tempus garrulitate teras;
 Post longo enectum sermone, levique popellum,
 Temporis aggredieris de brevitate queri.
 Oxonium redeas, melius distinguere discas;
 Sermo quidem longus, non breve tempus erat.

151 *In eundem.*

Nulla sat ut Tulli est oratio longa disertæ;
 Sic tua, Batte, brevis concio nulla satis.

152 *In*

152 *In Polytheos.*

O Stolidæ gentes, quæ vos dementia cepit,
Plures quam mundos esse putare deos?

153 *De Ingenio & studio.*

Ingenium, studio si non acuatur, hebescit,
Ut telum, assiduam cos nisi præstet opem.
Ingenium studiis alitur, teritur quoque, sicut
Tela terendo acuit cos, acuendo terit.

154 *Nosce teipsum.*

Qualis sit, talem se nemo intelligit: atqui
Se meminit puerum vir, juvenemque senex.

155 *Ars longa, vita brevis.*

UT solide sapiat, nulli sua sufficit ætas;
Mors prius à tergo, quam sapiamus, adest.

156 *In Moranum senem.*

Non discenda modo, sed dediscenda supersunt
Multa, Morane, tibi, si bonus esse velis,
Dediscendo bonus discendove quomodo fies?
Difficile ætati cum sit utrumque tuæ.

157 *Ad D. T.*


Dupliciter miser es, quia felix ante fuisti;
Dupliciter felix, qui fuit ante miser.

158 *Omnes quærunt quæ sua sunt.*

Non quærit Christum Laicus; sua commoda quærit:
Nec tu τὸν Χριστὸν, Clere, τὸ χρεῖσθαι amas.

159 *In Brunonium.*

Cum pestis testis divinæ creditur iræ,
Tam bene, Burnoni, qua ratione vales?



In promptu ratio est ; qua non capitalior ulla
Esse potest , patriæ pestis es ipse tuæ.

160 *Respice finem.*

RESPICE principium potius , sed prospice finem ,
Cælum suspiciens , despiciensque solum.

161 *Sensus, Ratio, Fides, Caritas, Deus.*

Nil sensus ratione carens ; ratio fidei expers ;
Nil sine amore fides , nil amor absque Deo.

162 *De Prudentia. Ad amicum suum ,
D. Thomam Bridges.*

UTILIS in rebus prudentia semper agendis ,
Una est virtutum ludimagistra trium.

Nempe bonum in vita quid sit , Prudentia monstrat :
Ut Logice , verum quid sit in arte , docet.

163 *Ad Parentes.*

SUM tua , care pater . tua sum caro , mater : in una
Carne mea duo vos estis , & una caro.

164 *Prudentia & Fortitudo.*

PRUDENTIS cavisse viri est mala , ferreque fortis ,
Ut mala non metuat iste , nec ille ferat.

165 *In sudore vultus tui.*

MANDERE qui panem jubet in sudore diurnum ,
Non dabit æternas absque labore dapes.



166 *De Fide & Caritate. Ad cognatum suum, Andoenum Gooyn, Theolog.*

ARbor uti plantanda prius quam fructus habendus :
Inter virtutes prima docenda fides.

Vita fide paritur, tamen haud sine amore; ut egenus
Spe vivit, sed non absque labore tamen.

Prima Fides igitur, princeps Amor est; quia magna est
Credere, sed virtus major amare Deum.

167 * *Si oculus tuus dexter, &c.*

* *Matth. 5. 29.*

Si quoties peccant dextri effodiantur ocelli,
Mundus in exiguo tempore luscus erit.

168 *Adverbia Christiana. Ad amicum suum Jo. Tovey.*

Adjectiva parum profunt, Adverbia multum;
Non bona tam pensat quam benefacta Deus.

169 *Vita brevitatis.*

Infanti nondum nato par omne futurum
Judico, defuncto præteritumque seni.
Tollito præteritum de vita, tolle futurum;
Quantillum vitæ, quod tibi restat, erit?

Lex Talionis.

170 *In Aulum.*

Majorum nunquam, Aule, legis monumenta tuorum:
Mirum est, posteritas si tua scripta legat.



171

Tempus.

TEmpus edax rerum : nos & terit omnia tempus :
Nos terimus tempus : jam sumus ergo pares.

172 *Abundans cautela. Ad Michaëlem
Heyden , amicum suum.*

Non temere facias , timide nihil , omnia caute ;
Cuncta cito , fero nil , subitoque nihil.
Natura es timidus ? fortem prudentia reddet ;
Nemo cavenda timet , qui metuenda cavet.

173

Joannes ad oppositum.

Concurrat veterum licet in te turba , potes tu
Hac omnes una vincere voce ; Nego.

174

Justificatio.

Justificant hominem sua facta , fidesne fidelem ?
Justificat solus facta fidemque Deus.

175

Dies Judicii.

Quo respondebunt homines , & ad omnia , & omnes,
Judicio tanto num satis una dies ?

176

Ad Marianum.

Oderunt peccare boni virtutis amore :
Sunt igitur pauci nunc , Mariane , boni.
Improbis tanti , probitas tam denique parvi
Penditur ; ut probum pene sit , esse probum.

177

M. Magdalene fletus.

Surgunt ex uno fontes duo monte perennes ,
Unde duplex falsæ labitur amnis aquæ.

178 *De anima.*

Cœlitus orta mihi mens , non ex traduce ; nam si
Corpore cum reliquo mens oritur , moritur.

179 *In Marcum.*

IN lecto tua vota facis , resupinus adoras ;
Quid mirum , ignavas , Marce , perire preces !
Orantis quasi non orantis inania verba
Sic audit , quasi non audiat illa , Deus.

180 *Infernum.*

UT niger in niveum nulla redit arte colorem ;
Spectari ab inferno sic via nulla retro.

181 *Ad amicum pauperem.*

EST male nunc ? utinam in pejus fors omnia vertat ;
Succedunt summis optima sæpe malis.

182 *Partes mundi.*

DIVIDITUR totus partes in quatuor Orbis ;
Orbis quot partes , sunt tot in Orbe * Fides.
* *Judaica , Christiana , Mahometana , Pagana.*

183 *Discordiarum causa.*

SENSUS quemque suus , Ratio sua quemque gubernat ;
Velle suum cuique est , & sua cuique Fides.
Velle suum cuique est , fratrum hinc discordia : ut inter
Fratres conveniat , nil nisi velle deest.

184 *Liberalis.*

VIr justus dat cuique suum , sed te dare oportet
Divitibusque suum , pauperibusque tuum.



185

Sapiens.

QUI rerum novit causas, ac tempora servat,
Temperat affectus, ordinat acta, sapit.

186

Sapiens.

FATA regunt fatuos; sapiens dominabitur astris;
Non fatum, at * fato se regit ipse suo.

* id est, sapientia.

187

Infans anonymus ante bapt. mort.

MORTUUS heu! nec lotus aqua, nec nomine notus;
Non habui nomen quod tibi, Christe, darem.

In libro vitæ tu me sine nomine scribas:

Spes est in solo nomine nostra tuo.

188

Adulator & Invidus.

ZOILUS & GNATHO non re, sed nomine, distant:
Virtutem ille bonis invidet, iste malis.

189

Amor & Amicitia.

NODUS amicitiae rumpendus propter amorem:
Propter amicitiam non violandus amor.

190

Petrus & Paulus.

IMPERIUM gladio, sed opes sub clave tenentur;
Ditior est Paulo scilicet inde Petrus?

Esse inopem, Divum sua dicit epistola Paulum:

Hoc sanctus de se nullibi Petrus ait.

191

Socrates.

NON scis, unum hoc scis; aliquid scis & nihil ergo:
Hoc aliquid nihil est: hoc nihil est aliquid.

192

Homo.

PLORABAS cum natus eras; fuit ergo voluptas
Nulla tibi nasci; cur dolet ergo mori?

The Windingsheete.

193

Ad Paulum sepultum.

EX utero matris venisti nudus in orbem:

In terram tectus sindone, Paule, redis.



Plus auferis igitur tecum quam, Paule, tulisti;
Plus reddis matri quam dedit illa tibi.

194 *Ad Lectorem aulicum.*

SI sapiant hic multa scholam, perpauca sed aulam:
Scito quod hæc aulæ scripsimus, illa scholæ.

195 *Prudens Simplicitas. Ad amicum amicissimum, Joan. Clapham.*

UT nulli nocuisse velis, imitare columbam;
Serpentem, ut possit nemo nocere tibi.

196 *Oculi Reipublicæ.*

LEX & Relligio junxerunt fœdera: pravas
Hæc hominum mentes comprimit, illa manus.

197 *Ad Jo. Grifford, Med. D. peritiss.*

ARTIS Apollinææ quod sis, Grifforde, peritus,
Haud mirum; nosti corpus & ipse tuum.
Si non Galenus jubet hoc, at doctus Apollo
Jussit: Apollineum γυνῆς σιαυρὸν erat.

198 *Cornicula, Anser.*

Cornicula.

ALTERA me in terris non est facundior ales.

Anser.

Tu me plus loqueris: plus ego scribo tamen.

199 *Miseria Job.*

DIVITIAS Jobo, sobolemque, ipsamque salutem
Abstulit (hoc Domino non prohibente) Satan.
Omnibus ablatis misero, tamen una superstes,
Quæ magis afflictum redderet, uxor erat.

200 * *Pauls and Westminster.*

* *Templum divi Pauli; & Monasterium Sancti Petri.*

FISCUS ad Occiduum stat Regius, & Fora Petrum,

ALBA nec à Petro Principis Aula. procul

Ad



Ad divum Verbi præco mysteria Paulum

Explicat, & merces Bibliopola sacras :

Omnia conveniunt, sit Paulus ut hic, Petrus illic :

Ditior hic Paulo, doctior ille Petro.

201 *In Conjuratores, qui 5. Novembris,
die Martis, 1605. subiecto pyrio pulvere
Curiam Westmonast. diffilare instituerant.*

EX ima celsum tellure laceffere cælum;

Eque loco superos inferiore Deos;

Quid, si non hoc, est imponere Pelion Ossæ,

Et turrin in terris ædificare Babel?

Atque iterum in cineres Trojanam vertere gentem,

Inque tenebrosam volvere cuncta Chaos?

202 *In eosdem.*

ERgo novam in cineres voluistis vertere Trojam,

Perjuri fato quo periere Phryges?

Non fuit infando lux Martis idonea fato:

Mercurij Cinerum nam solet esse dies.

203 *Rex ad Britanniam.*

Fama meæ mortis nuper tibi nuncia venit;

Nolito famæ credere: crede mihi.

204 *Ad Angliam, de Unione Britannica.*

INterna æterna Britones jam pace fruemur:

Ternus enim populus qui fuit, unus erit.

Wallia cui vallum contingit, Scotia scutum,

Anglia, securam jam licet esse tibi.

205 *Ad Thom. Neville, D. Henrici &
D. Mariae Neville, maximæ spei & optima
indolis filium.*

ORte Nevillorum puer alto à sanguine, dulci

Pingitur in vultu cujus uterque parens;

Exprimis & mores, non corpora sola parentum;

Matris virtutes, ingeniumque patris.



206 *In obitum Nobiliss. D. Caroli Blunt,
Comitis Devonie. 1606.*

CArole, laudandus dubito magis, anne dolendus,
Elogio dignus sis, Elegone magis.

Mortuus es; de te multi jam multa loquuntur:

Optima quæque boni, pessima quæque mali.

207 *Ad Lectorem.*

QUæ legis hic, sunt curta Epigrammata, sunt quoque
pauca:

Nam si multa forent curtula, longa forent:

Quæ legis hic, sunt pauca Epigrammata, sunt quoque curta!

Nam si longa forent curtula, multa forent.

208 *De viva voce, & Scriptis.*

SIt verbum vox viva licet, vox mortua scriptum;
Scripta diu vivunt, non ita verba diu.

Tertii libri Epigrammatum

FINIS.



EPIGRAMMATUM
JOANNIS OWENI

CAMBRO-BRITANNI,

*Ad Excellentissimam & doctissimam
Heroinam,*

D. ARBELLAM STUART,

Liber singularis.

Ad D. Joan. Audoënum.

Fastidita meæ fuerant Epigrammata Musæ;
Jamque satur Carmen pene perosus eram:
At tua jucundum referunt mihi scripta saporem;
Provenit ex versu nausea nulla tuo.

Joan. Harington, Eques.

Ad D. Joan. Audoënum.


Multi scripserunt Epigrammata, nuper & olim,
Quorum vix equidem nomina nota reor:
At tua (ne dubites) vivent Epigrammata: vivent,
Dum facer in pretio sermo Latinus erit.
Laus tua cum terra stabit, cœloque manebit;
Nec, nisi cum mundus concidet ipse, cadet.

D. Du. Tr. Med.

Idem, de eodem.

Sive jocos lepidus, seu seria tractat Oënus:
Autorem hunc aliud nil agitasse putes:
Sive paludatus Lector sit, five togatus,
Applicat hic genium Scriptor utrique suum.

JOAN.



JOANNIS AUDOENI
EPIGRAMMATUM
LIBER UNUS.

1 *Ad Nobilissimam & Doctissimam Heroinam, Dominam Arbellam Stuartam.*

REGIA progenies, genere illustrissima Virgo,
Nec minus ingenio nobilitante genus;
Ingenii fructus tibi fert offertque secundos,
Primitias Dominæ qui dedit ante suæ:
Seque tibi tanquam bella virtutis in ara
Consecrat, ingenium sacrificatque suum.

2 *Ad Eandem.*

A Teneris idem tenor, & constantia vitæ,
Arguit ingenii vim geniumque tui.
Te non adversæ timidam tumidamve secundæ
Res faciunt: eadem frons tibi mensque manet.
Fecit & in populo tua spectatissima virtus,
Ne quis adulari me tibi posse putet.

3 *Ad Librum.*

I Nnumero dicenda tibi sub iudice causa est;
Arbitrium de Te non duo trefve dabunt:
Forſan & illeſtus temere damnabitur Autor;
Rarior & leſor quam reprehensor erit.



Unio.

4

Ad Britannos.

QUis nisi mentis inops oblatum respuat aurum?
Offertur nobis * Unio : respuitur.

* *Quod vulgo perlum dicimus, Latini unionem vocant.*

5

Vacuum.

EThicus ô inquit quantum est in rebus inane!
Esse tamen Physicus monstrat inane nihil.

6

In Zoilum.

ZOilus aeterno laceratur carmine; quanquam
Ante duo annorum millia mortuus est.
Anne, quod hæredes post se tot in orbe reliquit,
Pro tota pœnam posteritate luit?

7

A Centro ad Circumferentiam.

AA Centro ad Circum non unica Linea ducit :
A Terra ad Cœlum fert tamen una Via.

Gallicinium.

8

Ad H. Principem.

ANglorum sensit virtutem Gallia : solus
Ad Galli cantum non fugit iste Leo.

Bellum Grammaticale.

9

In Quintum.

ESt nummus Nomen, Verbum promittere : Quintus
A quo sperabam Nomina, Verba dedit.

Tres



Tres Dimensiones.

10

In A. Battologuni.

Vox tua mensuris desiderat è tribus unam;
Lata satis, nimium Longa, Profunda parum.

11 *Ad Lectorem, de tribus prioribus
Epigrammatum Libellis.*

Sicut post varios quinquagenaria partus
Jam reliquos soboli transit inepta dies:
Sic tribus emissis vena meliore libellis,
Aridus ingenii jam sterilefcit ager.

12 *Ad Simonem Waterfon, Bibliopolam.*

Waterfone, mei fufceptor prime libelli,
Dum fueris gratus, Bibliopola Simon:
Sint quamvis contra facras monopolia leges;
Ingenii fies tu monopola mei.

13

Salum.

Salsa fitim pariunt: nihil æquore falsius: Ergo
Quid mirum dulces quod bibat æquor aquas?

Solstitium.

14

In Ponticum atheum.

Solstitium vitæ, Mors est; Sol stare videtur,
Non stat: Homoque mori, Pontice, non moritur.

15

Ad Librum.

Parve Liber, patriis monitis munitus in Aula,
Discito fortunam fortis utramque pati;

Illic



Illic invenies aliquem tibi forsan amicum:
 Atque aliquis contra qui male dicat, erit.
 Si quis erit nimium rigidus, nimiumve molestus;
 Non me, sed dominum, dic, reprehende meum.

Aulicifmus.

16 *Ad Amicum, Aulicum.*

ARRisit tibi Rex? ridebit & afflecla magni,
 Regis, ut ad motum corporis, umbra movet.
 Perfricuit frontem Rex? Aulicus illico vultum
 Contrahit, ut, cum Sol occidet, umbra fugit.

17 *In Corbulonem.*

QUæritur in capitis frondosi vertice quare
 Non habet crinem Corbulo? crimen habet.

18 *Ad Pontilianum.*

IN jus Christophorus te, Pontiliane, vocavit:
 Non te, sed nummos, Pontiliane, tuos.

19 *Ad D. Edw. Herebertum, ordinis Batbon. Equitem doctissimum.*


TE versus laudare meos mihi fama fufurrat:
 O par si possem laudibus esse tuis!
 Qui tenues tanto Musas dignaris honore,
 Dignus es à Musa tu meliore cani.

Invidiæ Genealogia.

20 *Ad D. Joannem Haringtonum Equi- tem, D. Baronis Haringtoni baredem, maxima spei adolescentem.*

INvidiam virtus peperit, partaque tuetur:
 Ex virtute unum nascitur hoc vitium.

Hoc



Hoc Epigramma tibi quæris cur dedico? dicam:
Sperare invidiam nam tibi jure licet.

21 *De virtute, Paradoxon.*

IN medio virtus vitiorum quæque duorum est:
Præstaret, vitii si foret iste locus.

Septem Planetæ.

22 *Ad Paulam.*

ERRantes inter stellas bene, Paula, notasti
Quinque mares, generis fœmineique duas.

23 *In Marcum.*

PLUS tibi pollicitis præstandum; non minus: unde
Una data est homini lingua, manusque duæ:
At tu nil præstas; promittis plurima: tanquam,
Marce, duæ linguæ sint tibi, nulla manus.

24 *Sacerdos Romanus.*

VIS fit adulterium non dignum morte, Sacerdos?
Haud mirum; conjux est tibi nulla: sapi.

25 *Minister Genevensis.*

VIS ut adulterium plestatur morte, Minister?
Haud mirum; conjux est tibi bella: sapi.

26 *Philautus Poëta.*

PROxima quod nostris sit maxima Luna videtur
Sensibus; ex septem sit minima illa licet.
Sic Vatum videor, quia sum mihi proximus ipse.
Sim quamvis minimus, maximus esse mihi.

27 *In*

27 *In tenacem Clientem.*

MIraris clausæ quod sint tibi iudicis aures,
Cum tua iudicibus non sit aperta manus?

28 *In quendam asinum.*

CUr asinum voco te, potius quam nomino, quæris?
Non asinis dantur nomina, dantur equis.

*Imago in speculo.*29 *Ad Pontiam.*

SUbridet, quasi te ridentem cernat imago:
Irrigat & mœstas, te lacrymante, genas:
Cum dormis, oculos claudit; tecumque movetur:
At tu dum loqueris, dicit imago nihil.

30 *Permutatio Glauci.*

ESuriens fratri omne suum jus vendidit Elau,
Jacobus fratri jus dedit omne suum.

31 *Ad quendam somniatorem.*

IN fomnis ignota prius mysteria discis,
Multaque, te vigilem quæ latuere, doces:
Quanto plus igitur scires, si mortuus esses,
Tam bene quem docuit mortis imago loqui?

*Wallia & Cantia, aliàs Cantium.*32 *Ad D. Robertum Cotton, Equitem
doctissimum.*

ANtiquam retinet gentem, non Wallia nomen:
Non gentem, at priscum Cantia nomen habet.
Heau-



Heautontimorumenos.

33 *Ad cognatum suum, D. Theodorum
Price, Theologum.*

Angelus est nimium felix, quia corporis expers:
 Bruta nec infelix bellua, mente carens.
 Solus homo miser est, qui mente & corpore constat,
 Sentiat ut fragilem se, miserumque sciat.
 Scilicet omnis homo (Menedemi nam sumus omnes)
 Se ratione angit, non ratione regit.

34 *In Linum.*

TE mihi devinxi, credebam cum tibi nummos:
 Me tibi devinctum vis? mihi redde meum.

Cœlibatus.

35 *Ad amicum suum, D. Robertum
Booveyer, cœlibem.*

Si cœlum meritis adscribitur, & benefactis,
 Cœlebs tu, cœlum quo merearis, habes.

Væ soli.

36 *Ad amicum suum, Joan. Suckling,
conjugatum.*

Pincipio cœlum, terramque, hominemque creavit
 Cur, nisi quod solus noluit esse, Deus?

37 *In Marcum.*

Esse potest dives promissis quilibet, inquis;
 Pollicitis dives non ero, Marce, tuis.

H

38 *In*

38 *In Aulum, Atheum.*

DE Cœlo tecum fieret cum sermo, Deoque,
 Tecum, qui Numen nomen inane putas;
 Vere dixisti: Quæ supra nos, nihil ad nos;
 Orcus enim ad vestrum pertinet, Aule, gregem.

39 *Homo Histrion.*

SPes argumentum vitæ (nam Fabula Vita est)
 Mundus scena, Fides Prologus, Actus Amor.

40 *Ad Lectorem.*

CUr ego tam studeam brevitati, forte requiris:
 Hoc factum est causa, Lector amice, tua.
 Sicut iter longum facienti onerosius; auro est
 Argentum; longum sic Epigramma brevi.

41 *Stylo novo.*

URbs veterum cultrix, rerumque inimica novarum,
 Imposuit Fastos cur sibi Roma novos?

42 *Ad Marinum, de amica sua.*

MObilitas cœli laus est, Constantia terræ
 Gloria, quæ stabilem servat in orbe statum:
 Unde, Marine, tibi cœlestis tota videtur;
 In se terrenum nūc tua Phyllis habet.

43 *Eva lapsus. The weaker vessel.*

EClipsin raro patitur Sol, Luna frequenter:
 Est magis ad lapsum fœmina prona viro.

Nec



Nec in hoc seculo, nec in futuro.

44 *In Damianum.*

SEu res præsentes considero, sive futuras,
Nemo hominum magis est te, Damiane, miser.
Improbis es: nil te seculum juvat ergo futurum.
Stultus es: hoc seculum te juvat ergo nihil.

Carendo magis, quam fruendo.

45 *In Ponticum.*

Ingenium scis quid valeat, quid, Pontice, virtus,
Si rerum scitur verus egendo valor.

46 *Homicidium.*

UNus homo per se ipse potest occidere mille,
Unum hominem possunt vix generare duo.


Amicitia.

47 *Ad amicum suum, D. Thom. Bridges.*

CUr similis similem sibi quærit? amicus amicum?
Uno nemo potest in pede stare diu.

48 *Ad D. Joan. Haringtonum Equitem,
D. Baronis Haringtoni filium, bonarumq; litt.
virtutisque studiosiss. adolescentem.*

SI vultu virtus incognita proditur, exstant
In vultu virtus ingeniumque tuo.
Est & in hoc spectata tui prudentia patris,
Toveus ingenii quod tibi cultor adest;
Quandoquidem similes dat nostra Britannia paucos,
Doctores illi, discipulosve tibi.

49 *In Polydorum Virgilium.*

Virgilii duo sunt: alter Maro, tu Polydore
Alter: tu mendax, ille Poëta fuit.

50 *In quendam Momum, priorum Epigrammatum Censorem, iniquissimum.*

Inter tot sceleratorum centena tulisset
Si justos tantum quinque Gomorrha viros,
Staret adhuc. - - - - -
Tu propter paucos, leviuscula carmina, lusus,
Vis pereat totum, livide Lector, opus.

51 *In eundem.*

Incendit Triviæ sacra Tempia, ut nomen haberet,
Quidam, nescio quis: nec puto nomen habet.
Si tu dente nigro carpis mea carinina: speras
Forſan in hoc quarto nomen habere libro.
Uſque licet per me rodas mea carmina, carpas
Uſque licet: fallam ſpes ego (Mome) tuas.

52 *In quendam domesticum obtrectatorem.*

Tu quoque mi frater fratrem carissime carpis,
Illæſum lingua nec finis ire tua?
Cur fratri inideas, meruit ſi carmine laudem?
Si pœnam; fratri parcere, fratris erat.

53 *Cornutus.*

Conjugis ob furtiva negotia cur ego pleſtor?
Corniger à populo prætereunte vocor?
Et digitis monſtror? Nam quæ non fecimus ipſi
(At vos, nescio qui) vix ea noſtra voco.

54 *In Philautum.*

Dilige vicinum veluti te diligis ipsum,
Sic, inquis, facio; Proximus ipse mihi.

55 *Audaces Fortuna juvat.*

Fœmina Fortunæ similis formosa videtur;
Non amat ignavos illa, nec ista, viros.

56 *Amor cæcus.*

Tardior in longos Amor est durabilis annos:
Lenta magis durant quam violenta diu.
Ut paritura canis, cupidus festinat Amator:
Unde fit, ut catulus sit quasi cæcus, Amor.

*Amor non cæcus.*57 *Ad Firmicum.*

Non Amor ut fovea est: in amorem pronus es, Arge,
Tu magis: in fossam tu, Polypheme, magis.
Gignitur ex visu: non ergo, Firmice, cæcus
Nascitur; ex oculo cum generetur Amor.

58 *Ad Quintum, Aulicum.*

Est oculus tibi, Quinte, unus? metuendus Ulysses:
Centum oculi vigiles sunt tibi? Mercurius.

59 *Epitaphium Justitiæ.*

EX quo Cœlestum terras Astræa reliquit
Ultima, signifero legit in orbe locum:
Templum Justitiæ, legumque evertimus aras;
Scitque fere solus Jus dare cuique coquus.



A Writ of Latitat.

60 *In Marcum Epicureum.*

PRudenter latitas, si te latuisse lateret,
Marce: sed hoc ipsum, te latitare, patet.

61 *Collegium Jesu & Colleg. Ædis Christi
Oxonia, sola nondum perfecta.*

Imperfecta tibi domus una sacratur, Jesu:
Ex non perfectis altera, Christe, tibi.
Inter honoratos Sanctos Sanctasque tot, hæc sunt
Paupertatis adhuc signa notanda tuæ.

62 *Fides mercatoria.*

Solvit inops diti Cræso quod debuit Irus;
Pauperis est major, divitis anne fides?

Tristes ante omnia Musæ.

63 *Ad D. Eliseum Win, cognatum suum.*

Olim intonsus erat, sed nunc tondetur Apollo:
Vix in toto anno ridet Apollo semel.
Fallitur (ô) quicumque Camænas dixit amœnas:
Phœbi delira est nunc lyra, manca manus.

64 *Incredulitas.*

Credulitas error potius quam culpa videtur:
Est error nimium credere, culpa parum.

65 *Credulitas.*

Qui cuivis quidvis credit, male creditur illi:
Quo credis mihi plus, hoc tibi credo minus.

Obse.



Obsequium Fidei.

66 *Ad quendam juvenem.*

SEptennis taciturna, fides qua prima docetur,

Disciplina mihi Pythagorea placet.

Vis tibi inexperti credant? tu crede peritis:

Visne tibi gnatum credere? crede patri.

67 *Præstat dare quam accipere.*

ACCipere humanum est; inopi donare, Deorum:

Nunquam tam paucos credo fuisse Deos.

68 *In Ponticum clientem.*

PONTice, Causidico nil porrigis; ista chiragra est:

Ille pedem pro te non movet; hæc podagra est.

69 *Thom. Wolfei, Cardinalis,
Ego & Rex meus.*

DICere Grammatices ratio permittit, Ego & Rex:

Ethica te jubet ars dicere, Rex & Ego.

Hæc est nimirum vivendi ars, illa loquendi:

Principis hæc Aulæ serviat; illa Scholæ.

70 *Ad Gallos.*

QUIsque suo bibit in vitro: mos utilis hic est;

Ex quo contentus conjuge nemo sua est.

Philautus Philaristo.

71 *Calend. Januar. 1607.*

EXspectas, Philariste, tibi dum munera mittam?

Nil habeo quod dem, me tibi præter, Ego.

72 *Philaristus Philauto.*

QUod mihi misisti, nihil est; nihil ergo remitto:
Te mihi donasti; Te tibi reddo: Vale.

73 *Ad D. Henricum Fanshawe, Equitem,
Literatorum fautorem.*

AGusti imperium tibi si fortuna dedisset,
Aut Mecœnatis suppeditasset opes:
Vidissent multos hæc secula nostra Marones:
Nullus Mecœnas, nullus in orbe Maro.

74 *Ad D. Henricum Goodyear Equitem,
optima conjuge orbatum. 1606.*

IMperitare viros, parere & parere maritas
Vult Natura: Uxor fecit utrumque tua.
Paruit & peperit dulces, pia pignora, natos;
Sustinent magnas quæ duo fulcra domos.
O ter felicem, quater ô Godyere beatum,
Si bona tam sequitur, quam bona prima fuit.

75 *Ulysses & Penelope.*

MOrs nobis, velut uxori surrepsit Ulysses:
Vivimus, ut telam texuit illa suam.

76 *In Mancinum, inertem Magistrum.*

QUi totum sine fine diem per compita curris,
Ut tamen in studiis per - videre - vigil;
Ascensâ de nocte soles dormire lucerna:
Vis, Mancine, Oleum perdere, non Operam.



77

In Gelliam.

Diffimiles licet inter se tibi sint duo Nati,
Est similis patri Natus uterque suo.

Sagittarius Cœlestis.

78 *Ad cognatum suum, Guiliel. Ravenscroft, Jurisconsultum.*

Certa Sagitta Fides, Nervus tibi Spes, Amor Arcus,
Sitque tibi Cœlum Meta, Scopusque Deus.

Omne grave tendit deorsum.

79 *Ad amicum suum, D. Carolum Rives, Theol. Doctorem.*

IN Mundo, quo non animal sublimius ullum,
Infima cur homini terra terenda datur?
Est elementorum, rerumque gravissima Tellus;
Peccato gravius nec reperitur onus.
Quid mirum est hominum ferri genus ergo deorsum?
Præter peccatum nil prope cum sit homo.

80

In litigiosum debitorem.

Quæ tua nequitia est, quod debes, non mihi solvis:
Solvis Causidico; quæ tua stultitia est.


81

In eundem.

Sollicitum te cura tenet, non quomodo solvas:
Quomodo non solvas, maxima cura tua est.

H 5

Eccle-



Ecclesiæ Derivativæ.

82 *Ad amicum suum, R. F.*

SI licet una fides, licet una Ecclesia vera,
 Fontibus è vivis orta perennis aquæ:
 A Primitiva, quæ non se Ecclesia solam
 Derivat, fontem dissimulatque suum?

83 *Quatuor maria.*

TRIACRIÆ similis, Britonumque triangula tellus,
 Cur quatuor numeras æquora, Regna tria?

84 *Ad amicum divitem.*

SI quantum valeat res quæque carento sciatur;
 Quid valeant nummi divitiæque scio.

85 *Generatio unius est corruptio duorum.*

UT generent unam confuso femine prolem,
 Corpora corrumpunt vir mulierque duo.

86 *Annulus nuptialis.*

ANNULUS ut sponsæ spondente ab amante daretur
 Moris erat; vetus hoc pignus amoris erat:
 ANNULUS à sponsa potius pro pignore sponso
 Donetur; digitum porrigat ille suum.

87 *De Mundis Democriti.*


SI, quot Democritus Mundos ait esse, tot essent:
 Innumerabilium pessimus ille foret.

De Epigrammatis.

88 *Ad Lectorem fastidiosum.*

EST tanquam mulier formosa, epigramma, jocusque;
 Quæ communis eo fit, quia pulchra fuit.

Com-



Communis jam facta semel, formosa videri
Definit, & mœchis tædia mille parit.

Terra.

89 *Ad cognatum suum, D. Audoënum
Gwyn, Theol.*

USque licet cœlum moveatur, constat: eodem
Semper enim motu se sine fine movet.
Terra stet usque licet, nihil inconstantius illa est;
Terrarum errores angulus omnis habet.

90 *Luna.*

TE maris appellant undosi, Cynthia, stellam:
Nunc terram potius, quam mare, Luna regit.

Avara Liberalitas.

91 *In Acerram.*

DOnat, ut accipiat; non accipit, ut det; Acerra:
Accipere, est illi meta; sagitta, dare.

92 *In Paulam Pseudo-Catholicam.*

PAula, tua si quis de religione requirat;
Nil nisi Apostolicum, Catholicumque crepas:
Catholicum in cunctos, fateor, profiteris amorem;
In te Catholicam, Paula, requiro fidem.

93 *Prodigium.*

PEnelopea fides inter proverbialia quondam,
Nunc in prodigiis possit habere locum.

94 *In*

94 *In Annetam, Francam.*

Natura est paucis contenta, Annetæ: sed hoc de
Natura dictum non reor esse tua.

95 *Ad Marcum, militem luscum & lippum.*

EX oculis superest unus tibi, Marce, duobus,
Perpetuo faciem qui tibi rore rigat.
Cur tibi, qui superest, mœstus lacrymatur ocellus?
In bello fratrem perdidit ille suum.

Pax in Europa.

96 *Ad Theologos.*

REGes belligerant: faciunt & fœdera reges:
Est aliquid, fera denique pace frui.
Presbyteri certant atque immortalia nectunt
Jurgia: litigiis non posuere modum.
Unde venenatæ levis inclementia linguæ,
Et quam sit calamus fœvior ense, patet.

97 *Ad Carolinam.*

IN speculo vultum quoties oculosque tueris,
Si forte elatam te tua forma facit:
Splendida, sed fragilis, pulchra, at peritura, memento
Quam speculo similis sis, Carolina, tuo.

Floralia.

98 *Ad amicum suum, D. Jo. Tovey, Theol.*

UT Cato in obscenam scenam, sed ut exeat, intrat:
Ingreditur mundum sic abiturus homo.
Nec rediturus in hunc, bene ceu male cesserit, orbem;
Fertur ut in scenam non rediisse Cato.

99 *Epi-*

99 *Epitaphium hominis.*

QUIS jacet hic? nemo: vacuum sine nomine corpus
Hic jacet: ex solo corpore non fit Homo.

Horizon Animæ.

100 *Ad amicum suum, D. Benjamin
Heyden, Decanum Wellensem.*

SUMMA elementa duo non cernimus, Aëra & Ignem:
Terram Undamque oculo cernimus, ima duo.
Sic, quid sint homines, quid bruta animantia, scimus:
Nescimus quid sint Angelus atque Deus.

101 *Eclipsis Animæ.*

UT Solem Tellus Lunamque stat inter opacam;
Stat peccatum inter meque Deumque meum.

102 *Mercatores.*

EXTAT apud lepidum, Mercator, Fabula Plantum,
Pseudolus huic aptum proxima nomen habet.

103 *Imaginum cultores.*

MAGNATES quicunque colunt, idolon adorant;
Cum sit imago Dei vir; mulierque viri.

104 *Erasmi desiderium.*

NUNC Desiderium desiderat orbis Erasmus;
Cui soli licuit scribere, quod libuit.

105 *Neuter.*

POMPEJANUS ero, si vicerit omniq; Magnus:
Omnia Cæsar, Cæsarianus ero.

Scan.



Scandalum Magnatum.

106 *Ad Servos Servorum.*

HÆc dicit Dominus: Servum volo quemque fidelem
 Esse meum semper: quomodo? dando nihil.
 Sta, vigila, ito, venito: fideliter omnia postquam
 Præstiteris Domino, Servus inutilis es.

107 *Mars & Venus.*

SE Venus & Mavors communicat omnibus æque;
 Hostis communis Mars, & amica Venus.

108 *Februarius.*

ES similis matri tu, de tot fratribus, unus;
 Sunt tibi viginti scilicet octo dies.

109 *Ad D. Edw. Jones, amicum suum.*

TE tua (virtutis pictura) modestia laudat:
 Laudarem ingenium, si paterere, tuum.
 Ipsa, Edoarde, tui laudanda modestia vultus
 Te facit ut laudem, quam moreare, minus.

Quadratura circuli.

110 *Ad Joseph. Scaligerum.*


Q Uadratura quid est Circi? divisio mundi
 Quatuor in partes, qui prius unus erat.

An Unitas Arithmetica respondeat
 Puncto Geometrico?

111 *Ad D. Josiam Bodley, Equitem.*

PLUS Deus immensus Puncto est, non plus tamen Uno:
 A Puncto quantum differat, ecce, Monos!

From



112 From the Wombe, to the Tombe.

NAscitur in certam miserandus homuncio mortem :
Ut macer in campo bos, ut edatur, edit.

113 *Ad Jacobum Regem.*

O Quanta exempli generoso in Principe vis est ;
Tu vitando vetas, ut faciendo jubes.
Princeps principium motus : Rex regula vitæ :
Circumfert Cælum sidera : Rex populum.

Caput & Corpus.

114 *Ad eundem.*

I^N capite est ratio, & rationis quinque ministri :
Divinum in reliquo corpore pene nihil.

Rumor de morte Regis Francorum.

115 *Ad Regem Francorum.* 1606.

QUod Reges audire timent, ac dicere servi,
Ipsa tibi dicit Fama; Memento mori.

116 *Lux.*

SIt Corpus quamvis, oculo non cernitur Aër :
Lux Corpus non est, cernitur illa tamen.

117 *Unus Deus, multi amici.*

QUanquam nemo potest dominis servire duobus :
Patronas unè quid vetat esse duas ?
Quærere non prohibet multos Deus unus amicos :
Ut multas artes non vetat una fides.

118 *Don-*



118

Donna, Danno.

A Misit costam, causa mulieris, Adamus :
Uxoris causa, perdidit ipsam animam.

119

Womens Tire.

Hoc magis est instar testi, quam tegminis : hoc non
Ornare est, hoc est ædificare caput.

120

Omnia nihil.

Omnia de nihilo qui fecit, is omnia solus :
Quod Deus ex nihilo fecit, id omne nihil.

Ecclesiæ Orient. & Occident.

121 *Ad D. Georgium Rives, Theol. Doctorem doctiss. prudentissimum virum.*

Floret dextra fides in mundi parte sinistra :
In mundi dextra parte, sinistra fides.

Ira. Patientia.

122 *Ad amicum suum, J. Thorium.*

Excitat ira hebetem, motam patientia mentem
Sedat, ut unda ignem temperat, ignis aquam.

123

Ruina cæli & terra.

Hac nihil inferius cum sit, nihil altius illo ;
Tellus quo, cælum non habet unde cadat.

124 *Ad D. Henr. Howard, Comitem Northamptoniæ.*

Filius es Comitum, Comitum patruusque duorum :
Unus erat tibi Dux frater, avique duo.

Tu



Tu Comes es, tibi nemo datos miretur honores :
Cui fortuna comes, dux fuit ingenium.

125 *Ad Pontiam.*

TE fugio, vitoque tuos, mea vulnera, vultus,
Pontia; non quia te non amo, sed quod amo.

126 *Ad Polycarpum, Equitem errantem.*

UNUS erat vetitus Paradisi fructus Adamo :
Lex illum reliquos tangere nulla vetat.
Cui tot præterea fuerat data copia, ab uno
Miror eum cupidas non tenuisse manus.
Tu contra; excepta, prohiberis ab omnibus, una
Arbore: te reliquas tangere jura vetant.
Mirandus minus ergo tuus, quam lapsus Adami,
Cui data libertas, quam tibi, major erat.

127 *Ad Lectorem.*

OMNIA falsa sitim pariunt potioribus: o si
Lectori pariant carmina nostra sitim!

128 *Ad amicum conjugatum.*

IMPERAT ipsa nihil, quidvis tamen impetret uxor;
Utere nec serva conjuge, nec domina.

129 *In Ponticum.*

PONTICE, Comædus vivis? moriere Tragædus:
Diffimilis vitæ mors erit illa tuæ.

130 *In quendam sacerdotem maritum.*

LEVITA patre natus eras, Levitaque factus;
Deque Tribu conjux est tibi sumpta Levi.



131 *In Anabaptistas & hujusmodi farina
fratres.*

OMnia diruitis, nihil ædificatis in orbe :
Zelus hic, an scelus est? fervor hic, an furor est?
Spiritus at vestris etiam prætenditur ausis :
Qualis at hic vester Spiritus est? * Abadon.

* Apoc. c. 9. v. 11.

132 *In Cottam.*

CONDIDIT ex nihilo Deus unicus omnia : contra
Tu facis ex toto, Cotta Chymista, nihil.

133 *D. Thom. Egerton, Cancell. Angl.
& Franciscus Leigh, ejusdem gener.*

SI quis virtuti vere favet, & fovet artes ;
Certatim hoc faciunt hic gener, ille focer :
Egertonus amat Musas, amat & Leus illas ;
Noluit à focero degener esse gener.

Consubstantiatio.

134 *Ad eund. D. Franc. Leigh, & D. Ma-
rinam ejus uxorem, amantissimos conjuges.*

NON eadem est vobis anima, at mens una duobus :
Unum non estis corpus, at una caro.
Nomine diversi vir & uxor, re tamen unum :
Diversi sexus estis, at unus homo.

135 *Funebres Conciones.*

LÆdimus infantes vivos, laudamus eosdem
Defunctos : & mors candida, vita nigra !

136 Pau-



136 Paules Croffe, and the * Croffe
in Cheape.

* *E regione templi D. Petri.*

AUREA cur Petro posita est crux, plumbea Paulo?
Paulinam decorant Aurea verba cruce[m].

137 *Amoris Chronicon.*

TEMPORIS ut minimi momentum crescit in horam;
Et brevis in longam ducitur hora diem;
Multiplicata dies in mensem, mensis in annum:
Sic crescente meus tempore crescit Amor.

138 *Gemini.*

DIFFIMILE in nobis nihil est, paria omnia; solo
Differimus numero: nos duo namque sumus.

Amici.

NOs vix distamus numero, duo nos sumus unum;
Vos estis Gemini corpore; nos animo.

De Arte amandi.

139 *Ad amicum suum, Job.*

NASONIS quamvis teneram perlegerit Artem,
Nescit inexpertus dicere, quid sit Amor.
Natura, non arte docetur; scilicet, in cor
Ex oculis, non ex auribus intrat amor.

140 *Seneca Philosophus.*

PENE tuæ dici possunt Epigrammata Gnomæ;
Præterquam numeris quod tua dicta carent.



141. *Ad D. Henr. Neville, Domini de
Abergevenny filium baredem.*

FALLOR? an in mensa memini te dicere nuper,
Sit tua quod sapido lingua inimica sali?
Manducare salem tibi nil opus, Henrice; quare?
Omne ferè, loquitur quod tua lingua, sal est.

Vita Philippi Sidney.

142. *Ad ejusdem fratrem, D. Rob. Sidney,
Vice-Comitem de Lisle.*

QUI dignos ipsi vita scripsere libellos,
Illorum vitam scribere non opus est;
Sidneii in tumulto est corpus, non vita, Philippi:
Producit vitam gloria longa brevem.

143. *Corpus discedentem Animam
alloquitur.*

TEllurem, te propter; ego, matremque reliqui:
Anima.

Stulta, Deum Patrem, te quoque propter, ego.
Ad Patrem redeo ergo meum, qui me vocat ad se
In cœlum, matri teque relinquo tuæ.
Donec (in instanti cum conveniemus in unum)
Terra mihi reddat te; tibi meque Deus.

Regnum divisum.

144. *Ad D. Georg. Rives, Theologiæ Do-
ctorem doctiss. & prudentiss. virum.*

ORci & Cœlorum regna indivisa: malignus
Nemo habitat cœlum, Tartara nemo bonus:
Proh pudor! in sola regnat divisio terra;
Terra, ubi multimodis sunt bona mista malis.

Ergo



Ergo dies veniet, cum Terra jacebit inanis :
At Cœlum plenum, plenus & Orcus erit.

145 *Aqua calide.*

Expressæ tacitum lacrymæ testantur amorem ;
Gignit amor lacrymas : quis putet ? ignis aquas.

De ingenio & memoria.

146 *In Ponticum.*

Queritur, ingenium quare dicatur acumen
Interius penetrat quicquid, acumen habet.
Officium Mnemes non est penetrare, tenere est ;
Hunc fieri vulgo vasa rotunda vides.
Unde vel ingenium tibi suspicor esse rotundum,
Pontice, vel * Mneme, quod sit acuta tibi.
* *Memoria.*

Solatium pauperum.

147 *Ad amicum divitem.*

Inconstans fortuna breves mutatur in horas :
Nascitur inde mihi spes, metus unde tibi.

148 *De Titio & Gellia.*

Objectum est Titio, sua quod gravidata fuisset
Uxor, apud patrem, Gellia, Sempronium.
Cui Titius; Peperit cum Gellia nostra, quid ad me ?
Filia Sempronii, non mea nupta fuit.

149 *Cor.*

Cur non in dextra potius quam parte sinistra
Ponitur humanum cor ? quia læva sapit.



Caro & Spiritus.

150 *Ad amicum suum, D. Rob. Newman,
Doctorem Theol.*

CORPUS primo, animam facta jam carne creavit,
Cætera fecisset cum facienda, Deus.
Fallor? an hinc parere animabus inertia nolunt
Corpora, sint animis quod seniores suis,

151 *Proto-Martyres, Innocentes.*

PRO Christo pueri sunt passi extrema, priusquam
Christus pro pueris ultima passus erat.

152 *Ad amicum suum D. Joan. Hoskins,
Juriscons.*

CLAUDIT amicitiam numerus plerumque Dualis;
Vix in Pluralem multiplicatur amor.

153 *Ad amicum senescentem.*

TU nuper juvenis fueras, ego dum puer essem;
Quæ me nunc juvenem, te videt horum senem.
Exspectat mors ergo brevi te, meque senectus;
Sors incerta licet sit mea, certa tua est.

154 *In A. G.*

NOMEN habes hominis faciemque, animalis acumen;
In Specie stultus, doctus at in Genere.

Harmonia.

155 *Ad Theologos.*

HARMONIAS varij scripsere Evangeliorum;
Harmoniarum quis? non minor iste labor.

156 *Dissonantia.*

Tanta per humanas replet contentio mentes,
 Ut, quid pax animæ sit, prope nemo sciat.
 Ille nimis Bassum premit, hic nimis elevat Altum;
 Ut vix auditus sit Tenor, aut Medius.

157 *Ad Pontilianum.*

Zelotypus conjux es, Pontiliane? sapisti:
 Zelotypus non es, Pontiliane? sapis.
 Frustra observatur conjux: ea sola maritum,
 Quæ (quamvis possit) fallere nolit, amat.

158 *In Porciam.*

Filia sis dubito Tenebrarum, an filia Lucis;
 Nam genita es noctu, Porcia, nata diu.

*Epitome Historiarum sui temporis.*159 *Ad Marianum.*

Pejores patribus sumus, ut majoribus illi;
 In vitium faciles nam, Mariane, sumus.
 Natio si nobis fuerit quoque postera pejor:
 Pejus erit nostra posteritate nihil.

*Londinum.*160 *Ad cognatum suum, D. Jo. Williams,
 Aurificem Londinensem.*

Imbibit ut fontes Tamesis fluviosque minores;
 Oppida Londinum pauperiora vorat.
 Perpetuo quanquam Tamesis petit æquora fluxu.
 Londini constans urbis amicus hic est.



Debitor & Creditor.

161 *Ad amicum suum, D. Guil. Cawley,
Mercatorem Londinensem.*

SInt nostro licet in libro tua nomina: tu scis
Me nullum in libris nomen habere tuis.
Nil equidem tibi præter amorem debéo: semper
Debitor, atque idem Creditor hujus ero.

162 *Moriones & Nani.*

Nos, quanquam vitio sumus haud virtute notati,
Magnatum lufus deliciæque sumus.

163 *Ad Pontilianum.*

Semper sollicitus fuit Irus: cur? quia pauper:
Nec tu Cræse minus: cur? quia dives eras.
Uxorem quod non habeat, cruciatur Alanus:
Uxorem quod habes; Pontiliane doles.

Unio.

164 *Ad Britannos conjuges.*

Servat ab interitu Deus unus, & unio mundum:
Conjugium in terris unio prima fuit.

165 *Bellum Elementare.*

Condiderit quamvis hominum Deus omnia causa,
Bella tamen contra nos Elementa gerunt.
Quam multas Aër animas demisit in orcum
Pestifer, ac letho res hominesque dedit?
Quam prope Trojanum Londini sensimus ignem?
Incipit & fructus terra negare parens.

Fit



Fit melior nemo, cælum noctesque diesque
 Cum fleat, ac tellus crimina nostra luat :
 Terra licet madidis mollescat ab imbribus, haud sit
 Mollius Anglorum, quam fuit ante, genus.

Epithalamium.

166 *Ad Tulliam.*

O Bjectum nostri, dum lux est, Tullia, visus :
 Subjectum, cum nox venit, Amoris eris.

167 *In Sextum, Academicum.*

UT tibi sternendi possis meminisse sepulcri ;
 Te lectum perhibent sternere, Sexte, tuum.
 Ut possis etiam memorare novissima mortis,
 Cur non in somnum sæpius ergo ruis ?

168 *Ad Amatam.*

TE mihi notam amo nunc, ignotam nuper amabam ;
 Fama prius cepit me tua ; forma capit.
 Jam scio quid sit amor ; amo quamvis non amer ; imo
 Jam scio quid sit amo, nescio quid sit amor.


169 *Un Cadet. A jonger brother.*

SUM pauper ? non culpa mea est, sed culpa parentum ;
 Qui me fratre meo non genere prius.

Firmamentum.

170 *Ad amicum, D. Michaëlem Heyden.*

TERRA stat ; in tellure animantia stante moventur :
 Astra sed in cœlo fixa movente manent.



171

B. Virgo.

Virgo Beata licet communi voce voceris;
 In mulieribus es tu Benedicta magis.
 Nil mihi prodesse, si tantum Virgo fuisses;
 Quantum at profueras, ô, quia Mater eras?

172

Spes & Fides.

Nulla foret, nisi certa Fides foret, unaque semper.
 At si certa foret Spes mea, nulla foret.

*Novatismus.**New factions and fashions.*

173 *Ad amicum suum, D. Guil. Pryther-*
chum, J. C. Doctorem & Theol.

Multa renascentur, quæ jam cecidere, cadentque
 Dogmata, quæ summo nunc in honore vigent.
 Quæ nova sunt, hodieque placent, non usque placebunt:
 Cur ita? quæ nova sunt, non nova semper erunt.

174

Speculum Marci.

Semper adest quare tibi morio, Marce? tuam isto
 Stultitiam in fatuo cernis, ut in speculo.

175

Ad Uxorium.

Sæpe quiescit ager, non semper arandus: at uxor
 Est ager, assiduo vult tamen illa coli.

176

Ad amicum suum, J. O. B.

Preteritis-plusquam-perfectis quatuor annis
 In te radices acrius egit amor.



Frustra igitur transferre tuum conaris amorem ;
Arbor adulta amor est , non nova planta , tuus.

177 *In Porphyrium.*

FLEsse bis , at nunquam legitur risisse Redemptor ;
Cur hominis proprium risibile ergo vocas ?

178 *Ad Pontilianum.*

UT cæcus , puero duce , vel muliere , per urbem
Ducitur , ignotas itque reditque vias :
Ducit amatorem sinuosa per avia cæcum
Te Venus aut Veneris , Pontiliane , puer.

Amor omni exceptione major.

179 *Ad amicum quendam.*

CAUSA recens veterem licet interpellet amorem ,
Simque licet , dicta non nisi lege , Tuus :
In te nulla meo est exceptio major amore ,
Excepto , si me non ; ut ameris , amas,

180 *In Ponticum sexagenarium.*

QUI , dum vixisti , nulli benefeceris unquam ,
Incipies fieri , Pontice , quando pius ?
Omnia pauperibus , dicis , post fata relinquam :
Qui post fata sapit , Pontice , sero sapit.

181 *In Nigellam candidatam.*

RAra avis in terris , alboque simillima cygno es :
Est tibi vestis enim candida , nigra caro.

182 *Le Carneval de la vie.*

MENS immortalis mortem cur corporis horret ?
An cum carne timet se moriente mori ?

An .



An sibi jam restare nihil post funera, præter
 Supplicium longum, iudiciumque brevè?
 Suspicio facit hæc mentes in morte trementes;
 Nec mæstum carni dicere posse Vale.

183 *Quintina laus.*

SI te laudarem, Quintina, superbior esses:
 Te laudare equidem nolo, superba fat es.

184 *Filius Terra.*

Cælum ad nos spectat, cælum spectemus oportet:
 Nam Deus astra dedit cælo, oculosque tibi.
 Vix tibi pars teretis terræ millena videtur:
 Cælum dimidia cernere parte licet.
 Cur igitur cælo terram, stultissime, præfers?
 Ut mos est, matrem plus patre forsan amas.

185 *Species infima.*

SI licet humanum genus inter cætera summum;
 Jure tamen species infima dictus homo.
 In Cælo minima est hominum pars, maxima in Orco:
 Humanum infelix quis neget ergo genus?

186 *De invidia, paradoxon.*

SI plus virtutis foret, invidiæ minus esset:
 Quo virtutis enim plus, vitii minus est.

Jacobus * Sextus Scotiæ, * Primus Bri-
 tanniæ Rex; Bonum omen.

187 *Ad Britanniam.*

SÆpe quod optatum, speratum vix fuit olim,
 Accidit hoc inter spemque metumque tibi.



Lucrosus cecidit tibi, * Senio & * Unio, iactus;

Fausstaque fortunæ est alea iacta tuæ.

* *Sice, Ace, te best chance of the Dice.*

Cor unum, via una.

188 *Ad Jacobum Primum, Regem
Britannia Magna, &c.*

Bis manibus duo sceptras geris; linguasque loquuntur
Quatuor imperii sub ditione tui.

Lingua Britannorum quamvis non una, cor unum est,
Unio Regnorum sit modo facta trium.

Primus in orbe hominum divisit pectora Dæmon:

Divisit linguas primus in orbe Deus.

189 *Reges & Propheta.*

Rex extra patriam, vel maximus, haud habet ullum
Imperium: in patria, nemo Propheta fidem.

Virtus.

190 *Ad Illustriss. D. Henricum Davers,
Baronem à Dantesay.*

Virtutem Genii duo semper in orbe sequuntur;
Hic bonus, ille malus; Gloria & Invidia.

191 *Invidia.*

Ivor edax hominum vivorum encomia carpit:
Ut defunctorum corpora vermis edit.

192 *In Battum.*

Pauca tibi semper respondeo multa roganti;
Non quia multa rogas, sed quia stulta rogas.

193 *Som-*



193

Somnus, Mors.

IN somnis quanquam simulo pro tempore mortem ;
 Non est pars vitæ dulcior ulla mez.
 Permirum est in morte igitur, quid tam sit amarum,
 Tam dulcis cum sit mortis imago, sopor.

194

Curia facultatum.

Jurisconsultum dignantur adire Clientes ;
 Cur, nisi divitias quod bona summa putant ?
 Accersit Medicum, cum lecto affigitur, æger :
 Corporis est hominum cura secunda salus :
 Theiologus, quamprimum accersere debuit, ægro
 Ultimus, & quanquam nemo vocavit, adest.

195

Patientia amatoria.

Vis voto potiaris amans ? patiaris oportet ;
 Si vis in dulci vivere pace, pati.

196 *In quendam Grammaticastrum.*

Grammaticus bonus es, nil præter grammata nosti ;
 Scis præter literas nil ; literatus homo es.

197

Ad quendam gloriosam.

UXori similis Menelai sis, vel Ulyssis,
 Si cupis à fera posteritate coli.
 Vivit enim vitium post funera, non modo virtus :
 Vivit adhuc Helene, non modo Penelope.

198

In Aulum.

Veriloqui fatui dicenda tacenda loquuntur :
 At quia prudentes plura tacenda vident.



Servorum ingeniis nihil audens credere, semper
Circum se fatuos quatuor Aulus habet.

Aurum ex stercore.

199 *Ad amicum suum, D. Dom. Tr.
Medicum.*

Aurum Virgilius de stercore colligit Eani :
Fecit Virgilius, quod facit & Medicus.

200 *Secretum amoris.*

Rarus amatur amans : ut ameris, amabilis este
Omnibus : à nulla vis ut ameris ? ama.

Mon tout.

201 *Ad Marciam Franco-Gallam.*

Omne tuum me sæpe vocas ; at, Marcia, falso :
Omne tuum non sum ; sum tuus omnis ego.

202 *De Quinto & Oro.*

Papistam Quintus nuper se reddidit ; & se
Denique Papistam jam profitetur Orus.
At quam diversis victi rationibus ? illi,
Hæc ætate fides ; huic, novitate placet.

203 *Filium Ariadnes.*

RExit ut errantis Thesei vestigia filum
Virginis ; humanum sic genus una fides.

De Testamentis & Votis.

204 *Ad D. Henr. Martin. D. U. J.*

IN Testamentis semper postrema voluntas
Obtinet : in votis, si bona, prima valent.

Omni-



Omnipotens, uno cum fecerit omnia voto,
Testamenta Deus condidit ipse duo.

205 *Ad amicuni avarum.*

SOLus habet quod avarus habet; nil donat amico:
Nil sibi dat; solus non habet hoc, quod habet.

206 *Ad Ponticum, J. C.*

UXori partem vivis, partemque clienti,
Ætatis; vives, Pontice, quando tibi?

De Prædicatoribus & Histrionibus.

207 *Ad D. Ed. Hobby, Equitem doctiss.*

PRæco Heracliti partes agit, omnia flentis;
Ridentis partes Histrionem Democriti.
Huic videor stultissimus esse, miserrimus illi:
Hic numerat culpas, ponderat ille meas.

208 *Christmasse and Midsommer.*

VENit Joannes æstivo tempore; Christus
Brumali: hic ignem prædicat, alter aquam.
Quam bene conveniunt contraria flumina * flammis:
Ignis peccatum purgat, & unda lavat.
* Duo Baptismi, Joannis & Christi.

209 *Nemo leditur, nisi à seipso.*

CRiminis est nemo, nemo discriminis experts:
Nos in discrimen crimina nempe vocant.

In quendam maledicum.

210 *A balling Assè.*

NON ego te quemvis asinum voco, Mome; sed illum,
Cujus erat fessor Pseudo-propheta Balam;

Non



Non illum, Solyman Dominum qui vexit in urbem;
Mutus hic, & mitis nam fuit; ille loquax.

211 *De suis heredibus, ad Jurisconsultos.*

Nemo sua certus de conjuge, præter Adamum;
Deque suo nemo conjuge, præter Evam:
Conjugibus, misero præsertim (in amore) marito,
Solati superest quid, nisi sola fides?

212 A hollow tooth.

Injectum flammis, me non absumeret ignis;
Sæpe cadentis aquæ parvula gutta cavat.

Virtutis laus.

213 *Ad D. Thomam Puckering, summa
spei adolescentem.*

Solis ut, in solo motu, constantia constat;
Constans virtutis vis in agendo sita est.

214 *Æsopi lingua.*

Humanum membrum non est in corpore lingua
Nobiliusve bona, mobiliusve mala.

215 *Ad pueros Collegii Wintoniensis
Wicbamici.*

Non sum quod fueram: festivus eram puer olim;
Festorum valde nam studiosus eram.

Sapientia duce, comite Fortuna.

216 *In Ancum.*

Quod male consultum, cecidit feliciter: Ancus
Arguitur sapiens, qui modo stultus erat.

K

Quod



Quod prudenter erat provisum, si male vortat,
Ipse Cato (populo iudice) stultus erit.

217

Dolor.

Sola dolenda reor presentia damna: dolemus
Præterita heu nimium sere, futura cito.

218

Vicissitudo.

Gaudia post luctus veniunt, post gaudia luctus:
Semper in ambiguo (speve metuve) sumus.

219

Ad Germanicum.

Auxit amicorum numerum tibi Porcia conjux,
Fertilitas hæc est conjugis una tuæ.
Hæc est conjugii, Germanice, maxima virtus;
Gignit amicitias uxor amica novas.

Nequitia armata.

220

In Linum.

UT bona vina bonum faciunt (ut fertur) acetum;
Ingeniosior es quo, Line, pejor eo es.

221

Opiniaster.

HEu quantum in terris dominatur opinio? verum
Me nescire putas, & dubitare vetas.
Qui dubitat, non errat; adhuc in utrumque paratus;
Error opinando, non dubitando venit.

222 *Alma mater Academia Oxonia.*

TU nostri mater, mater Natura cerebri:
Dura sed illa fuit; tu pia mater eras.

223 *Poëta.*

223 *Poëta.*

MEccœnas non verba dabat, sed præmia doctis :

Magnas.

Quid dare mi, præter verba, Poëta potest ?

224 *Homo homini Deus.*

ESt homo, qui locuples inopi nil donat amico ;
Qui rapit, hic lupus est ; qui dabit, ille Deus.

225 *Homerus.*

SI vera est de te quæ fertur fabula, nunquam.
Vidisti lucem ; sed tua scripta vident.

226 *The ghostly fathers.*

Integra Causidico narranda est causâ perito,
Et medico morbus, crimina Theiologo.
Qui vis fortunas, animam, corpusque tueri,
His tribus in vita dissimulato nihil.

227 *Ad D. C. G.*

TE podagra & podagræ pestis contraria vexant ;
Currere te conjux, stare podagra facit.

228 *Ubiquetarii.*

TOta patet tellus inopi, quacunque vagatur :
Pauper in exilio est nullibi ; ubique domi.

229 *Amantes.*

Est amor in nobis, in lignis ut latet ignis ;
Ignis uti lighum, nos levis urit amor :

K'2

Ligua



Ligna sed in cineres vanescunt, ignis in auras:
Nos cinis; & noster, quid nisi fumus, Amor?

230

Sermo.

Sermo voluptati similis, similisque dolori est:
Longus enim levis est sermo, gravisque brevis.

231

In mulierosum senem.

ÆTas commendat Bacchum, Veneremque juventus:
Hæc igitur juveni convenit; ille seni.

232

In Harpalum, avarum juvenem.

Mundus amica tua est, misere quem diligis unum,
Harpale, sis juvenis tu licet, ille senex.

233

Ad Lectorem.

Qui scribit, laudatur ab his, culpatur ab illis:
Lectoris vultu statque caditque sui.
Semper agit causam, nec tempore transiget ullo:
Semper enim sub te iudice, Lector, erit.

234

De speculo, amatori à sponsa donato.

IN quo me videam, speculum mihi, Paula, dedisti:
In quo te possim cernere, malo dares.

235

In Quintiam Hypocritam.

Dosta, decens, juvenis, formosa, pudica, benigna,
Quintia; si non sis ambitiosa, bona es.

236

Problema.

Moribus adversum sibi prodigus odit avarum:
Cur igitur largos parcus avarus amat?

237 Som-

237 *Somnus, Venus.*

VO^s confanguineas lethi dicamne sorores,
 Somne quies hominum, deliciæque Venus?
 Indulgere juvat Veneri somnoque jacentes:
 Sternitur & dulci lectus utrique malo.
 Odit somnus iners, odit Venus improba, lucem;
 Est animi somnus Mors, animæque Venus.

238 *Passe-time.*

Longa dies ignavo homini nox longa videtur,
 Et longi menses, longior annus abit.
 Tempus inutiliter terimus, dum longa videntur
 Tempora: cur vitam dicimus ergo brevem?

239 *Fiscus.*

UT visco capiuntur aves; (Fiscus quasi Viscus
 Dicitur) à fisco sic capiuntur opes.

240 *In Ponticum, Philautum.*

Non cernit se mens, oculus se non videt: ergo
 Pontice, te quod amas, qua ratione facis?

241 *Scrutinium.*

O Utinam, quod Discipulos tu Chrifte rogasti,
 Presbyter & Princeps, plebsque rogaret idem.
 * Quid de me dicunt homines, si sæpe rogaret
 Quisque, malum sciret se, meliorque foret.
 * *Marc. c. 9. v. 28.*

*Lumen Gratiae.*242 *Ad Amicum suum, D. Joan. Tovey.*

Luna suam complet solari lumine sphaeram;
 Mens ut ab aeterno Numine lumen habet.

K 3 243 *Fa-*



243

Fama. Error.

Rumor rumores, errores parturit error;
Ut nivis exiguus crescit eundo globus.

Traditio historica de Rege Bruto.

244 *Ad amicum suum, D. Gail.
Camdenum.*

Comburi possunt libri, monumenta perire;
Nostra mori possunt, & tua scripta mori:
Infita sed genti, dum gens erit ipsa superstes,
Traditio vivæ vim quasi vocis habet.

245 *Ad D. Rogerum Owen, J. C.
Equitem literatissimum*

Antiquas Britonum leges, nova juraque calles:
Quicquid & in tota discitur Historia.
Sermonem instituas de re quacunque, videtur
Viva, Rogere, tuum Bibliotheca caput.

246

In Avarum.

Quo miser annorum victum tibi mille parasti:
Annorum centum nec tibi vita datur.
Immensosque tibi nummorum cogis acervos,
Quæris & in vita gaudia longa brevi.
Olim dives ero parce si vixero, dicis;
Et cur non, olim mortuus, inquis, ero?

247

Pes in sepulchro.

Pendentes agimus vitas in littore mortis:
Tam prope mors vitæ est, quam prope margo mari:
Una fere res est homini Mors Vitaque, sicut
Efficiunt unum Terraque & Unda globum.

248 *Mer-*

248 *Mercurius Britannicus.*

Optima descripsit Morus, tu pessima mundi:
Tu nobis narras vera: sed ille bona.

249 *De seipso.*

Sunt quidam, qui me dicunt non esse Poëtam,
Et verum dicunt, Cur? quia vera loquor.

250 *Ad D. Guiliel. Butler, Cantabrigien-
sem, nostra ætatis Æsculapium.*

Posthabita quærant alii sua lucra salute:
Spernis dulce lucrum tu, tua cura, Salus.
Te medico, amissam desperat nemo salutem,
Inventum tanquam si Medicina tuum.
De te vera loquor, non, ut solet æger, adolor:
Non tibi ab infano laus, Gulielme, venit.

III-husbandrie.

251 *Ad Paulum, Jurisconsultum.*

Cur viduam Jus, Paule, vocat commune relictam?
Vox hodie nuptis convenit illa magis.
Nil opus uxori mortem expectare mariti,
Cumbat ut in tristi semi-supina toro.

252 *Ultimum Divortium.*

Si forte in cælum vir fumitur, uxor in orcum,
Aut contra; non sunt amplius Una Caro.

253 *The worlds dungeon.*

Carceris est instar Tellus, quasi mœnia Cælum,
Custos peccatum; Vincula quæ? Mulier.



254

Legum Nullitas.

C^Ondidimus leges quam multas? quam prope nullas?

Nam si servatur nulla, quid ulla valet?

Ut leges servantur, adhuc lex unica fiat:

Hæc cito facta foret lex, cito fracta foret.

255

De statu hominum.

D^Eprimitur nisi pes alter, non tollitur alter:

Sic casu alterius tollitur alter homo.

256

Ad quendam.

D^Octor es incipiens; nunc incipe Doctior esse.

Præter mulieres, & pueros.

257 *Ad D. Jo. Harrington. Equit. literatiss.*

P^Erlege divinæ sinuosa volumina Legis.

* In nullo numero sunt Puer & Mulier.

Civili Puer & Mulier prohibentur ab homini

Munere; non Mulier, non gerit arma Puer,

Utuntur longa tunica Mulierque Puerque:

Imberbes pariter sunt Puer & Mulier.

Fertur & in teneros Puer & cito Fœmina fletus;

Blanditiis Mulier decipiturque Puer.

Cogitis in quantos hominum genus omne furores,

Tu Venus, ô Mulier, tuque Cupido Puer.

* *Matth. cap. 14. v. 21.*

Cereus Nasus.

258 *Ad Cogn. suum, D. Rich. Meredith.*

Theol.

P^Romittat nobis aliquid sacra pagina? nostrum

Protinus hoc certa credimus esse fide.

Exi-



Exigit à nobis aliquid sacra littera ? durus
Sub nostram sermo non cadit iste fidem.

259

Scala Caeli.

Vide ep. I.	S	ad Cor.
cap. 13.	A	v. 8. 13
S	T	
E	I	S
D	R	E
I	A	P
F	C	S

IN Cœlum gradibus virtutum maxima septem ;
Quatuor ascendit Spes bona , quinque Fides.
Spes Lunam , Solemque Fides contingit : Amoris
Scala vel ad summum pertinet usque polum.

260

In Battum.

UTatur mens lingua interprete ; Cor prius ergo
Definat , incipiat quam tua lingua loqui.
Nempe interpretis est locus in sermone secundus ;
Raraque Legato verba loquente facit.

Laus Asini.

261 *Nolite fieri sicut equus & mulus ,
quibus non est intellectus.*

CUr asinum non iunxit equo , muloque Propheta ?
Vesturus natum Davidis ille fuit.

262

Aulicorum par impar.

NOn bene conveniunt , at in una sede morantur ,
Momus vituperans omnia , Gnatho nihil.

K 5

Quatuor



Quatuor hominis causæ.

263 *Ad nobiliss. & maximæ spei adolesc.
D. Ric. Sackville, Com. Dorcestria
ex filio nepotem.*

Forma quid est hominis, nisi mens mala, vana voluntas ?
Principium quodnam Materiale ? Nihil.
Materiam cum Forma igitur ne suspice ; solus
Finis , & Efficiens respiciendus erit.

264 *Ultima Linea.*

Ultimus est vitæ mors actus amara jocose :
Cujus vita fuit seria , mors jocus est.

265 *In obitum reverendiss. R. Vaghan,
Episcopi Londinensis.*

Qui te viventem laudavi nuper abunde ,
Te ratus eximiis laudibus esse parem ;
Heu cur defunctum te prædico parcius ? auxit
Lætitia ingenium ; diminuitque dolor :
Dum plures pro te lacrymas quam carmina fundo ,
Confundunt lacrymis se mea verba : Vale.

266 *De Vita & Morte*

Una via est vitæ , moriendi mille figuræ ;
Est bene : nam mors est res bona , vita mala.

267 *In Paulum decrepitum edificatorem.*

In quibus haud vivas , moriaris at in quibus , ædes ,
Paule , struis ; tumultum nescius anne domum.

268 *In*



268 *In Sextum, pradonem prodigum.*

MUnificum largitorem te, Sexte, fatemur;
Qui, tua ne tantum des, aliena rapis.

269 *In Zoilum.*

DEfuncto parces; viventem, Zoile, carpes:
Non ego propterea mortuus esse velim.

270 A paire of Royall friends.

Ad { *Anglo-Scoto-*
 { *Scoto-Cambro-* } *Britannos.*
 { *Cambro-Anglo-*

HOc in Amicitia mihi par Regale videtur,
Tres inter quoties existit unus amor;
Scilicet, ut gemino sit par in amore tuorum,
Unusquisque trium bis numerandus erit.

271 *Regnum divisum.*

IN mundo nihil usque potest consistere: Mundus
Non semper stabit: cur? quia dividitur.

Annulus Concordiæ.


272 *Ad Britannos. 1607.*

SCotia fert Gemmam; gens Anglica conferat aurum:
Annulus hinc fiat; Rexque sit ipse faber.
Excitet Europæ nova nos concordia: ne, dum
Cuditur à fabris annulus, Annus eat.

273 *Britannia.*

SIcut eras in principio, sic nunc es, & esto
Usque in seclorum secula semper, Amen.

Ste-



Steganographia.

274 *Ad Lectorem curiosum.*

Cur sint obscuro sensu mea carmina, quæris,
Utiliter nequeant quæ sine clave legi?
Est Epigrammatici non esse Polygraphon: ergo
Conveniens illi est, esse Steganographon.

275 *Unus Deus.*

Unus cunctorum pater indubitatus Adamus;
Nec possunt plures patribus esse Dii.

276 *Ad nobilissimam ac illustrissimam
Dominam Arbellam Stuart.*

Si foret in nudis virtus aut gloria verbis;
In laudes facerem carmina mille tuas.
Nobilitare potest nostram tua gloria Musam;
At tibi Musa potest addere nostra nihil.

FINIS.



MONOSTICHA

quædam

ETHICA & POLITICA

veterum Sapientum.

SEN-



SENTENTIA

Ad Lectorem.

Disticha nostra legant pueri, castæque puellæ:
 Continet obscænos fabula nulla jocos.

1 *Quod Christianos non decet esse leves.*

Cur gravibus texam quæris mea disticha verbis?
 Cultores Christi non decet esse leves.

2 *In tribulatione virtus, ut aurum in igne, perficitur.*

Quod fornax auro facit, hoc tribulatio iustis:
 Rebus in adversis certa probanda fides.

3 *Veri amoris nullus est finis.*

Nunquam vera fuit charitas, quæ desiit esse:
 Nam nullus veri finis amoris erit.

4 *Obscæna fabula à pueris vitanda.*

Inficit obscæni puerorum carminis aures
 Fabula: dum vatum quæritur ipse nitor.

5 *Mala durant, quæ teneris mentibus discuntur.*

Heu male diluitur, teneris quod mentibus hæsit:
 Præsertim durant quæ didicere mala.

6 *Omnes sunt felices, ubi omnes amici.*

Quam felix, & quanta foret respublica, cives
 Si cunctos unus conciliaffet amor.

7 Nil



7 *Nil sine spe pramii fit.*

EST labor ingratus, quem debita præmia fallunt :
Quid grave non fiet spe sine, si leve sit ?

8 *Animum dantis Deus, non donum
considerat.*

NON quantum dederis, sed quanta mente dedisti,
Pensandum est : placet victima parva Deum.

9 *Recta Conscientia dat verum gaudium.*

GAUDIA vera dabit mens omnis criminis expers ;
Heu mihi quam pauci gaudia vera ferent !

10 *Sola virtus beatos efficit.*

ONIA cum pereant, est virtus sola perennis :
Hæc immortales reddere sola potest.

11 *Nemo confidat in divitiis suis.*

QUID tibi, si gemmas omnes cumularis & aurum ;
Si tua tartareis mens cruciatur aquis ?

12 *Utendum est florida ætate.*

SI mora nulla datur vitæ labentibus horis,
Cur ita cum longo turba sopore jacet ?

13 *Mors est inevitabilis.*

QUI subito palles, audito nomine mortis,
An tibi res nova mors ? unde repente metus ?

14 *Quando*



14 *Quando mors sit optima.*

Optima tunc mors est, cum vita est criminis expert:
Mors felix, vita est cum tibi cara magis.

15 *Post gaudium vitæ venit luctus mortis.*

Quid latere miser? nescis post gaudia vitæ
Perpetuos luctus mortis adesse tibi?

16 *Non Deus est author culpæ, sed pena.*

Non Deus est author culpæ, sed criminis ultor:
Pro meritis justis præmia justa dabit.

17 *Omnia divitibus licent.*

Quam reus est dives prætorem nactus avarum,
Quid non sperabit posse licere sibi?

18 *Forma caduca mali persæpe causa.*

Quid fidis formæ, populat quam morbus & ætas?
Multis causâ mali candida forma fuit.

19 *Uxor bona & non pulchra habenda.*

Sit formosa alliis uxor, tibi sit bona: nescis
Quam noceat castæ forma pudicitæ.

20 *Difficile est custodire formosas.*

Ægre formosam poteris servare puellam,
Nunc prece, nunc auro forma petita ruit.

21 *De infelici patria.*

Infelix patria est, pueros ubi purpura vestit;
Atque ubi præcedit dives honore bonos.

22 *Ille*



22 *Illa patria est felix, ubi juventus
assuescit modicis cibis.*

Illa domus felix, ubi parvo assueta juventus,
Inque foco coctum luxuriatur olus.

23 *De falsis gaudiis.*

Quæ durare putas mortalis gaudia vitæ,
Sunt breviora, & finis tristis amoris erit.

24 *De veris gaudiis.*

Una salus servire Deo est: hæc gaudia sola
Vera putes: quorum gloria finis erit.

25 *Judex & censor omni careat peccato.*

Aspiciat lucem, qui vult damnare tenebras,
Qui carpit mores, sit sine labe prius.

Cor Deus injusti nebulis obnubilat atris,
Exiit. & formam; sitque repente fera.

26 *Aliena magis quam nostra vitia
cernimus.*

Cur aliena magis quam crimina nostra videmus:
An quia nostra procul sunt, aliena prope?

27 *De avaro.*


Nusquam fraude caret, semper mentitur avarus,
Erga inopes surdus ferrea corda gerit.

28 *De gloria.*

Gloria si dulcis, studeas virtute parare:
Quo labor est major, gloria major erit.

L

29 *Nec*



29 *Nec citò nec temerè judicandum.*

Judicium præceps infani judicis index,
Omnia nec longis discutienda moris.

30 *Ad magna præmia magno labore
venitur.*

Si te delectant æternæ præmia vitæ
Magna quidem, nec te terreat ergo labor.

31 *Qui bene vixit, non timet mortem.*

Qui bene præteritos sine labe peregerit annos,
Non horret mortis vulnera dira pati.

32 *Erudiendi pueri in tenera ætate.*

Dum tenera est ætas, generosos imbue mores,
Tunc facile est cunctis artibus ingenium.

33 *Mors malorum pessima, bonorum felix.*

Formidanda malis sequitur quam poena perennis;
At contra felix mors solet esse bonis.


34 *Modicis cibus natura contenta.*

Esse cupis frugi? facile est, nam panis & undæ
Prædives dapibus quilibet esse potest.

35 *Omnia pro vitâ æterna sunt hic
toleranda.*

Si quanta æternæ sunt vitæ præmia volvis,
Omnia pro Christo perpetiere libens.

36 *Que*



36 *Quæ sint veræ divitiæ.*

Divitiæ non sunt argenti pondus & aurum,
Virtutes veras accipe divitiæ.
Virtus post funera vivit.



37 *Victrix fortuna sapientia.*

Si fueris sapiens, Cræsi superaveris aurum:
Nam sapiens nullo tempore vixit inops.

38 *Ad Petrum.*

Te miserum dicis, fateor, sine crimine quenquam
Non vidi miserum: tu miser ergo, Petre, es.

39 *Omnia patienter ferenda, ut ex voluntate Dei procedentia.*

Quod tibi contigerit, patienter ferre memento:
Nam certum, fieri numine cuncta Dei.

40 *Mens bona nunquam timet, mala semper.*


Conscia mens recti nullo commota pavore est:
Ut mala mens semper sollicitata pavet.

41 *De Veneratione parentum.*

Qui cupis esse senex, caros venerare parentes:
Quæ patri facies, filius illa tibi.

42 *Contra mercatores rerum terrarum
Epigramma.*

Per mare, per terras mercator queritat aurum;
Sic cæli æternas, stulte, relinquis opes.



43

In Parasitos.

Qui focius mensæ est, verum ne reris amicum?
Tolle epulas, nosces quam tibi fidus erat.

44 *Contra tardanteis bene operari.*

Cras, inquis, faciam; concessaque labitur hora:
Fac hodie; fugit hæc non reditura dies.

45 *Qui meminit mortis & inferni, facile à vitiis abstinebit.*

Is facile exstinguet veneris flagrantia tela,
Qui timet infernum, qui Phlegethontis aquas.

46 *Ad Simonem Canusianum.*

Te dare promittis, nec das mihi munera, Simon:
Nil tibi debebo, si mihi tarda dabis.

47 *Bis dat qui cito dat.*

Munera des lætus: corrumpunt tædia donum:
In quo censendum est, quid nisi dantis amor?


48 *Qui cito & temere promittit, nusquam servat fidem.*

Qui cito, qui temere spondet, se multa daturum,
Quæ male promisit, turpius illa negat.

49 *Negare in principio, est dare beneficium, si bene negetur.*

Qui cito vel belle negat, is tribuisse videtur
Munera: nam semper est odiosa mora.

50 *Cui*



50 *Cui plus Deus dederit, plura requiret.*

Cui bona multa Deus concessit, plura requiret,
Ni dispensarit quas bene cepit opes.

51 *Iustitia & Caritas sunt armatura
Principum.*

Iustitia & Caritas, dilecti Principis artes :
Hæc sunt arma, quibus nulla nocere queunt.

52 *Qui dat inopi sua, nunquam erit pauper.*

Qui bene divitias inopi donabit amico,
Hic omni felix tempore dives erit.

53 *Pueri & juvenes non debent maledi-
cere senibus.*

NE sæva in canos juvenis convitia fundas ;
Sed subito assurgas prætereunte sene.

54 *A prima ætate sunt docendi pueri.*


Vera tuis ut sit si vis sapientia carnis,
Cum primo hanc sitiens ebibe lacte prius.

55 *Unde Senatus dictus.*

A Senibus prisca sumtum dixere Senatum :
Est robur juvenum, consiliumque senum.

56 *De senum prudentia.*

A Sene consilium, quæras : prudentia rerum
Est illis, sine qua curia quæque perit.



57 *Signum ruinae, gubernatio juvenum.*

URbes, regna, domos, juvenum quas rexit ardor,
Sint quaquam fortes, certa ruina manet.

58 *Qui cito credit, cito perit, nec non
levis est corde.*

QUI cito crediderit, fallitur sæpe, levisque
Est cordis; raro fallitur ipse senex.

59 *Quid sit, lex & justitia.*

VIS legis, prohibere malum est, permittere honestum:
Justitia est, semper jus dare cuique suum.

60 *Injustitia ruina urbium.*

NIL injustitia miseræ est infestius urbi:
Funditus hæc muros perdit, & illa domus.

61 *In Cælo vera amicitia.*

SI nihil in terra casto perhibetur amore
Dulcius, in Cælis qualis amicitia?

62 *Senectus bonis jucunda est, malis
vero morosa.*

QUæ caruit vitiis, dulcis solet esse senectus:
Contra morosa est, quæ vitiosa fuit.

63 *Utilius est unum ac sæpe librum legere,
quam multos accumulare.*

EGregios cumulare libros præclara supellex;
Ast unum utilius volvere sæpe librum.

64 *Nil*



64 *Nil sine amicis jucundum.*

Quid tibi jucundum submotis esse amicis?
 Cuncta tibi quanquam sint cumulata bona.
 Alter-ego est verus multumque probatus amicus,
 Quo nobis debet curius esse nihil.

65 *Amici prius eligendi, electi
 semper retinendi.*

Non temere admittas, nisi fidum noris, amicum;
 Sed semel admissus semper habendus erit.

66 *Scire mori est honos mortis.*

Mortis honos est scire mori, vitæque beatæ
 Exitus est, testis qui sine labe fuit.

67 *Quid sit dives.*

Non est, crede mihi, multos qui possidet agros,
 Dives: sed dives, cui satis unus ager.

68 *Liberalis.*

Quas inopi & dulci lætus donabis amico,
 Temporibus nullis eripientur opes.

69 *Ægroti non curantur à pluribus.*

Nunquam, crede mihi, à morbo curabitur æger,
 Si multis medicis creditur una febris.

70 *Quomodo dives & felix fias.*

Vis fieri dives? Christi mandata sequaris:
 Diminuasque animi gaudia nota tui.



71 *Amici divitium sunt falsi amici.*

Quem tibi divitiarum peperere, est falsus amicus :
Argentum, non te, diligit ille tuum.

72 *Quales principes, tales populi.*

Si studia & mores populi cognoscere curas ;
Res facilis : vitam Principis inspicies.

73 *In adulatorem.*

Blandus adulator Regum certissima pestis :
Hæc gaudet sanctos perdere sæpe viros.

74 *Quales esse debemus*

Nulli sis blandus, sed verus, & omnibus æquus ;
Vox clamore vacet, sit sine lite sonus.

75 *De Risu.*

Immodicus risus non est sapientis, at index
Stultitiarum ; lepidi sint sine dente joci.

76 *Ne simus loquaces.*

Vls sapiens dici, raro & meditata loquere :
Sæpe loquax verbis proditur ipse suis.


77 *Vera laus bonorum.*

Omne genus laudis turpi vilescit in ore,
Vera boni & docti laus solet esse viri.

78 *Nec nostra laudare, nec aliena reprehendere debemus.*

NEc tua laudabis, nec facta aliena reprehendes ;
Non fatis est, alter si sua facta canit.

79 *De*

79 *De muneribus.*

Quid non argento? quid non corrumpitur auro?
 Qui majora dabit munera, victor erit.

80 *Paupertas cum bona sit, ab omnibus evitatur.*

Sobria paupertas multorum causa honorum est;
 Hanc tamen ut pestem plurima turba fugit.

81 *Natura paucis contenta.*

Quidnam deesse potest, modicus si panis & unda;
 Prandia vel cœnas si tibi præbet olus?

82 *Mors vitari non potest; itaque nec timenda nec fugienda.*

Quod nequeas vitare, fugis? mors omnibus instat;
 Nec formidanda est, nec fugienda tibi.

83 *Gloria sæpe spreta cumulatior redit.*

Narrent de te alii, proprio sordescit in ore
 Gloria; si taceas, plus tibi laudis erit.

84 *Latus liberalitatis.*

Ille Deo similis, qui dat bene munera latus:
 Qui repetit fœnus, fœnoris officio est.

85 *Nulla major usura est sanctior, quam pascere pauperes:*

Nullum majus erit lucrum, quam pascere egenos:
 Fœnore nam grandi centupla dona feres.

86 *Qui pauperibus elargitur, in cœlo rethesaurizat.*

Quas Christi causa miseris donabis egenis,
 In cœlo æternas conciliabis opes.

87 *Nallum magis lucrum neque certum, quam credere Christo opes.*

Munera si gratis dederis, si lætus amicis,
 Tolle divitias has tibi nulla dies.



88 *Dat gratis nemo.*

MUnera qui mittit, sperat majora remitti;
Nemo suas vellet perdere gratis opes.

89 *Ad amicum.*

ACcipe parva mei lætus munuscula census;
Nec quæ sint, sed qua, suspice, mento data.

90 *De Charitate.*

ESt Charitas perfectus amor, perfectaque virtus,
Qua sine perfectum nil reperire potes.

1 *Qui vult esse altus, sit humilis.*

ESto humilis, quisquis fieri cupis incola cœli:
Fastus tartareis excrucietur aquis.

2 *Tardi & considerati ad loquendum debemus esse.*

Qui cito præcipitat velox sine pondere verbum,
Errat; demissum non revocare potest.

3 *Quod dices faciesve aliis, tibi fiet & dicitur.*

Quæ dices aliis, tibi mox responsa remitti
Exspectes; cupies, qualia dona dabis.

4 *De iracundo semper excedente iustitiam.*

Qui temere & præceps rabidas exarsit in iras,
Excedet semper limina iustitiæ.

5 *Qua virginitati obfient.*

Qui vult virgineum cælebs servare pudorem,
Otia devitet, fœmineosque choros.

Sæpe pudicitiam mulier formosa propinqua
Eripuit castis, multaque damna dedit.



6 *Tutior est sibiha basilisci, quam cantus puella.*

Tutius in silvis basiliscum audire frementem,
Quam molles cantus, foemineumque melos.

7 *Tria mulieris petulantiam cobibent.*

Foemina molle genus, turpes proclivis ad actus:
Ni vir sit custos, ni pudor atque metus.

8 *Laus virginitatis.*

Virginitas animi muros, victoria carnis:
Pectus honestatis sancta pudicitia est.

9 *Luxus ingenium & mores perdit.*

Nil lethale magis, quam luxu perdere mores:
Hæc pestis juvenum est sceler ingenii.

10 *Non decet virum muliebri cultu incedere.*

O quam turpe viro muliebri incedere cultu,
Molliaque evulsis reddere crura pilis!

11 *Conscientia bona nil timet.*

Qui recte vivit, contemnit jura superba:
Conscia mens recti nil timuisse potest.

12 *Amicus verus in re incerta cernitur.*

Invenies multos, si res tibi floret, amicos:
Si fueris pauper, nullus amicus erit.
Rebus in adversis patientia vera probatur,
Rebus in adversis vera probanda, fides.

13 *Duplex pœna peccanti principi imponenda.*

Si proceres peccant, si peccavere parentes,
Exemplo & sceleri pœna paranda duplex.
Sæpe patris mores imitatur filius infans:
Qualis erat mater, filia talis erit.



Castæ refert castæ genitricis filia mores .

Lascivæ nunquam filia casta fuit.

Et verbo & facto parvis sit regula natis ,

Optima sitque omni tempore norma pater.

Altera natura est habitus ; quam junior artem

Perdices , tollet nulla fenestra tibi.

14 *Sola virtus beatos efficit.*

Sola potest homines felices reddere virtus :

Hinc soli è cunctis non Libitina nocet.

15 *Eloquentiæ vires.*

Nam tam difficile est , quod non persuadeat , & non

Efficiat docti lingua diserta senis.

16 *De Eloquentia.*

Accipiti eloquium longe penetrantius ense :

Hoc rabiem notam sedat , & arma virum.

17 *Qui verum audire non vult , perit.*

Desperanda salus , qui verum audire recusat ,

Inque suum præceps labitur exitium.

18 *Conscientia bona iudicem non timet.*

Accusent te mille licet , mens conscia recti

Stat tamen , & nunquam iudicis ora timet.

19 *Ad vaniloquum.*

Omnibus in triviis recitans tua carmina laudas :

Si vis ut laudem , discere tacere prius.

20 *Qui senex laudandus.*

Ut laudanda senis probitas ; ita foeda senectus

Culpanda est , turpi quæ maculata probro.



21 *Poëta multa lectione opus.*

INstar apis debet variis excerpere libris,
Mellifluis ut manet dulcis ab ore liquor.

22 *Se quisque metiatur, & aliis erit æquus iudex.*

TE perpende prius, nec det tibi purpura fastum,
Ut tibi, sic aliis arbiter æquus eris.

23 *Virtutis principium asperum, finis vero
amænum.*

Est opus incepto, finis virtutis amænus,
Principiis quamvis aspera prima via est.

24 *Voluptas pestis juvenum & senum est.*

Vis fieri felix: est debellanda voluptas:
Hæc juvenum exitium est, pestis & illa senum.

25 *Jactantia est omnibus invisa.*

Omnibus invisa est stolidæ jactantia mentis:
Dum de te loqueris, gloria nulla tua est.

26 *Quæ carent effectu, non sunt tentanda.*

Quæ fieri nequeunt, prorsus tentare recuses:
Ingenii debes pondus habere tui.

27 *Sapiens nihil invitus facit.*

Nil facit invitus sapiens: exire recusas,
Quod vitare nequis: velle necesse tibi est.

28 *Quos bene vestitos, eosdem quoque
egregios vulgus putat.*

Si modo me spernis, mutata veste redibo,
Quod mihi non dederis, vestibus ipse dabis.

29 *Non*



29 *Non est credendum blando adulatori.*

Qui te plus solito demulcet carmine blande,
Te capere infidiis nititur ille suis.

30 *Quæ scimus, docere; quæ nescimus,
discere debemus.*

Quæ nosti impertire libens, facilisque roganti
Esto; quæ nescis, discere non pudeat.

31 *Qui alios reprehendit, se primum castiget.*

Cum fueris censor, primum te crimine purga,
Nec tua te damnent facta nefanda reum.
Ne tua contemnas, aliena negotia curans;
An tibi te quisquam junctior esse potest?

32 *Amico fac proxis, ut tibi non obfis.*

Esto memor caro semper prodesse sodali,
Ut tibi non noceat præstita amicitia.
Sic utare, tuis egeas ne rebus, amicis;
Sarcina namque humeris sola fereunda tuis.

33 *Amici paucissimi.*


Millibus ex multis unus vix fidus amicus,
Hic albo corvo rarior esse solet.

34 *Festinatio & ira sunt inimica consilio.*

Consilium præceps sequitur plerumque ruina,
Ira quoque est valde noxia consilio.

35 *De victu modesto.*

Sit facilis victus nullo irritante sapore,
Sed stomachum & gustum mordeat ipsa fames.



36 *Laus sit modesta, vituperatio modica.*

SI quem laudaris, parce laudare memento:
Crimina culpato parcius ipsa tamen.

37 *Authoritas dicentis non est attendenda,
sed quid dicat.*

Nec te dicentis moveat reverentia, sed quid
Dixerit, attendas qua ratione probet.

38 *Ausonius in Epigrammata.*

NON est dives opum, dives; nec pauper inopsque
Infelix: alio nec magis alter eget.
Dives eget geminis; Cereali munere pauper:
Sed cum egeant ambo, pauper egens minus es.

I.

OMnia dispareunt, mundo quæ pulchra videntur;
Divitias subito fors inimica rapit.
Perpetuo durat virtus doctrinaque rerum,
Inque illam fors nil, quod dominetur, habet.
Hæc tibi sola potest laudemque decusque parare,
Te facit hæc veris deliciisque frui.
Hanc, studiose puer, vigili tibi quære labore,
Hæc tibi præ cunctis sit potiore loco.

II.

Glrior haud natos sequitur laus ulla, parentes
Quam si dilectos debito honore colant.
Hos cœlestis enim sequitur benedictio patris,
Hisque datur fato prosperiore frui.
Cum sibi jam mortem sentiret adesse Tobias,
Hæc charo nato tum documenta dedit.
Hoc, fili, cures, ut toto tempore vitæ
Afficias matrem gratus ubique tuam.
Hinc Salomon folio surrexit protinus alto,
Ad se cum matrem cerneret ire suam.
Omnibus in rebus naturæ hoc lexque requirit,
Omnia disponens hæc jubet atque Deus.

Qui



III

Qui vitam turpem, & sceleratam vivere gaudet
Et nunquam timuit fœda patrare mala,
Vulnere lethifero tam saucius est miser ille,
Ut nunquam plane convaluissè queat.

IV.

Passibus ambiguis fortuna volubilis errat,
Et manet in nullo certa tenaxque loco:
Sed modo læta manet, vultus modo fumit acerbos,
Et tantum constans in levitate sua est.

*Anagramma nominis Autoris,
à D. Du. Tr. inventum.*

Joannes Audoënus.
Ad annos Noë vives.

De eodem Distichon.

Nominis hoc Anagramma tui de te puto falsum;
Verum de libris auguror esse tuis.

D. Du. Tr. Med.

De eodem.

DE te, deque libro verum est Anagramma, quid obstat?
Tuque facis librum vivere, teque liber.

Joannes Rosse, J. C.



EPIGRAMMATUM
JOANNIS OWENI
OXONIENSIS CAMBRO-BRITANNI,
LIBRI TRES.

Ad HENRICUM Principem Cambriæ, duo.

Ad CAROLUM Eboracensem, unus.

M


AU.

AUTHOR
AD LECTOREM.

IN laudem Autoris, folemni, at more recenti,
Miraris, quare carmina nulla legas?
Nostra patrocinium non poscunt carmina; quare?
Si bona sunt, bona sunt; si mala sunt, mala sunt.

Idem, ad eundem.

Non sunt quod lites Epigrammata nostra, nec autor
Quod sub caufidico vociferante cliens.
Nemo potest versus (nec tanta potentia regum)
Vel fervare malos, vel jugulare bonos.



EPIGRAMMATUM
JOANNIS AUDOENI

CAMBRO-BRITANNI,

Ad

HENRICUM PRINCIPEM WALLÆ,
LIBER PRIMUS.

1 *Ad H. Principem Augustum.*

IN libris pro more novis & amore dicandis,
A summo fumo Principe principium.

2 *Ad Mæcenatem.*

NON ego patronum desidero versibus ullum:
Mæcenate Liber non eget; Autor eget.

3 *Ad Marcellum J. C.*

PAULINI nuper patiens, Marcelle, fuisti;
Esse pares vultis? fit tuus ille Cliens.

4 *Ad Henr. Wallia Principem*
Opt. max.

PECTUS & affectus, cerebrum, ratio, caput, & cor,
In te funguntur munere quoque suo.

Pectus enim cerebro, sensum ratione gubernas;

Cor, capitis jussu, non nisi iusta cupit.

Cambria tres invicta tulit cognomine * Magnos;

Tu Magnus, Princeps optime, quartus eris.

* Tres Principes Wallia cognomento Magni.



5 *Mercurius Gallo-Belgicus.*

Mercurius non fit de qualibet arbore; fingit
Mercurium ex ligno quolibet ille faber.

6 *Orpheus..*

Orpheus uxorem raptam repetivit ab orco;
Duxit ab inferno fœmina nulla virum.

7 *Vestes Academiae. Ad Oxonienses &
Cantabrigienses.*

Cur, quicumque studet generosis artibus, ater
Cernitur, & nostra Clerus in urbe niger?
Defunctum nostræ lugent ob Apollina Musæ?
An Mecœnatis funera flenda dolent?
Hæredes habet iste tamen; concedo: bonorum
Scilicet hæredes, non bonitatis habet.

8 *An Petrus fuerit Romæ.*

An Petrus fuerit Romæ, sub iudice lis est;
Simonem Romæ nemo fuisse negat.

9 *Εἶναι καὶ ἔχειν.*

Esse & Habere, bonum est: dixit quis nescio Graius;
Addidit Almannus nescio quis; Bibere.

10 *Ad Ligurinum.*

Uxorem, Ligurine, tuam colit Arrius: alter
Sementem fecit; sed tua messis erit.

11 *Non occides; non furaberis.*

Furtum non facies; Juristæ scribitur hæc lex:
Hæc, Non occides, pertinet ad Medicum.

12 *In Alanum Decoctorem Chymistam.*

CHymicus ex auro non aurum fecit Alanus ;
Aurum ex non auro non potuit facere.

13 *Ad Henr. Principem.*

Primum est, esse suum ; tamen hoc cui fata negarunt,
Alterius non sit, qui Tuus esse potest.

14 *Ad Ricardum, Comitem Dorcestria
ex Gallis reducem. 1612.*

Mutavit, quod raro solet, mutatio cœli
In melius mores ingeniumque tuum.

Doctior & melior, tibi gratulor ambo, redisti,
Magne Comes ; redeas tu, licet, unde redis.

15 *Novem } Musæ.
 } Mutæ.*

Mœstæ cum fileant Musæ, quid referat, utrum
Musas an Mutas dixeris esse novem ?

Ut γλώσσα à γλώττα differt idiomate tantum,
Discrepat à Muta nunc mea Musa parum.

16 *Honoris } Etymo- } logia.
 } Genea- }*

Divitias & opes Hon lingua Ebræa vocavit :
Gallica gens aurum Or ; indeque venit Ho-nor.

17 *Ad Cornutum.*

Littera Pythagoræ discrimine secta bicorni
Dicitur, est tua frons littera Pythagoræ.

18 *Ad Dindymum.*

Mandere te modine mecum salis, inquis, oportet,
Cœptus ut ad summum progrediatur Amor.



Manducare salem memini te, Dindyme, nunquam:
Dic igitur, quando noster amicus eris?

19 *Mulier Canonica.*

EST mulier tanquam generalis regula; quare?
In multis fallit regula; sic mulier.

20 *Votum Salomonis.*

CUR Regis sapientis erat Sapientia votum?
Optasset Salomon, si sapuisset, opes:
Non optavit opes Salomon; sapientius optat:
Nam sapere optavit; cur? quia non sapuit.

21 *Quid novi?*

NIL ait esse novum Salomon sub Sole; Columbus
In veteri mundum repperit orbe novum.

22 *Britannicarum mulierum trinitas,
unde nata est Britanniarum unitas.*

CONSERUERE Rosas * Henrici mater & uxor;
Uniit Henrici † filia Regna duo.

Filius o felix! felix Henrice maritus
Septime! ter felix in * trinepote pater.

* Septimi. † Margarita Jacobi IV. R. Scotorum uxor;
Unionis mater. * Jacobo I. Britannia. Monarcha.

23 *Δῶρον βασιλικόν.*

EST optata tibi, Salomon, Sapientia; Doron
Optasti, Regum maxime, Basilicon.

24 *Beati { Muni- } fici.
Paci- }*

JACOBUS laceras Britonum res munit & unit;
Munificus Rex est noster & Unificus.

25 *In Gaurium Ecclesie Canonicum.*

APocryphas inter legitur Sapientia chartas;
Tu, licet insipiens, Gaure Canonicus es.

26 *Limax. Emblematicum.*

Limaces, male convenientes sunt vir & uxor;
Non habitant unam femina masque domum.

27 *Christ. Columbus.*


Cedere diluvium, camposque parere liquentes,
Nuncia de cœlo prima columba venit;
Æquora sic ultra nostris incognita, primus
Nunciat immensos esse Columbus agros.
Aurum arrham secum tulit alter, at altera olivam;
Alter divitias, altera delicias.

28 *In Regi-cidas.*

Si * manus offendat te dextra, abscindito dextram:
Offendat si * pes, abjice, Christus ait.
Corpus in errorem dexter si ducat * ocellus,
Ipse oculus peccans effodiendus erit.
Quælibet abscindi pars corporis ægra jubetur;
Excipiunt Medici Theiologique caput.
* Marc. c. 9. v. 43. † v. 45. * v. 47.

29 *Ad Georgium Archiepisc. Cantuariens.*
gratulatio. 1611.

OXonium cito te Rectorem, Venta Decanum,
Pontificemque * urbes obtinere dux.
Venisti Londinensem cito Præsul in urbem;
Factus es Anglorum Metropolitæ cito.
Lectus es in triplicem cito, Rege vocante, Senatum::
Quid superest optem quod tibi? fero mori.
* *Lichtfeldia & Coventria.*

30 *Ad Judicem Decianum.*

Non volo te surdum : non mutum : te volo cœcam ;
Non claudum : mancum te , Deciane , volo.

31 *Cæsaris Cæsari , Dei Deo.*

Omnis principium finemque habet æqua potestas ;
Fine caret solus principioque Deus.
Indefinita est , non infinita potestas
Cæsaris : in terris omnia nemo potest.

32 *Tria Sabbatha.*

Saturnus , Sol atque Venus tria Sabbatha signant ,
Turcarum , Nostrum , Judaicumque vetus.
Pallida Judæo est facies , & frontis imago
Plumbea , Saturno dixeris esse satum.
Uxorum vir multarum , quo Sabbatha servet ,
Elegit Veneris non male Turca diem.
Quo Sol justitiæ , mea lux , mea vita revixit ,
Solis apud nos est sola in honore dies.

33 *Ad Davidem Murray , equitem ;*
H. Pr. ab interiore thalamo.


Cui favet , hunc princeps incautus honoribus auget ;
Huic sapiens , dignus qui sit honore , favet :
Principis hæc nostri est virtus insignis ; amore
Dignatur dignos , te , similesque tui.

34 *Possum , Volo , Nolo ; Anomala.*

Quod volo , non possum ; quod possum , nolo vicissim :
Tota hominis vita est nil nisi , Nolo , Volo.

35 *Patientia.*

Vincit qui patitur ; petitur , potiturque petitis :
Vincitur at semper fœmina quæ patitur.



36° *De genu-flexione, problema.*

CUM defertur honos, demisso poplite, quare
 Unum vir, mulier torquet utrumque genu?
 Vir semel, at mulier bis ferva creata videtur;
 Paret enim patri virgo, marita viro.

37 *Ad Guilielmum, Comitem Pembrochia, Regi à Consiliis.*

NONDUM ætate senex, juvenis nec moribus; ecce
 Te jubet esse suum Rex patriæque patrem:
 Quod te Rex tanto fuerit dignatus honore,
 Gratuler? an quod sis dignus? utrumque licet.

38 *Ad Johannem elect. Episc. Lond. 1611.*

DESTINAT æternæ te Rex doctissimus urbi;
 Te sibi pastorem urbs ambitiosa petit:
 Sede vacante alii veniunt, de more petitem
 Artis & ingenii præmia sacra sui;
 Te Rex ipse vocat, vocat Archiepiscopus, ipsa
 Te vocat Urbs, huc tu sede vocante venis.

39 *De ortu & occasu.*

SOLE oriente, tui reditus à morte memento:
 Sis memor occasus, Sole cadente, tui.

40 *Ad Petrum Junium, Scoto-Britannum, olim Jacobi Regis Præceptorem.*

NASCITUR indigne, per quem non nascitur alter;
 Tu nasci, nosci tu, Petre, dignus eras.
 Nempe tuo geniti tibi sunt de sanguine septem
 Corporis effigies ingenique tui.
 Doctorum tu tot pater es, doctissime Juni;
 Prudentum quot erat Græcia docta parens.



41

In Gaurum.

STultus es & sapiens, quis credat, Gaure? Secundum
Quid sapiens. Stultus quomodo? Simpliciter,

42

ST.

ST, quanquam taciturna silentia præcipis, edes
Tu sine vocali syllaba sola sonum.

43 *Dictum Henrici Comitis Northamptonia*

UNI ET UNIVOCE.

UNIVOCE Britones servire docemur, ET UNI
Jacobus, qui nos UNI ET UNIVOCE

44

In Quintum somniatorem.

AUdivi te sæpe querentem & mane dolentem,
Quinte, quod in somno nil ita cernis, ut est.
Quid mirum, qui sola diu mendacia dicis,
Si nunquam noctu somnia vera vides?

45 *Ad Rob. Carum, Regi à Consiliis, &c.*

PLebs huic raro favet quem carum Rex habet, illi
Raro favent Reges, quem leve vulgus amat:
Ardua res, Carum esse simul Regique gregique.
Te vehit aura duplex; Rex, populique favor.

46

In quendam Hypocritam.


Nescit, ais, mea læva manus quid dextera donet;
Credo, quod omnino dat tua dextera nihil.

47

J. Lipsii obitus, 1606.

SÆcula post sex atque decem sexque insuper annos,
Clausisti criticum, Juste dolende, diem.
Viderunt hoc lucem anno mea carmina, quo tu
Mortuus es Lipsi; Nox tua nostra Dies.

48 *Tbo.*



48 *Thomæ Overbury, Equit. poëma ingeniosum, de uxore perfecta.*

UXorem Angelico describis carmine talem,
Qualem oratorem Tullius, ore potens.
Qualem describis, quamvis tibi nuberet uxor,
Æqualis tali non foret illa viro.

49 *Locatio Beneficii.*

QUod bene sit puero, perit; obliviscitur ille:
Decrepito quod sit, non perit, ipse perit.

50 *Jus ambiguum.*

LEGISTA & Medicus sunt Juris uterque periti;
Hic ægros, alter jure tuetur agros.
Jus dare cuique suum didicit Legista clienti:
Ægroto Medicus Jus dare cuique suum.
Jus Legistarum quid differat à Medicorum
Jure rogas? Siccum est illud, at hoc liquidum

51 *Ad Henric. Principem 19. Febr. natum*
*Anno * 1594.*

* *Omen aureum 1611, 19. Jun.*

JAM decimo nonoque ætas tua currit in anno;
Qui numerus, felix, † Aureus, omen habet.
Hic tibi nam, si me non fallunt omina, secum
Aureus * ingentes afferet annus † opes.

† *Figura numeri 1594. per additionem arithmeti-*
cam reducuntur ad numerum aureum, id est,
19. V. G. 1. 5. 9. & 4. si addantur, efficiunt 19-
** 19. † Aureus versus.*

52 *Ad Regem.*

IN decimo nono Jubileo ætatis obivit,
Qui post diluvium vixit & ante, Noë.
Si mea vota valent, jubileos quot Noë vidit,
Secula tot vives; Tu * Noë noster eris.

* *Rex ante & post unionem Britannia.*

53 *In*

53 *In quendam parcum.*

TE laudo laudatorem, non laudo datorem;
Scit laudare magis nemo, minusve dare.

54 *De Thoma Moro, Angl. olim Cancellar.
Ad Thomam Baronem de Ellesmer,
Angliae Cancellarium.*

INtegritas morum Morum commendat, & ardor
Ingenii, & docto dulcis in ore decor.
Te quoque cor sapiens, gravitas, & gratia vultus
Eximit è populo, conspicuumque facit:
Totius integritas vitæ sine labe peractæ
Te Moro æqualem moribus esse^{*} probat.
Excipias Mori casus, & flebile fatum,
Et caussam mortis, cætera Morus eris.

55 *Natura brevium, Ad Lectorem.*

COMMendent alii proluxa polysticha; curtum
Distichon, ut munus, me brevitæ juvat:
Omnibus in rebus, non solum epigrammate, Lector,
Quodcumque est bellum, dulce, bonumve, breve est.

56 *Duces uxorem, & alius dormiet cum ea.
Deuter. c. 29.*

IMpleta in nostris hæc est scriptura diebus.

57 *Britannicae unionis patria.*

* AUTorem Monadis tulit insula † Mona Britannæ;
Fortunata Monas filia, Mona parens.
* *Audoinum Theodorum Henrici septimi avum.*
† *Anglice, Anglesey, Britannice Mon.*

58 *Ad Jacobum Regem doctissimum.*

ESse bonum, res est, me iudice, rara poetam:
Esse virum, res, me iudice, rara bonum:

Esse



Esse bonum, res, iudice me, rarissima, regem;
Tu tamen es vates, vir quoque, Rexque Bonus.

59 *In Cottam.*

PRæceptum observat Paulinum in conjuge Cotta;
Cotta habet uxorem sic quasi non habeat.

60 *Tam Marti, quam Mercurio.*

NEptunus Baccho, Marti jungatur Apollo;
Mitescit studio Mars, ut Jacchus aqua.

61 *Ad Jo. Harington, Equit. Jo. Harington,
Baronis de Exton. unigenitum.*

EXercent inter se in te certamen honoris
Nobilitas, virtus, ingeniumque tuum.
Hæc tria cum spectro, verear cur dicere verum?
Jane tibi juvenem vix alit Aula parem.

62 *Sortilegium. The Lottery. Galli
* la Blaque appellant.*

* *Omnis res denominanda est à majore parte.*

HUc quicumque venit; flet in Albo, ridet in Atro;
Lugenti potius convenit iste color.
Candida cur damnum fert chartula, nigra lucellum;
An quia divitias Dis dat? At, hic niger est.

63 *Ad Cælibem.*

EST bona res Uxor, melior Bona, at optima Nulla:
Contingat nobis Optima, Nulla tibi.

64 *In Cottam nugonem.*

SERia dum tractas obiter tu, serio nugas;
Serio stultescis, Cotta, obiterque lapis.



65

In Petum.

Cornua Pæte geris ; fuerit quis , quæritur , autor :
 Ex dono autoris , scribito , quisquis erat.
 Ex dono autorum lunatæ inscribito fronti ;
 Autores semper res habet ista duos.

66

Δ Ε Λ Τ Ω Τ Ο Ν.

Humanæ vitæ scopulos ante omnia Deltas
 Tres fuge : Divitias , Dæmona , Delicias.

67

Furca , ad P. L.

Latronum finis funis , mors ultima merces ;
 Furca capit fures ; hinc puto nomen habet.
 At multi evasere ? dabit Deus his quoque funem :
 Rarus funesto fur sine fune perit.

68 *De ingenio muliebri , problema.*

Cur minor uxorum est , marium prudentia major ?
 Eva fuit costæ filia , non capitis.

69

Minerva Eva.

Orta Jovis cerebro nulli Sapientia nupsit ;
 Nupsit at è costâ conjugis orta fui.

70

In Helium.

Jurifconsultos multos injuria ditat ;
 Helius immensas jure paravit opes.

71 *Unionis Britannicæ Status. Ad Regem.*

Infula lana fuit sub Elisâ principe , sub Te
 Neta , sub Henrico denique pannus erit.

72 *An Bacchus sit Deus. Ad Germanum.*

Nonne vides , ut , cum vos dulcis inebriat humor ,
 Summa quatit caput Bacchus & ima pedum ?
 Exaltando



Exaltando pedes humiles, de sede superbum
Dejiciendo caput, se probat esse Deum.

73 *Ad Thomam Chalonorum Equitem,
H. Principis Camerarium.*

ARTibus à teneris imbute fideliter annis,
Principis evexit quem, Chalonerè, favòr;
Te, (tu nam tenues non aspernaris amicos,)
Non quia sis tantus, sed quia talis, amo.

74 *Amo, vocis Passivæ, Amor Activæ.*

QUIsquis amat, servit; dominatur, quisquis amatur;
QUIsquis amat, patitur; quisquis amatur, agit.

75 *In Julium pseudomachum.*

JULIUS in mundo non est; at mundus in illo est.

76 *Sacerdos & populus.*

PRESbyteri labiis orant, Laicique laborant,
Plebs, dum pro populo Presbyter orat, arat.

77 *In Julium II.*


ECCE duo gladii, Christo Petrus ensifer inquit:
Ecce duæ claves, ô Petre, Christus ait.
Deposuit Petrus gladium, clavesque recepit:
Deponis claves Tu, gladiumque rapis.

78 *Similis similem.*

FÆmina quæque marem repetit, fœdissima quamvis:
Sit quamvis nebulo Davus, habet Dominum.

79 *Nosce teipsum.*

ETHICA jungatur Physicæ, te noscere si vis;
Hæc docet imperium corporis, illa animæ.

80 *Æquitas mortis.*

Flumina fluminibus distant. Sic nos quoque nobis,
Dum sumus in vita nos, fluviique via.

Ingressis pelagum sapor amnibus omnibus idem :
Mors omnes homines æquat, ut æquor aquas.

81 *Ad Thomam Button, 1612.*

A Penitus toto divisis orbe Britannis,
Missus ad occiduum, quod bene vertat, iter ;
Quærito & invenies pelagi mysteria magni,
Principis Henrici : Fata viam invenient.

82 *In Gelliam fucatam.*

Diffimilis pictura tibi est tua, Gellia ; constat
Picturæ similem te tamen esse tuæ.

83 *Certamina Magorum.*

Parmensis magico magus in certamine nuper
Ant'ivit cunctos, Dæmonis arte, magos.
Scottus enim pactum Parmensis Dæmone fecit,
Cumque sciente magis, cumque potente magis.
Haud secus si magnis regum qui militat aulis,
Sub Domino servus mira potente potest.

84 *In Ruffum Hypocritam.*

Devotos, inquis, facit ignorantia ; primum
Inter devotos do tibi, Ruffe, locum.

85 *Ad Anglos proolema.*

Gallo, Hispano, Italo parvi cur penditur uxor ?
Gentibus his Mulier nulla videtur * Homo.

* *Hommes, Femmes : Hombres, Mujeres : Huomini, Donne*

86 *In Cinnam Medicum.*

Tollere scis morbos : at quomodo ? tollis & ægros ;
Quodque facis (Judas ut) cito Cinna facis.
Qui tuus est Patiens, ô terque quaterque beatum !
Ægrotare illum non patiere diu.

87 *Habemus unum Advocatum in cœlis.*

CAusidicum in cœlis unum (inquit Paulus) habemus ;
Præter eum num qui sunt tibi Ausidici ?

88 *Ad ætate juvenem, moribus senem.*

CUr podagra insequitur juvenem te, Martis alumnum
Musarumque ; senem quæ solet esse comes ?

Error hic est morbi ; morum gravitate senilem
Te simul ac vidit, credidit esse senem.

89 *Ira brevis furor.*

SIt brevis ira licet, non expedit esse furorem ?
At quoniam furor est, expedit esse brevem.

90 *Ad Henr.*Goodyeere,eq. Kal. Jan. 1610.*

Quid tibi pro strenâ mittam Goodyeere ? precabor,
Ut possis nomen multiplicare tuum.

* *Bonus annus.*

91 *Amor activus & passivus, ad Pontiam.*

SCire cupis, quid amare ab amari distet ? Amari,
Pontia, me tantum credo ; at amare scio.

92 *Ad Principem.*

Mens mea nil præter generosum somniat aurum :
Felix sum tota nocte, dieque miser.

Auxiliatricem Princeps mihi porrige dextram,
Sic ego non sola nocte beatus ero.

93 *Divisio arithm. ad J. S. mercat. 1607.*

Divide nil, dum vivis, egentes inter amicos,
Mortui invenies in quotiente nihil.

94 *Pediculus aulicus.*

Blandus adulator per totam curfitat aulam,
 Principis inprimis nobiliumque fores;
 A pedibus sic nomen habens mala bestia totum
 Infestat corpus, præcipueque caput.

95 *Æsculapius trifrons.*

Intrantis Medici facies tres esse videntur
 Ægrotanti; Hominis, Dæmonis atque Dei.
 Quamprimum accessit medicus, dixitque salutem;
 En Deus, aut Custos Angelus, æger ait.
 Cum morbum medicina fugaverit, Ecce homo, clamat:
 Cum poscit Medicus præmia, Vade Satan.

96 *In Galateam.*

Cervus, uti perhibent, mutat ramosa quotannis
 Cornua: quotidie vir, Galatea, tuus.

97 *Aquæ & Terræ epithalamium.*


Nulla nisi in terris generatio fit vel in undis:
 Unuit ergo sagax hæc elementa Deus.
 Ut nihil humano generi generabile desit,
 Terra superfusæ subjacet uxor aquæ.
 Uxor Aquæ Tellus, Aqua Terraque sunt globus unts:
 Res bene conveniunt vocibus; Humor, Humus.

98 *De iisdem.*

Cur fluit ex terra, terram circumfluit humor?
 Ne quam terra sitim sentiat, unda famem.

99 *Mors in olla. Ad Criticos palatinos.*

UT verbum vetus inquit, In olla est mors; an in * aula?
 Nam Veteres, Plauto teste, loquuntur ita.
 * *Veteribus latinis, olla & aula idem sunt.*

100 *De diluvio, duplex problema.*

CUr pisces assimilant sanum * proverbium? meritis
Gentibus, hæc tantum natio salva natat.
Cætera submersit, cur piscibus unda pepercit?
Ne sobolem mater perderet ipsa suam.

* So sound as a fish.

101 *Carbo ligneus.*

Natus in igne fui, periturus in igne vicissim;
Sylvas absumsi, dignus in igne mori.

102 *In Gelliam.*

A Teneris Papista fuisti Gellia; pejor
Papista nunc es, quomodo? Catholica es.

103 *In Aulum.*

Seu gravior lecto morbus te affixerit, Aule,
Sive cæcus doleat dens, stupidumve caput.
O utinam in cælis essem, tibi dicere mos est:
Dicunt hæredes non minus, O utinam!

104 *Mulier quale animal.*

Sensu intacta caret virgo; cum nupta maritum
Sensit, habet sensum, sed ratione caret.

105 *Ratio & Oratio.*

Rhetorica est palmæ similis, Dialectica pugno;
Hæc pugnat, palmam sed tamen illa refert.

106 *Testes.*

AN quia testamur sexum, sic dicimur? an quod
Nequitie testes adsumus ambo tuæ?

107 *In obitum Henr. Cuf. 1600.*

Doctus eras Græce, felixque tibi fuit Alpha.
At fuit infelix Omega, Cusse, tuum.



108

In Festum.

UXorem, jam Feste senex vis ducere? doctam
 Angligenæ Lill consule Grammaticam:
 Illic invenies indeclinabile Cornu;
 Hunc scopulum pauci præteriere senes.

109

Thomas Morus.

Quid de se fieret, meditans in carcere Morus,
 Inspicit urinam: nil ibi triste videt.
 Urinam Regis potius lustrasset; in illa
 Vidisset mortis turbida ligna suæ.

110

In Cornelium.

Cornutum te, Corneli, scis esse, tacesque:
 Non Cornelius es tu modo, sed Tacitus.

111

*Triplex mendacium
 in Tullum.*


} *Dictum.
 Fictum.
 Pictum.*

Sculptorum est mendacia fingere; pingere, munus
 Pictorum: cujus dicere, Tulle? tuum.

Finis Libri primi.



EPI-



EPIGRAMMATUM
JOANNIS AUDOENI,
CAMBRO-BRITANNI,

Ad
HENRICUM PRINCIPEM,
LIBER SECUNDUS.

1 *Ad Henr. Principem Walliæ, Opt. Max.*

Optima det tibi velle Deus, verissima scire:
Hæc cuicunque dedit * maxima posse dabit.
* *Magnum esse bonum est; Doctum, melius; Bonum, optimum.*

2 *Ad Jacobum Magnæ Britannicæ, Franciæ, Hiberniæ, &c. Regem, Opt. Max.*

Omnia formidant, formidanturque tyranni:
Semper habet comitem vis metuenda metum.
Cur metuas causæ nihil est, Rex maxime regum,
Optime Rex, causæ est, cur metuare, nihil.

3 *Hysteron, Proteron.*

Hysteron est Proteron præpostera forma loquendi:
Exempli causæ: Cant'Brigia Oxonium.

4 *In decrepitum tertiæ uxoris virum.*

Prima tibi Clotho, Lachesis fuit altera conjux:
Atropos est vitæ tertiæ nupta tuæ.

5 *Amor.*

Libertas, carcer, pax, pugna, dolenda voluptas,
Spes metuens, mel, fel, seria, ludus, Amor.



6

Minos.

Qui pro iustitia poscit sibi munera Minos,
Est similis pisci, quando capit, capitur.

7

Dubitantius.

Suspikor alterutrum, scio neutrum, utrumque paratus
Credere; Phœbus erit, qui mihi dicet, utrum.

8

Ad Adam. Neuton, H. Principi à Secretis.

Mores mutat honos hominum plerumque priores,
Moris id est; non est mos tamen ille tuus:
Mutatus non mutaris; mirabile, tradunt
Se Fortunæ alii, traditur illa tibi.

9

Ad Thom. Puckering, Equit. & Baron.

Care, tuum, Thoma, si fas tam prisca referre.
Ingenium colui nobile primus ego.
Doctor ego, Puckringe, fui tuus, optume, primus,
Non sum quod fueram, sum tamen usque Tuus.

10

Tres haustus.

Præteritam primus, præsentem proximus haustus,
Venturam exstinguat tertius iste sitim.

11

Ænigma duplex.

Dic mihi quæ fuerit, matri quæ * filia nupsit?
Cujus erat † mater mascula, 'Nemo * pater?
* Eva, † Adamus, * Deus.

12

De fide. Anagramma quintuplex.

RECTA Fides CERTA est, ARCET mala
schismata, non est,
Sicut CRET A, Fides fœtilis: arte C A R E T.

13 *Ad*



13 *Ad Edoardum Coke, Equitem, juris-
prudentissimum Judicem, &c.*

Naturæ notum tibi jus, naturaque juris;
Lis, & uterque tuo pendet ab ore cliens.
De scripto responsa Britannus Apollo dedisti,
Clara magis, quam quæ Delphicus ore dedit.
Præsentès dirimis lites, tollisque futura
Jurgia, præsentès voce, futura manu.

14 *Instrumentum Mathematicum, vulgo
dictum A Jacobs Staffe, ad Mathematic.*

Jacobi baculum tibi sumito; da mihi * scalam;
Monstrabit baculo plus mea scala tuo.
* *Jacobi Scala. Gen. cap. 28. v. 12.*

15 *Situs Terræ.*

Terra stat æternum, Salomoni credere si fas;
Si fas Nasoni credere, Terra sedet.
Fessa vacillaret tandem, si terra federet;
Si staret, caderet, quid facit ergo? jacet.

16 *Ad prud. & fort. virum, Henr. Davers,
Baronem de Dantesay.*

In te fortunam virtus, prudentia casum,
Servilem superat spes generosa metum.
Te sequitur fortuna comes, prudentia ducit;
Nulla (nisi excipiam Numinis) arma times.
Pergito tu, quocunque vocat Rex: Te duce victor
Miles erit: Dux te milite victor erit.

17 *Epitaphium mortis. Ad mortis mortem.*

In cruce mors obiit: nunquam de morte resurget:
Mortis erat stimulus mors tua: crux, tumulus.

18 *De Papa & Luthero.*

PAPA pater multas indulgentissimus unus
 Ex purgativo liberat igne animas.
 Martinus Papis pater indulgentior unus
 Omnibus est; omnes eximit inde Luthet.

19 *De Deo & homine.*

IPSE Deus verbum est; fecit Deus omnia verbo:
 Verba homines facimus; nos quoque verba sumus.

20 *Ad Georgium Carew, Equit. praefect.
 cur. a pupillorum. 1612. Jun. 13.*

DUM pupillorum commendat Rex tibi curam,
 Se meriti curam monstrat habere tui.

21 *De jejuniis.*

PAPA suo cur tot jejuna servat in anno?
 Ut successorum se probet esse * Petri.
 * *Piscatoris.*

22 *Metamorphosis nova.*

EFFICIUNT hominem vir & uxor amabilis unum:
 Sic homo fit quadrupes, qui fuit ante bipes.

23 *In nonnullam.*

NERVUM inflammasti Fabiano; jam Fabianus
 Dicere jure potest: Uxor amore tui.

24 *Aurum ex stercore.*

CONDUCTOR foricarum ex stercore colligit aurum:
 Et duo praeterea; Rusticus & Medicus.

25 *Fronti nulla fides.*

UXORIS crimen scriptum est in fronte mariti;
 Vir tamen est calamus, femina charta viri.

26 *Ad Guil. Ravenscroft, J. C. cælibem.*

Cœlestem vitæ degens in cœlibe vitam,
 Quod possunt pauci, tu potes esse tuus.
 Cognati natorum instar tibi sint, & amici;
 Dum tibi cognatus sis vel amicus ego.

27 *Historia hujus temporis.*

Lex fuit historiæ vetus hæc, ne dicere falsum
 Audeat, & verum dicere ne metuat.
 Hæc est historiæ nova lex; ne dicere verum
 Audeat; & falsum dicere ne metuat.

28 *Dos formosæ.*

Formosam nudam volo; nudam non volo formam;
 Queris cum forma quid volo? materiam.

29 *Virgo Gallica.*

Gallica virginitas parvarum est propria virtus:
 Virginis hic titulum sola * Pusilla gerit.
 * *Pucelle* Galli virginem vocant.

Virgo Anglica.

NE quid vicinis concefferit Anglia Gallis;
 Anglica quæque fere virgo Platonis homo est.

30 *In Nobilem novum.*

Mater erat netrix, pater in mare retia jecit:
 Inde tuum decorat linea longa genus.

31 *Ænigma Penelopes ad procum.*

Est * quiddam, quod pene nefas mihi dicere versu,
 Hoc tibi vis totum, Pontiliane, dari.
 Syllaba prima meo debetur tota marito:
 Sume tibi reliquas, non ero dura, duas,
 * *Osculum.*



32

Bias.

OMnia qui dixit mea mecum porto, videtur
Uxorem sapiens non habuisse, Bias.

33 *Chrysof. Græcus, ab Henr. Savello
Equite, doctiff. correctiffime editus Ætione.
Ad Henr. Savellum.*

Vitam in carne pius primam Chrysoftomus egit;
Nunc vitam, exutus corpore, mentis agit.
Vivit & in scriptis. Naturæ debita matri
Prima, secunda Deo, tertia vita tibi.

34

Philosophi uxor.

Vulcani formosa Venus, Jovis inclyta Juno
Uxor erat, nulli nupta Minerva viro.
Cur ita? Pallas enim cum fit Sapientia, nulli
Nubere vult homini: cur? quia nemo sapit.

35

** Propria quarto modo.*

Mentitur quisquis Communem Thaisda dixit;
Thaisda semper habet solus & omnis homo.
** Omni homini, soli & semper.*

36

Stultorum par.

Claudius est * mulo similis, Gorgonius † hinno;
Quod sit iners, matri debet hic, ille patri.
** Ex equa & asino fit mulus, † ex equo & asino
hinus. Var. de re Rust. l. 2.*

37 *Ad Edoard. Sackeville, ex Galliis reducem,
Comitis Dorcestria unicum fratrem.*

Ingenium Natura domi tibi provida mater,
Consilium peregre resque locusque dedit.
Sirenum fugiens cantus & pocula Circes,
Unde redis senior, sanior inde redis.

38 *De zelotypia Anglico-Gallico-Italica.*

CUr Itali longe gravius quam Gallus & Anglus
Uxorum lusus, oscula, furta ferunt?

Bestia pejor ave est, cui nupsit adultera conjux:

Italus est * quadrupes, Gallus & Anglus † aves.

Gallus & Anglus aves, quadrupes est Italus? ergo

Ex tribus his solus cornua fert Italus.

* Becco cornuto, hircus. † Un Cocu, Gall.
Angl. A Cuckold, Cuculus.

39 *Sapientia Socratica.*

OMnia me, dum junior essem, scire putabam:

Quo scio plus, hoc me nunc scio scire minus.

40 *Mensa rotunda Regis Arthuri.*

Inscribi septem Sapientum nomina jussit

In tereti sapiens Delphicus orbe Deus:

Sic, Arthure sagax, eques unusquisque tuorum

In tereti mensa prius & imus erat.

41 *Subsidium.*

REgem anima & nummis Ecclesiam, corpore vulgus:
Nobilitas opibus corporibusque juva.

42 *Novus Orbis.*

Nescio quos Cabalistarum schola mystica mundos

Asserit; innumeros esse Epicurus ait.


At bene si numeres, duo sunt: rerum ille vetustus,

Verborum, in quo nunc vivimus orbe, novus.

43 *Janus Bifrons.*

Ingenii virtus reminiscendique facultas,

Iste quod à tergo est, illa quod ante, videt.

44 *Corpus Terræ.*

TElluris lapides sunt ossa, metallaque nervi,
Pellis crusta, pili gramina, sanguis aqua.

45 *Ad Pannicum de Mauro.*

INTER te dominamque tuam sua, Panice, Maurus
Dividit; uxori res, tibi verba dedit.

46 *In Paulam Anglicam fucatiss. feminam.*

FUCata facie, fucosis fallere verbis,
Mos tuus; in fuco fanda nefanda facis.
Ignayum fucos pecus à præsepibus arces,
Paula; tamen tuus est quid, nisi fucus, Amor?

47 *Medicus & J. C.*

DAt Galenus opes, dat Justinianus honores,
Dum ne sit patiens iste, nec ille Cliens.

48 *Ad Edoardum Wotton, Baronem,
Regi à Consiliis, &c.*

MOrtuus est, cessitque loco cultissimus Heros,
Qui fuit, arbitrio Palladis, ante tuus.
Non erit hoc, Edoarde, loco te dignior alter;
Te, Wottone, locus dignior alter erit.

49 *Anagramma: Galenus, Angelus.*

ANGelus es: bonus anne malus, Galene? salutis
Humanæ custos Angelus, ergo bonus.

50 *Amor cæcus male audit.*

NON videt uxoris delicta maritus amator:
Nullus amat vere vir, nisi cæcus amat,
Nil oculo contra dominam, nil creditur auri;
Est igitur furdus, non modo cæcus, Amor.



51 *In Dindymum mercatorem.*

ARTIS Arithmeticae didicisti, Dindyme, partes
Tres primas : quartam discere, beatus eris.

52 *Anagramma uxoris.*

INSATURABILE par sunt * orcus & uxor, ait Rex,
Unius experiens, alteriusque sciens.

* Prov. c. 30. v. 15.

Quisquis in uxorem cecidit, decendit in orcum :
Rite inverſa ſonant *Uxor* & *Orcus* idem.

53 *Responsio.*

NUncupor *Uxor* ego, non sum quasi conjugis *Orcus*,
Sed quia per totam sedula *curſo* domum :
In muliere vir est, ut in orco Belzebub : ergo
Infernus si sit femina, vir Satan est.

54 *Religiosus.*

QUod bene fit, male fit, nimium si fiat aperte ;

Politicus.

Occulte dum fit, quod male fit, bene fit.

55 *Tres Divae.*

JUNO casta, Venus meretrix, virgo optima Pallas,
Est inter Divas rara Minerva duas.

56 *Proteus Anglicus.*

UTILIA haec aetas in amictu & honesta reliquit :
Nos jucunda juvant sola, diuque nihil.

57 *Duo protegit unus, dictum H. IV.*
Regis Francorum.

GALLorum Rex regna, inquis, duo protegit unus ;
Protexere tuum nec duo regna caput.

58 Or-

58 *Ortus & situs Solis.*

SOL inter septem quartus mediusque Planetas :

In quarto & medio Sol situs ut * fatus est.

* Quarto die creatus Sol.

59 *Cæsaris, Pompeji & Crassi sepulcra.*

Africa Pompeji tellus, Asiatica Crassi,
Tertia pars mundi Cæsaris Urna fuit.

60 *Ædes urbana urbanissima, Henrici
Comitis Northamptonia.*

ARGUIT affectus domitos, mentemque polite
Compositam domini, compositura domus :

Infanas quicunque struunt ex tempore moles,
Exemplo discant ædificare tuo.

61 *Ad Oranum.*

CONNUBIO jungam stabili, propriamque dicabo,
Sæpe tibi divès dixit, Orane, focer :
Connubio nimium stabili tibi jungitur uxor,
Instabilis cum sit, quem profitetur, amor.

62 *In Felicem.*

PER totam Felix holosericus ambulat urbem,
Qui vix toto urbes vidit in orbe duas.
Qui mores hominum multorum vidit & urbes,
Mendicat panem pauper, in urbe sua.

63 *Fr. Drake.*

AMBITIO *Draki* nullo reticebitur ævi;
Ambivit Terras per mare, *Drakus* Anas.

64 *Homo.*

NI fueras, sed nec potes hoc meminisse, priusquam
Natus eras; aliquid cum morieris, eris.

65 *De Phæbo ☿ Neptuno.*

Sol celer est, at Sole tamen velocius æquor:
Itque reditque die Sol semel; at mare bis.

66 *Uxor vi (n) Æta.*

Vincitur nisi lingua prius, non vincitur uxor:
Uxorem solus qui super-it, superat.

67 *Nuda veritas. In Alethum.*

Si posset Virtus (inquit Plato) nuda videri,
Mirus in hæc hominum conciperetur amor.
Vidit apud Venetos (si credere fas sit) Alethus
* Virtutes nudas, & vitiavit eas
* *Quatuor meretriculas, virtutum nominibus insignitas.*

68 *De Baccho ☿ Byrrhia.*

Laudatur vinum simplex, cerevisia duplex;
Est bona duplicitas: optima simplicitas.

69 *In Gelliam.*

Gellia Materie res una simillima primæ:
Hæc omnes formas appetit, illa mares.

70 *In Papilum canos evellentem.*

Nil opus est capiti canos evellere crines,
Papile: Græcari pergito, sponte fluent.

71 *Ne sitis multi magistri.*

Discipulus dum vult nemo, quisque esse Magister:
Omnes discipuli, nemo Magister erit.

72 *Ad Henr. VIII. Fidei Defensorem.*

Hunc titulum Regi Florum Regique Leonum
Florentinus homo dat tibi Papa * Leo.
* *Leo X. natione Florentinus, anno 1521.*

73 *Ad Leonem Papam.*

CUM titulo gladium Regi, Leo Rapa, dedisti:
Te negat hoc titulo Rex, gladioque necat.

74 *Superbia vita.*

EX humili licet ortus homo tellure, tumescit;
Sit licet ex nihilo nata, tumescit humus:
Sic homo, sicut humus, supra se tollitur ipsum:
Monte superbit humus; Mente superbit homo.

75 *Ad Guarenum Townsend, J. C.*

NON tua se ad scenam componit lingua forensis;
Non tua vox querulo prostat avara reo.

Naturæ contemplaris mysteria matris:

Scripturam, leges, historiamque legis.

Tres charites, septemque artes, ter-tresque sorores

Te prohibent causas dicere: nosse docent.

76 *Genesis & Evangelium S. Matthæi.*

EXplicat hic Christi Genesin liber; alter Adami:
Incipit à Genesi Lex, & Evangelium.

77 *Quidam, Nemo.*

IN sacris, homines Animas Ebræa vetustas
Appellat: tanquam nil nisi mens sit homo.

Nemo Anglis *Nobody* est, & Quidam *Sombdy*, tanquam
Anglicus ex solo corpore constet homo.

78 *Amatorium.*

SI tu Zodiacus fieri, mea Lesbia, velles,
Hac ego Sol fieri conditione velim.

Zodiacum in toto percurrit Sol semel anno;

Ast ego te quavis, Lesbia, nocte semel.

79 *Ad librorum Castratores.*

QUI sapitis, nolite meum castrare libellum,
Gignat adhuc alios ut liber iste libros.

80 *In Gelliam Aulicam.*

GELLIA dic sodes, multis cur prodiga præstas
Uni promissam remque fidemque viro?
Mos vetus est, & adhuc nostra servatur in aula,
Pluribus ut pateat clavibus una sera.

81 *Evæ & serpentis conciliabulum.*

PECCATUM peperit sermo serpentis & Evæ;
Ille utinam mutus, surda vel ista foret.

82 *Ad Robertum Jonston Scoto-Britann.*

INGENII Jonstone tui sum factus amator,
* Historiæ legerem dum monumenta tuæ.
Nil magis ingenuum, nihil ingeniosius existat
Tergeminæ Britonum gentis in historia.
Excipias unum Morum de Rege Ricardo;
Nemo Britannorum dignior invidia.
* Nondum in vulgus edita de rebus Britannicis
 & Hibernicis jussu temporis.

83 *De seipso.*

SUM, fateor, doleoque Minorum ex ordine fratrum;
Frater, opes patrias & bona, major habet.

84 *Vende omnia quæ habes, & da pauperib.
In Patum.*

CONSILII partem servasti, Pæte, priorem,
At pars neglecta est postera tota tibi.
Nam venum bona cuncta dedisti, eademque dedisti,
Aut Veneri aut ventri, pauperibusque nihil.

O

85 *Nec*



85 Nec *Sex malis minimum,*
ex bonis maximum.

Optima sit quamvis, uxorem nolo Gigantem:
 Uxorem Nanam nolo, licet mala sit.

86 *Sirenum cantus.*

Sirenum cupis incolumem servare salutem,
 Sirenum cantus effuge, sanus eris.

87 *Epistola amatoria.*

Nullus amor sine spe, (dubius qua vivit amator,)
 Nulla placet sine re spes mihi; res sine te.

88 *Amor cæcus.*

Ebrietas & amor similes, exstinguit uterque,
 Corporis, ebrietas lumina, mentis, Amor.

89 *S. T. Divitis Testamentum.*

Omnia das, quia nil potes hinc auferre; dedisses.
 Si tecum posses omnia ferre, nihil.

90 *Aër, Aqua, Terra, Infernus.*

Terra supernorum sordes immunda receptat;
 Terræ immundities Orcus in ima trahit.
 Quicquid in orbe mali est, aliquando feretur in orcum:
 Fertur ut in centrum quicquid in orbe grave est.

91 *Zodiacus Christianus.*

Cætus Apostolicus, cœlestia sidera bis sex,
 Zodiacusque Fides, Sol mihi Christus erit.

92 *Erasmi encomium Moriae.*

Stultitiam non tu laudasti solus Erasme;
 Te laudant multi, stultitiamque tuam.

93 *In Gymnicum pastorem.*

PAfcis oves verbis, te, Gymnice, grex alit herbis:
Scis decimare agrum, non medicare gregem.

94 *In Dardanum.*

PAllor in ore sedet, macies in corpore toto,
Dardane: nil in te est pingue, nisi ingenium.

95 *Placitum an. 1609. inter Rob. Calvin.
Actorem, & Joannem Bingley, & Ri-
cardum Griffin Reos.*

CUm post-natorum lis est agitata, Robertus
Jacobi vicit filius, omen habet:
Quod fuerit reus Anglicus alter, Wallicus alter,
Scotus utrumque actor vicerit, omen habet.
Omen amo; Britones jungent jam pectora palmis;
Non erit in partes Insula secta duas:
Post-nati natorum & qui nascentur ab illis,
Grex pastoris erunt, unius unus; Amen.

96 *In discordias nostri temporis.*

Definit Logicus res, non modo dividit; At nos
Nil definimus; Omnia dividimus.

97 *Ex malis moribus bonæ leges.*

Conditor infanti legem præscripsit Adamo.
Moribus ergo malis lex fuit una prior.

98 *4. Articuli Fidei 1, 2, 3, 4.*

UNum credè Deum, duo Biblia, symbola terna;
Quartam Consiliis quatuor adde fidem.



99

Ad H. Principem.


UT visum fugit urſa leonem magna minorem,
 Maxima ſpes minima re veniente fugit:
 Spes mea Te ſpectat, fortunatiſſime Princeps:
 Tu mihi ſpem miſero tolle, beatus ero.

100

Ad Lectorem.

EXuo Narciffum, quoties Epigrammata ſcribo,
 Exuat hunc, quiſquis carmina noſtra legit.

Finis Libri ſecundi.



EPIGRAMMATUM
JOANNIS AUDOENI,
CAMBRO-BRITANNI,

Ad

CAROLUM EBORACENSEM,
Fratrem Principis, Filium Regis,
LIBER TERTIUS.

1 *A Jove Principium.*


PPrincipium Deus ipsum : In principio Deus ipso,
Et post principium, principioque prius.
Principium sine principio est : A principio isto
Principium capiunt omnia principia.

2 *Ad Lectorem.*

CArmine vestitos præmisimus ante libellos :
Qui sequitur, nudus non venit, ecce, liber.
Si qua manent, meliora putas : Tu candide Lector
Quod speres ; Autor quod vereatur habet.

3 *Ad Carolum, Ducem Eboraci.*

ALtera spes regis, regni spes altera, solo
Principe Cambrorum, Carole Magne, minor.
Consiliis Fullertoni doctique Moravi
Utere : consilio Dux duce semper eget.
Esto quod es ; patri similis, fratrique secundus :
Nemo tibi similis, nemo secundus erit.

4 *Ars memoria.*

SImonides olim memorandi repperit artem ;
Nullus adhuc artem repperit ingenii.

5 *Res , Nomen , & Verbum.*

Omnipotens omnes res condidit ; indidit illis
Nomina vir ; mulier denique verba dedit.

6 *Redemptio , & Regeneratio.*

Nos Satan à muliere emit , Christusque redemit ;
Christus nos lavit , quos maculavit Adam.

7 *Liberalitatis laus.*

Q Uod datur , æternum durat , sequiturque datorem :
Dantem & captantem , munus utrumque juvat.

8 *Bibliotheca nova Oxoniensis.**Ad Lectores.*

Q Uæritis Autores ? coram quem quæritis adsum ,
Quisque in classe sua classicus autor ait .
Tanti operis , quantum reliquò vix exstat in orbe ,
Quæritis Autorem ? Bodleus autor erat.

9 *Ad Academiam Oxoniensem.*

N Ulla tuæ par Bibliothecæ est altera : nulla
Ingenio par est Bibliotheca tuo.

10 *Ad Annam Reginam.*

E S soror , & conjux , genetrix , & filia Regis :
Addere quid titulis possumus , Anna , tuis ?
Quatuor his titulis virtutes quatuor addis :
Addere virtuti nil potes , Anna , tuæ.

11 *Ad Elizabetham , Regis filiam , &c.*

M Ultorum , longa serie , de sanguine regum ,
Regis digna toro , Cæsare digna viro ;



Si, Te dum dignus ducat vir, virgo manebis,
Fas tibi perpetua virginitate frui.

12 *Sermo & Scriptura.*

Interpres linguæ manus est, at muta loquentis:
Pectoris ut muti nuncia lingua loquens.

13 *Novus Homo.*

Quod superest, de pelle tua depelle vetustum,
De cute peccati decute triste jugum.

14 *Anagramma salutare.*

O Pto tibi multam, nullam tibi Poto salutem;
Est potior pota sicca salute salus.

15 *Fructus vetitus.*

Nudus Adam vetita quod vulsit ab arbore, malum
Haud fuit, at malo pejus; Origo mali.

16 *Kal. Januarii.*

Tros inquit; Timeo Danaos & dona ferentes:
Quis Danaus? pauper; Tros quis? avarus homo.

17 *In Alconem.*

Non habet Alco fidem; nummum vult credere nulli,
At credunt omnes illi; habet Alco fidem.

18 *Ad Rob. Garey, Equit. Rect. juventutis
Caroli Eboracensis.*

Elisabeth Regina tuo sobrina parenti,
Nominis & generis gloria quanta tui?
Creditus est Britonum Regis tibi filius: illa
Gentis, at hæc major gloria mentis erit.



19

Exemplar.

EXemplo virtus bene discitur atque docetur;
 Qui dare mi suadet pauperibus, sua det.

20

Medium duplex.

IN medio constat Tellus, tamen infima res est;
 In medio virtus; res ea summa tamen.

21

N. O.

N Præit, O sequitur; Nihil est antiquius Omni;
 Scilicet, ex Nihilo condidit Omne Deus.

22 *Ad Jacobum Fullerton, Equit. Rectorem
 juventutis Caroli Eboracensis.*

Fullertone tuæ decus ô doctissime gentis,
 Est in tutela Regis imago tua;
 Quæ sibi dissimilem ne sumat imago figuram,
 Fullertone tuum est hoc onus; hic honor est.

23

Sanctitas, Sanitas.

Nemo diu, bene quisque potest, at vult, bene nemo
 Vivere; visne diu vivere? vive bene.

24

Oves & Capra.

ADescendunt rupes & promontoria capræ,
 Gramine collino dum saturantur oves.
 Sic nunc est, olim non sic erit, ad loca quando
 Summa ferentur oves, inferiora capræ.

25

Navis.

Puppis cauda, carinaque venter, proraque rostrum,
 Velaque sunt alæ, totaque Navis-avis.



26 *Ad Thom. Moravium, Caroli Ducis
Institutorem.*

SI Jacobinum fas dicere Regis amicum,
In Jacobinis me profitebor ego.
Si Scoto quicunque favet Scotista vocetur,
Sum Scotista, nec hoc inficiabor ego.
Tu me Thomistam totum, doctissime Thoma,
Tu me Scotistam, Scoto-Britanne, facis.

27 *Sanguine, non virtute.*

ANtiquum est, virtute decet, non sanguine niti:
Non meritis tamen, at sanguine nitar ego.
Non, inquam, virtute decet sed sanguine niti;
Non virtute mea: sanguine, Christe, tuo.

28 *Sol & Tempus.*

SOL celer est, at Sole tamen velocior hora:
Hora stetit nunquam, Sol aliquando * stetit,
* *Jesu, c. 10. v. 12.*

29 *Sanguis.*

SUM crudus, vocor inde cruor: per corpora curro,
Volvor, & in venis sanguis ut anguis eo.

30 *In Pannicum Divitem inertem.*

QUOD fortuna favet fatuis, mihi credere non vis:
Si mihi non credis, Pannice, crede tibi.

31 *Brevitas, Anagramma triplex.*

PERSPICUA brevitate nihil magis afficit aures;
In *verbis*, ubi res postulat, esto *brevis*.

32 *Tumulus J. Puckering, cust. magni sigilli.*

CERNIS in hoc tumultu tres fratres; quinque sorores:
E quibus una deest; unus adhuc superest.



33 *Homerus.*

MEntiri cœcum cum nemo miretur Homerum :
Auritus testis , non ocalatur erat.

34 *Erasmus.*

QUæritur , unde tibi sit nomen Erasmus ? Eras-mus :

Resp.

Si sum Mus , ego , te iudice , Summus ero.

35 *Parum , Nihil : Nimis , satis.*

PAuper in orbe parum , mendicus nil habet usquam ;
Dives habet nimium ; quis , nisi nemo , satis ?

36 *Ad Henr. Wotton , Equitem ;
Regis Legatum , &c.*

IN dubiis , Wottone , mei non immemor olim ,
Serio , fero licet , sum memor , ecce , tui.
Nuper apud Venetos legatum , jamque Sabaudos :
Fallor ? an in patriam prospera vela velunt ?

Regis opus , pensare tuos , Henrice , labores ;
Nescio (Secretum est) quando ; aliquando , scio.

37 *Respice finem.*

OMega distinguit misero non Alpha beatum :
Ante obitum felix nemo ; nec ante miser.

38 *Sabbathum polare. Ad polares.*

UNA dies vestrum nox unaque terminat annum ,
Septimus est annus , septima vestra dies.

39 *Ad desiderantes legem Salicam.*

FRancorum laudat legem nova secta virilem ,
Ne regat imbellis Martia regna colus.

Lege



Lege regi regnum Salica vultisne Britanni ?
Este viri fortes, incipitote domi.

40 *Ad G. Gwyn.*

IN laudem, Gwaltere, tuam gratantia quare
Disticha non facio ? Tu meliora facis.

41 *Iri & Cræsi Epitaphium.*

Divitis exiguum est Cræsi discrimen, & Iri
Pauperis : hic tumulum non habet, alter habet.

42 *Mensis intercalaris. 1612.*

CUR quarto solus crescit Februarius anno ?
Hic minimus Lunæ mensis ab orbe fuit.

43 *In Felicem.*

Dives eras dum vivus eras, pauperrime Felix
In Lazari malles mortuus esse loco.

44 *Decem Principia.*

UNA Categorias in se Substantia ter tres
Continet, ut Musas unus Apollo novem.

45 *Logica.*

NASCitur in tenebras animal, puer, inscius, infans :
Conferat Oxonium se, cito fiet homo.


46 *Ad Sam. Daniel.*

CUR calamum tractas dextra, & gladiumque sinistra ?
Est tibi Mars lævus, dexter Apollo tuus.

47 *Novitas, ad Paulum.*

DISplicet insipiens novitas, delira vetustas
Non placet : est vero nil mihi, Paule, prius :
Non ego sum veterum, non affecula, Paule, novorum ;
Sen vetus est, verum diligo, sive novum.

48 Hu.



48

Humilitas.

UBeriora ferunt valles, brevioraque montes
Gramina: multum humilis mens sapit, alta parum.
Mens mons est, montisque cacumen mentis acumen;
Omne cacumen inops est, & acumen iners.

49

Tres Philauti.

PROximus ipse Egomet mihi sum: tibi proximus es Tu:
Quid prohibet quin sit proximus Ille sibi?

50

*Dies S. Marci. Ad Marianum,
Pastorem.*

CUr ovibus, non signa capris imponimus? olim
Servabuntur oves, non, Mariane, caprae.

51

Ad Dindymum.

TEmpore, tempus edax edit omnia, Dindyme, sed tu,
Dum nugando teris tempora, tempus edis.

52

*Terræ Anagrammata duo: de Cælo ☿
Terra paradoxon duplex.*

MOBILE non errat Cælum: stat Terra, sed *errat*,
Funditus in varias undique secta vias.
Errantem pedibus calcabor, humillima Tellus,
Vomere proscindar, dumque ero Terra, *terar.*

53

Annus.

VER, Æstas, Autumnus, Hyems sunt integer annus;
Æstas Autumnno, Vere levatur Hyems.

54

Cliens.

PHarmaca si causæ vis applicet apta patronus.
Causidico Clines callide crura Cliens.

55

In Avarum.

NON vis ut modico major pede calceus exstet;
Cur tibi quæris opum plus, tibi quam sit opus?

56 *Patiens inversus, & Pati-entia divisa.*

Eſſe volo patiens, ſi nolo, cogor; At in ſpe
Hac ego ſio potens. Entia cunſta Pati.

57 *Serpens, Eva, Adam.*

Incautam ſerpens fallit, non fallitur, Evam;
Fallitur, haud fallit, conjuge captus Adam.
Activus muliebris erat paſſivus & error:
Fallitur & fallit ſcœmina; capta capit.

58 *Cygnus.*

Cum me fata vocant, ad amœni fluminis oram
Me moriens mœſto carmine ſolor Olor.

59 *Ad Polydorum.*

Eſt Ablativo melior, Polydore, Dativus
Dives, & accipiens munera dante minor.
Heu nimium crebre nunc Ablativus in uſu eſt;
In pretio ruſum quando Dativus erit?

60 *Ad Aldinum.*

Servus es infelix dominorum, Aldine, duorum:
Alter enim tibi nil dat, nihil alter habet.

61 *Continentia triplex.*

Quicquid turpe vides aut audis; claude fenestras:
Ne temere effundas frivola; claude fores.

62 *Saturni tres filii.*

Nummipotens unus fratrum, qui præſidet Orco;
Amnipotens alter; Tertius omnipotens.

63 *Senex juvenem alloquitur.*

Eſt mea vita brevis, nec tempore longa futura eſt,
Eſt tua longa, brevi fiet & illa brevis.

64 *De libro.*

Oxoniz falsus, (juvenis tum) more vetusto,
 Wintonizque (puer tum) piperatus eram.
 Si quid inest nostro piperisve falsive libello,
 Oxoniense sal est, Wintoniense piper.

65 *Ad Theo-dorum, Deo-datum,
 Medicum.*

Nomine tu Grajo Theodorus es atque Latino;
 Arte potens * Phœbi, ter Theodorus eris.
 * *Medicum creavit Altissimus. Altissimus creavit de
 terra medicinam. Ecclesiast. cap. 38. 14.*

66 *In Quintum.*

Jurandi didicisti Adverbia quatuor olim:
 Tum puer: at nunc vir millia Quinte quater.

67 *Ad iracundum.*

Ira cadat cum Sole, at non cum Sole resurgat;
 Semper cum Phœbo currat ad Antipodas.

68 *De Pallio & Tunica.*

Cœruleas olim tunicas manicasque gerebant
 Anglorum Davi, desidiola cohors.
 Pallia nunc gestant: cur pallia? veste sub ista
 Hic cyathum pulchre palliat, ille capum.

69 *Mors.*

Humanum in terris nihil est quod non sit humanum:
 Avolat hinc animus: cætera sorbet humus.

70 *In Pontium Poëtam.*

Claudicat & semper titubat pede Pontius uno;
 Hexametrum in gressu Pentameterumque refert.

71 *In Fabianum.*

TU vel quod dicis facito, vel dicito saltem
Quod facis; At neutrum tu Fabiane facis.

72 *Edere libros.*

Accidit hoc mihi sæpe volenti scribere versus,
Ut libros edam plenus, inanis edam.

73 *Hilarem datorem D. D.*

MUnera ne numera, miseris quæcunque dedisti:
In cœlis numerat, munerat illa Deus.

74 *In Quintum Ramistam, tertium patris filium.*

UNa duos tantum ramos quasi germinet arbor,
Dividis in partes omnia tota duas.
Si rerum fieret divisio quæque bimembris,
Est tua de patriis pars quota, Quinte, bonis?

75 *Arma Cupidinis, arcus & calami.*

NUdus Amor cur offensivis utitur armis,
Non defensivis? Omnia vincit Amor.

76 *De pr(o)sa & adstricta oratione problema.*

CUr victus velocior est quam sermo solutus?
Iste pedes sermo non habet; alter habet.

77 *Cælum.*

NUminis immensi sedes amplissima, cælum:
Omni-potens Dominus, omni-patenſque domus.

78 *"Ἀριστον μὲν ὕδωρ.*

UNde renascuntur mortales, unda vocatur:
A qua nascuntur cuncta, vocatur aqua.



79 A Cest of } *SuScipio.* }
Boxes } - - *Scipio.* } *Pycidium Trias.*
 } - - - *Pio.* }

PRO patria, patribusque mihi, populoque Latino,
Corde animoque Pio Scipio Suscipio.

80 *In Pontilianum.*

BLandus hero cauda canis irrequietus adulat:
Linguam pro cauda Pontilianus habet.

81 *Pulvis & umbra sumus. Horatius.*

DEsperet cælum natus de pulvere nemo:
Desperet cælum nemo quod umbra sumus.
Nostra caro est pulvis, sed eodem ex pulvere corpus
Fit Domini; Mens est umbra, sed umbra Dei.

82 *Ænigma.*

DIC mihi, quæ in cælis exstat vox * integra, cujus
In terris tantum syllaba prima patet?
* *Felicitas.*

83 *Dives.*

DEterior fio fieri dum ditior opto:
Major me fieri molior, haud melior.

84 *Conversio Pauli.*

QUI modo *Saulus* eras, inverso nomine, *Salvus*,
Factus es; & Παῦλος, qui modo Φαῦλος eras.

85 *Recta Ratio.*

TEMPore quod nostro ratio sit recta, dolendum est;
Esset gaudendum, si foret illa regens.



86 *Ad Caroli Ducis Doctorem,
Thomam Moravium.*

TE novi, geniumque tuum, moresque, Moravi;
Scriptaque lecta mihi sunt tua; digna legi.
Non Ductor Doctore Duci fuit aptior alter:
Dogmata dum sequitur Dux tua, doctus erit.
Non trahere invitum, sed in optima sponte sequentem,
Quanta tua est virtus, ducere posse Ducem?

87 *Ad Ebraeos.*

Religio, Lex, vestra; Fides at nostra vocatur:
Vos bene non vultis credere; nos, facere.

88 *Irus.*

Qui mensa excipitur, quique excipit, hospes uterque est;
Sum multorum hospes, nullius hospes Ego.

89 *Deus.*

Disperfus toto licet infinitus in orbe
Sit Deus: in toto quaeritur orbè Deus.

90 *Aquila.*

IN sacris aquilæ portant mysteria templis:
Nunc est Jehovæ, quæ Jovis ales erat.

91 *Tobias Matthæus.*

EX veteri primum fortite, novoque secundum,
Ex Testamento nomen utroque trahis.
Hoc mirum est: nomen Gentile Canonicon esse,
Hoc, in fonte Fides quod dedit, Apocryphum.

92 *In Paraphrasin.*

Ista paraphrasis est quasi circulus actus in orbem:
A centro ad circum linea textus hic est.

P

Tangit



Tangit enim extremas diametri circulus oras,
At centrum nulla tangere parte potest.

93 *In Corbulonem.*

Diruis, ædificas; quid Corbuli? diruis omnes
Divitias & opes, ædificasque nihil.

94 *In Gelliam Grammaticastram.*

Grammaticam veteres artem dixere loquendi:
Gellia, Grammatica nil opus arte tibi.

95 *In quendam Grammaticastrum.*

ME flocci facis atque pili, nauci, atque terunci;
Quanti te faciam scire cupis? nihili.

96 *Bellum.*

Solis militibus bellum res bella videtur;
Militibus solis omnia bella bona.

97 *Divitia.*

Solus Dis deus est; Dites dii, Numina nummi;
Cum plausu loquitur Pluto, tacetque Plato.

98 *Tria genera.*

Est dubii generis, castissima sit licet, uxor;
Communis, meretrix; Fæminei mulier.

99 *S T. S T. Silentii nota.*

Quid sibi Romanum vult S T.? Sileto, Taceto:
S. monet ut fileas. T. jubet ut taceas.

100 *Patria est, ubicunque est bene.*

Where I do well, There I dwell.

Illa mihi Patria est, ubi pascor, non ubi nascor;
Illa ubi sum notus, non ubi natus eram.

Illa



Illā mihi Patria est, mihi quæ patrimonia præbet.
Hic, ubicunque habeo quod satis est, habito.

101 *Coniux.*

APta Duci non est uxor, non aptaque Regi,
Quæ Duci non est apta, nec apta Regi.

102 *Rhetorica & Dialectica.*

RHetorice dicendi ars est, Logiceque docendi;
Illā sophistarum robur at ista sophôn:
Illā magis condita, recondita sed magis hæc est:
Illā salax magis & falsa: sed ista fal est.
Rhetorice verum velat, Logiceque revelat:
Hæc monet, illa movet: hæc docet, illa nocet.

103 *Actæon.*

CArnem edere canes Actæoni, ossa, cutemque;
Cornua Londini conspicienda manent.

104 *Multiplicatio & Divisio Arithmetica.*

CUr dextram Divisio, Multiplicatio levat
Respicit? est virtus illa, sed hæc vitium.
Cur sursum Divisio, Multiplicatio deorsum
Adspicit? hæc homini convenit, illa Deo.

105 *Arbor.*

VEr viridem, flavamque Æstas me fervida, canam
Autumnus, calvam frigida fecit hyems.

106 *Ad Theodorum Prisë, Oxon. Theol.*

UNo non possum, quantum te diligo, versu
Dicere; si satis est distichon, ecce duos.

107 *Unus Deus.*

Cælum Heterocliton est, ut noster Lilius inquit:
Plurali numero nam caret ipse Deus.



O quanta est veterum blasphemia Grammaticorum?
Qui declinandum nos docuere Deum.

108 *Dei genus.*

NEutrius generis Deus est; nec fœmina, nec mas:
Hoc igitur Numen nec Dea, nec Deus est.

109 *Gubernaculum corporis.*

INsapiens linguam laxat, sapiensque refrœnat;
Quis minor aut major, quam tacuisse, labor?

110 *Ex malis minimum & maximum; Ad Maximum.*

IN mensa semper minimum tibi fume malorum
Maxime; malorum maxima, si bona sunt.

111. *Unda.*

Littera dempta Undas udas facit, addita mundas;
Littera transposita est, Undaque nuda manet.

112 *De somniis, paradoxon.*

QUæ mala sunt, bona sunt; mala, quæ bona somnia; quare?
* Gaudeo, si mala sunt, si bona sunt, doleo.
* *Experrectus.*

113 *Origo Aquæ.*

UNda undæ; undarum tibi declinatio constat,
Derivatio non; unda sit unde, rogas?
Annus ut, in sese sine fine revolvitur annis;
Ad punctum redeunt annis & annus idem.

114 *Avaritia.*

UNDique fluminibus currentibus in mare magnum,
Non ait, Unde venis? æquor, at, Unda veni.

115 *Ada-*

115 *Adamas.*

Mittendi fidos Adamantes sunt ad amantes,
Solo adamante polit durum adamanta faber.

116 *Canis & Lepus.*

Sit quanquam levipes lepus, & velocior hoste,
Hic sequitur magna spe, fugit ille levi.

117 *Vox & Scriptura.*

Lingua sagax aperit clausi mysteria cordis:
Scripturà didicit vox sine voce loqui.

118 *Laurus.*

Arbor ego Phoebi, viridis frondosaque semper,
Nescio calvitium canitiemve pati.

119 *Dicacitas & prudentia.*

Ingeniosus at imprudens, est absque cibo sal:
Doctus inurbanus quid? cibus absque sale.

120 *Aliquid ex nihilo.*

Ænigm. Arithm.

Addideris * unum nihilo, nihil inde creatur;
Adde † uni nihilum, nascitur inde Decas.

* 01. † 10.

121 *Ad Guil. Sutton, Oxoniensem
Theologum.*

Debeo plura tibi, quam versu dicere fas est;
Debitor æternum, si mihi credis, ero.

122 *Saturni & Opis filii tres, cohæredes.*

Dites tres fratres, Neptunus, Jupiter, ac Dis:
Quid mirum? tribus his Ops bona mater erat.



Essem Neptuno, Jove, Diteque ditior ipso,
Fors mihi si matrem fausta dedisset Opem.


123 *In quendam oratorem infinitum.*

OMnia cum dixi, superest tibi dicere, Dixi:
Hæc mihi sermonis vox placet una tui.

124 *Ad Lectores.*

NON cuivis Lectori, Auditorive placebo:
Lector & Auditor nec mihi quisque placet.

Finis Libri tertii.



EPIGRAMMATUM
JOANNIS OWENI
OXONIENSIS CAMBRO-BRITANNI.


Ad tres Mecenates,

LIBRI TRES.

Ad EDOARDUM NOEL, Equitem &
Baronetum, unus.

Ad GUILIELMUM SIDLEY, Equitem &
Baronetum, alter.

Ad ROGERUM OWEN, Equitem auro.
tertius.



EPIGRAMMATUM
JOANNIS AUDOENI

OXONIENS. CAMBRO-BRITANNI,

Ad

EDOARDUM NOEL,
Equitem & Baronetum,
LIBER PRIMUS.

1 *Ad Henricum, Augustum Principem
Cambria.*


MEccenas Equitum primus cum Cæsare, Flacci
Foverunt gelidos Virgilique lares.
Me quoque tres Equites, Tuque Augustissime Princeps,
Re simul, & fati spe, melioris alis.
Sunt Mecænates mihi tres, quotcunque superfunt,
Si quis adhuc superest: Tu mihi Cæsar eris.

2 *Ad tres Mecænates, Edoardum Noël,
Guil. Sidley, Equites & Baronetos,
& Rogerum Owen, Eq. aurat.*

ME cum defererent veteres, ut nunc fit, amici,
Vos insperatam Tres mihi fertis opem.
Vestra igitur summis junxi tria nomina, solus
Mecænas dignus Cæsaris esse Comes.

3 *J. C. & Medicus.*

Ille vaser nisi sit, nisi sit temerarius alter,
Se mendicato pascat uterque cibo.



4 *Scala aulicorum.*

Nemo, gradus nisi per plures adscendit in aula,
Ad descendendum plus satis unus erit.

5 *Ad Edoardum Noël, Eq. & Baronetum.*

Hæc tibi, Mecænas, quamvis Epigrammata scribam,
Scripta legent alii, sint modo digna legi.
Quid plus ergo mihi debet Lestore patronus?
Tu mecum lectus, non modo Lector eris.

6 *Ad Aulicum.*

Audacem fortuna omnis, cibus omnis edacem
Adjuvat; Esse aliquid si cupis, aude & ede.

7 *Honoris & Divitiarum Comparatio.*

Donat opes homini Deus, & sibi poscit honorem:
Ergo divitiis antefereendus honor.

8 *In Poëtas fabulosos.*

Fictum inter factumque parum distinguere curam,
Quodlibet ex quovis Ente Poëta facit,
Sortiti nomen sunt à faciendo Poëtae:
A faciendo aliquid scilicet: imo nihil.

9 *In Tomasium.*

Scripserunt Afini laudes hoc tempore multi;
Legimus & laudes, ô Tomasine, tuas.

10 *In Fabianum.*

Extra calvescunt alii, tu calvus es intra:
Crinibus hi, cerebro tu, Fabiane, cares.

11 *Of-culum.*

Una trisyllaba vox inter celebratur amantes;
Quam sibi quisque sua vult ab amante dari:



Syllaba prima data est? reliquæ siq̃e lite dabuntur:
Quæ dedit os, culum non minus illa dabit.

12

Dalila.

SAMSONEM rigidis spoliavit crinibus uxor:
Hoc nostro multæ tempore sunt Dalilæ.

13 *Coventria & Warvicum, urbes Mediterr.*

NON idem vobis Præful, tamen Æacus idem:
Diversus vester spiritus, una caro est.

14

Natalis.

AD præsentia nascor, & ad futura renascor:
Natalis prior est ille, sed hic potior.

15

De arte amandi.

JUDICE me, rudis est, artem qui tradit amandi,
Naturæ scopus est, non opus artis, amor.

16

In Gelliam.

FUNGITUR officio rarus sine munere iudex;
Cur, nili quod sanctum munere munus emit?

17

In Phyllidem.

SOLAREM muliebris amor non durat in annum
Phyllidis: instabilem Phyllida Luna regit.
Menstrua mente solet Phyllis, non corpore tantum,
Quovis mense pati; menstruus hujus amor.

18

In Patum, problema.

NON pater es, non, Pæte, spercer, non vitricus horum
Quos tua nupta tibi tot tulit: ergo, Quid es?

19

In Pontilianam.

NUPSISTI undecimo cur, Pontiliana, Decembris?
Nulla magis nox est longa, diesque brevis.

20 *Ad Frontonem, J. Conf.*

Multa Statuta noto pœnalia, Fronto, vocari;
 Queis titulum dederint prœmia, nulla lego.
 Publica res olim fulcris innixa duobus;
 Abrogat hæc ætas prœmia; pœna manet.

21 *Ad Edoardum Noël, Eq. & Baronet.*

Ingenium tibi mite sagax natura creavit;
 Addis naturæ viribus artis opem.
 Virtuti fortuna tuæ comes utilis hæret:
 Artis & ingenii dotibus addis opes.
 Ut miseris, fortuna dedit, succurrere posses,
 Ut velles, virtus fecit; utrumque Deus.

22 *In Festum, judicem injustum.*

Quod Judas fecit, facito; judexve Pilatus:
 Suspendi non vis, Feste? lavato manus.

23 *Paronomasia.*

Judicat ex mento, non mente, puella maritum:
 Non mens, at sponsæ menta minuta placet:
 Pungi quam pingi mavult Venus improba: semper
 Peniculo penem prætulit alma Venus.

24 *Ad Martham de Quinto.*

Prodigus est & avarus amator Quintus, amoris
 Prodigus ipse sui, Martha, avidusque tui.

25 *Tergoris & Dorfi Etymologia.*

Posteriora viri vox neutra Latina notavit:
 Utraque fœmineis moribus apta fuit.

26 *In intestatum Colinum.*

Nil moriens, Coline, tuis das: omnia linquis:
 Parcus eras vivens; porcus eras moriens.

27 *De Virginitate & Conjugio.*

Virginitas angusta via est: via latior autem
Conjugis: hinc plures ingrediuntur eam.

28 *In Panfam.*

Is inter Panfam gravis Eunomiumque magistrum
De sacris Cleri ritibus orta fuit.
Exhibet Eunomius geminos, sua biblia, testes,
Testamenta Dei non dubitanda duo.
Quid cum Scripturis inquit mihi Panfa negoti est?
Ecce Statutorum, Biblia nostra, librum.

29 *Ad D. T.*

Tu dominos sectare duos: mirabile dictu est,
Si vel utrique places tu, vel uterque tibi.

30 *Fides Mercatoria.*

Quo solet esse fides minor in debentibus aurum,
In credente fides hoc solet esse minor.
Diruit innumeros hoc tempore mercatores
(Non tutum est hodie credere) sola Fides.

31 *Gerundia & Supina.*

DI-Do-Dum Æneas aberat, caruisse Gerundis
Dicitur, & nullum nosse Supina virum.

32 *Da mihi Angelum, & ego dabo tibi Spiritum.*

Spiritus huic sanctus promittitur: Angelus illi
Michael; hic munus polluit, ille manus.

33 *Ad quendam Divitem.*

Magnus amor tuus est, si multum hoc tempore dones;
Si multum credas, est tua magna fides.

34 *Ad*



34 *Ad duarum soror. parcissimar. servum.*

TRes Parcae toto celebrantur in orbe sorores :
Expertus Parcas es miser ipse duas.

35 *Pediculus.*

TU morfu me lædis, egoque tibi infero mortem :
Est tua culpa levis, non nego ; pœna gravis.

36 *De malo in pejus.*

Incidit in Scyllam cupiens vitare Charybdim,
Qui morbum fugiens incidit in medicum.
Stulti dum vitant vitia, in contraria currunt,
Qui litem fugiunt, caufidicumque petunt.

37 *De prodigo & avaro.*

Prodigus omnis homo miser est, miser omnis avarus ;
Istius miseri filius ille miser.

38 *In R. G. vindicta Divina.*

Inviti sacras tenuisti præfulis ædes :
Te tenet invitum nunc aliena domus.

39 *In Damam.*


Promissum quoties quiddam te, Dama, rogavi,
Quod, quoniam præstas nil mihi, sæpe rogo ?
Sæpe soles, Faciam, Feci mihi dicere nunquam :
Incipe jam Feci dicere, non, Faciam.

40 *In Linum infortunatum.*

Quid mitum, fortuna tibi contraria quod sit ?
Crinita est illi frons. Line, calva tibi.

41 *Amica ad Gaurum.*

AMe nescio quæ munuscula in aure rogasti,
Si munus-culum vis tibi, Gaure, dabo.

42. *Homo Pantophagus.*

NON mare, non aer, non tellus, denique cuncta
Sufficiunt nostræ vix elementa gulæ.
Si quod edunt homines hominum substantia fiat,
Ut perhibent: Homines qualia monstra sumus?

43. *Via lata.*

LATA via est, & trita via est, quæ ducit ad orcum;
Invenit hoc, etiam se duce, cæcus iter.

44. *Ad, In, De.*

IN libris tria verba meis celebrantur: Ad, In, De:
DE docet, AD dignos laudat, & IN lacerat.

45. *In Quintum immisericordem.*

NUdus inopse tuas si quis pulsaverit ædes:
Quinte, stipem misero qua ratione negas?
Mendicare stipem prohibet lex Anglica, dicis;
Esto tamen miseris Lex dare nulla vetat.

46. *Humanum est labi.*

TERque quaterque die justus cadit, ut lego scriptum:
At quoties, scriptum non lego, justa cadit.

47. *In quendam ineptum scriptorem.*


O Utinam vel tota foret tua nigra papyrus;
Tincta foret nullo vel tua charta nigro.

48. *Faneratoris apologia.*

QUid mihi divitiæ, si non conceditur uti?
Æra nitent usu: me juvat usus opum.

49. *In Cornutum.*

SI natura daret tibi cornua, tollere posses?
Quod tibi nupta dedit, tollere nemo potest.

50 *Res Judicata.*

LEX quamvis ratio Ciceroni summa vocetur,
Et bene laudetur Lex quæ ratione probatur;
Invenies inter legistas raro logistas:
Moris & exempli leges sunt, juraque Templi.

51 *Mulier.*

FORMOSÆ sunt famosæ, juvenesque jocosæ:
Ingeniosa, sagax foemina, falsa, salax.

52 *Quatuor Termini forenses.*

TERMINUS à sancto princeps Michaële vocatur;
Legistam inprimis * Angelus iste juvat.
Terminus hunc Hilari sequitur, nec nomine vano;
Causidicos hilares Terminus iste facit.
Causidicis instar † libri paschalis habendus
Tertius; à sacro Paschate nomen habet.
Quartus habet Triadis titulum cur terminus? omni
Est in lite * Trias callida, nulla Monas.

* *Effigies Archangeli Michaelis in nummo aureo Anglicano.* † *Caster booke.* * *Cliens, Causidicus, Judex.*


53 *Crux in foro cauponario, ad Christum.*

RESTAT imago crucis, Tua, de cruce tollitur, ecce,
Christe, cruci major; quam tibi, constat honor.

54 *Duo J. Consultorum collegia, Templum Medium & Interius idem esse.*

AMBO eadem domus estis; idem Jus ambo studetis:
Inter jus medium est, Interiusque nihil.
Quæ media est, eadem magni res intima mundi;
Interius centro nam nihil esse potest.
Templum igitur Medium, medium licet usque vocetur,
A Templo differt Interiore nihil.

55 *De*



55

De iisdem.

PARlamenta duo vobis, Chorus at sacer unus:
 Atque focus vobis, ara sed una, duplex.
 Ad cœnam vos sacro idem vocat ore Magister;
 Non cornu vos ad prandia cogit idem.
 Vestra nec inspirat duo cornua Spiritus idem,
 Unica mens animat corpora vestra duo.

56

Edouardus Noël, Liber-alis.

Liber-alis multos, Mecœnas optime, servos:
 Me quoque Mecœnas optime Liber-alis.

57

Ad Faustinum.

Effe bonum dixti nostrum, Faustine, libellum:
 Si bonus est, utinam sim meus ipse liber.

58

O Tempora!

Tempora mutantur, nos & mutamur in illis:
 Quomodo? fit semper tempore peior homo.

59

Traulismus, ad Balbinum.

Sermonis quanquam vitio, Balbine, laboras;
 Nemo potest nisi tu dicerè, Pa-pa-pater.

60

Agna Oxon.

Nupta fenatori Benedicto non bene dicto,
 Credita quæ fueras Agna, reperta lupa es.

61

Ad Aulum Medicum, gratulat. Verna.

Vere novo impuri renes & viscera purgant,
 Gratulor, Aule, tibi: Ver, tua messis, adest.

62

Poëta laureatus.

Laurus in igne crepat; vivunt in funere vates;
 Fallor? an hinc vatuum præmia laurus erat?

56 Ad



63

Ad civem.

Febre laborantem decedere Phœbus ab urbe
 Te jubet, & cœlo commodiore frui.
 In tua rura redis, urbanaque lucra relinquis;
 Redditur in patrio pristina rure salus.
 Sanus inopisque iterum Londinum, rure relicto,
 Ire paras, iterum dives & æger eris.
 Pristina Febris adest, dicat jam Phœbus, utrum sit
 Utilior dives morbus, inopsne salus?

64

In Labienum, Philautum.

Solum Labienus amat, miratur, adorat:
 Non modo se solum, se quoque solus amat.

65

Vidua.

Uxorem viduam qui ducit, idem facit ac si
 In * longa vestem quærat ematque via.
 Altera vestis uti magis est, minus altera trita;
 Sic viduarum aliæ plus, aliæque minus.
 * *Long lane.*

66

Pyramus & Thisbe.

Infelix nostrum paries divellit amorem:
 Quam longe distat, quam prope, noster Amor?

67

Ad Pollum Clientem.

Lis pendet tibi Polle? semel tibi pendere præstat
 Quam pendere diu; Solve, solutus eris.

68

Frigus calidum.

Est mare frigidior muller, tamen urit amantem;
 Sic calx, in gelidam jacta, calefcit, aquam.

Q

69 Par



69

Par ma foy.

PER sanctam jurare fidem mos, non per amorem est;
Est tamen * ille Deus; non tamen illa Dea.

* Jo. in ep. I. c. 4. v. 16.

70

*Astro-
Physio- } logia.*

AStrorum in summo latet alta scientia cœlo:
In cœntro Physicæ vis veneranda latet.
Ut bonus Astrologus fiam, cœlum nimis altum
Impedit; ut Physicus, terra profunda nimis.

71 *Ad Edoardum Noël, de amantissima
ejus uxore Elizabetba, Baptiste Hicks
Equitis aurati filia.*

UT Juvenalis ait, dos est uxoria lites:
Suspikor, affirmat quod Juvenalis, ego:
Si lis, ut dixit vates, uxoria dos est;
Duxisti ditem tu, sine dote tamen.

72

In Ponticum.

NIl mihi das: donabis, ais, post funera: quare
Non moreris? bis dat, Pontice, qui cito dat,

73

Impar Congressus.

IN promptu semper strictum Matho non habet enfem;
In promptu parmam Pontia semper habet.

74 *De agris & nummis ad Pontilianum
mercatores.*

Fœtus habet certos omnisque pecunia fines:
At fundus fundo, Pontiliane, caret.

Frons



Frons plus quam cisterna valet, quam cistaeque fundus;
Sit cisterna licet, maxima, fons minimus.

75 *In famam.*

Virtutem parce laudat; vitiumque libenter
Prædicat; hinc dicta est non male fama malum.

76 *In Gallam.*

Ussisti me Galla videndo: tangere noli!
Nam si uras oculis, quid facias oculo?

77 *In Linum decrepitem.*

Saturnum dictum memorant, quia sit satur annis:
Saturnum fieri te, Line, tempus erat.

78 *Tripudium.*

Pes loquitur, quem lingua tacet, cor dicat amorem,
Lasciva argutum dum regis arte pedem.

79 *Jos. Hal. Cantabrig. Vota & Meditatt.*

Vota vovenda voves, scribisque legenda: Beatus
Qui tua vota legit, si tua vota facit.

80 *Anagramma. Ad Priscum senem.*

Cur non sunt, ut erant, crispi tibi, Prisce, capilli?
Priscus ego nunc sum, qui modo *crispus* eram.

81 *Nox Britannica.*

Dicuntur * minima contenti nocte Britanni;
Contenta est longa nocte Brittanna frui.
* *Juven. Sat. 2.*

82 *Ad Næviam.*

Sol fugitur præsens, idemque requiritur absens;
Quam similis foli est, Næviam, noster amor?

83 *In Festum mendacem.*

O Mnis homo est mendax, puto, Feste, fatebris: ergo
Mentiris dicit, qui tibi dicit, Homo es.

84 *In Carpophorum.*

Cum ridente foris ridet simulator amica
Carpophorus: flet cum conjuge fiente domi.

85 *Mundus.*

In mundo mundi duo sunt, mundissimus alter,
Immundissimus hic, Mundus uterque tamen.

86 *Ad G. J. Mercatorem.*

Quo cui plus dederis, magis hoc tibi fiet amicus:
Quo plus credideris, hoc magis hostis erit.

87 *Satis-datio & Satis-factio.*

Vox in Cæsareo sit Jure satis-dare quamvis
Crebra; in Pontificum Jure, satis-facere:
Juristæ satis accipiunt, ac raro satis-dant.
Multa satis dicunt, raro satis-faciunt.

88 *Wichamicus.*

Pompejanus ego non sum, non Cæsarianus:
Non sum Syllanus, sum Marianus ego.

89 *Contra illud quod vulgo dici solet. * Fratrem juniorem seniore generosiorē esse.*

Autor Adam generis, quo non generosior alter:
Nempe creatori proximus ipse suo.

Ergo proximior quo quis numeratur Adamo,
Hoc generosior est, proximiorque Deo.

* The younger brother the ancients Gentleman.

90 *Deum nemo vidit.*

Infcia mens Numen non cernit; noctua lumen:
Non videt ista diem, non videt illa Deum.

91 *Senex non est homo.*

Risibile est animal juvenis: mulierque puerque
Flebile: dediticic fccus utrumque senex.

92 *In Saracenum, Atheum.*

Afficit insipidum quasi fabula te sinus Abre;
Malles in Saræ tu recubare sinu.

93 *Mos.*

Consuetudo & mos vim legis habere videntur;
Improbilas hodie vim quoque legis habet.

94 *In Albinum.*

Perdidit Albinus mercator remque fidemque;
Nil ultra, quod jam perdere possit, habet.
Perdidit idem Albinus amator spemque fidemque;
Quid superest quod jam perdere possit? amor.

95 *Anagramma.*

Vox eadem gerere & regere est: omenque notandum
Ut regat uxorem vir, gerat illa virum.

96 *Amator desertus.*

Ignis ut inferni, quamvis non luceat, ardet:
Sic tuus haud lucet, me tamen urit, Amor.
Igni elementari similis meus est amor in te:
Lucet enim, sed te non meus urit amor.

97 *De pœna Thaidis, problema.*

Cur, quæ peccavit non tergo, at pectore Thais,
Carnifici in pœnam tergora nuda dedit?



An quia culpa præit, sequitur sua pœna nocentem;
Judex in pœnam posteriora petit?

98 *Iri exsequia.*

QUartanz par est pauper: campana perempti
Pauperis in tacito funere nulla sonat.

99 *Cræsi & Iri Epitaphium.*

Hic jacet, hic situs est Cræsus sub marmore: quaris
Irus ubi jaceat pauper? ubique jacet.

100 *In Momum.*


N^{il} in te video quod amem, laudemve, probemve:
Nil in te video, Momus, quod invideo.

101 *Unitatem non esse numerum.*

SCRIPTORES inter: peregrinos atque Britannos,
Nullius numeri sum, tamen unus, Ego.

Finis Libri primi.





EPIGRAMMATUM
JOANNIS AUDOENI,
OXONIENS. CAMBRO-BRITANNI,

Ad

GUILIELMUM SIDLEY,
Equitem & Baronetum,
LIBER SECUNDUS.

I *Ad Criticum Aulicum.*

NIl distant labor atque labos, nihil arbor & arbos;
Idem honor est & honos: qui rapit ergo, sapit.

2 *Fides.*

NOs ratio docet esse Deum, cogitque fateri;
Hac ratione, Fides est rationis opus.

3 *Deus.*

OMnia cum videat, nulli Deus ipse videtur;
Solutus ubique patet, solus ubique latet.

4 *Ad Guil. Sidley, Equit. & Baronet. &c.*

TE linguæ variæ decotant & pagina legum;
Exornant artes & pietatis amor.

Consilio multis, opibus succurris egenti:

Hoc virtutis iter; Cætera mortis erunt.

Sic tibi, sic Christo, patriæ, patriæque parenti

Vivito; post mortem Te meliora manent.



5 *Ad ejusdem unicum filium, Jo. Sidley.*

JANUS es, at solo, juvenis jam, nomine: docti
Æmulus esto patris, re quoque Janus eris.
 Vix erit, ut possis doctum superare parentem:
Æqualis patri filius esto, Sat est.

6 *Æquinoctium perpetuum. Ad cæcum.*

Æqua fuit noctique dies tibi, noxque diei;
 Non tamen æquator linea quæque tibi.

7 *In Anabaptistam Ponticum.*

SI sanus vis esse, sacram servato dixtam,
 Pontice: cœnato sæpe, lavato semel.

8 *Dii inconstantia.*

Vertumnum celebrant Romani: Protea Graji:
 Quæ jam non Tellus Numen utrumque colit?

9 *Axungia.*

NE ficcus volvente rota crepet, ungitur axis:
 Causidicum mos est ungere, ne taceat.

10 *In Harpalum, duorum filiorum,
 (ut putatur) patrem.*

QUI nomen gerit iste tuum, tuus, Harpale, non est:
 Alterius nomeq qui tulit, hic tuus est.

11 *Creatio Mulieris.*

PAULUS Evangelium populo dum prædicat omni,
 Alloquitur * nostrum, non muliebre genus.

Orate ô fratres, (at non Orate sorores,)
 Presbyter in Missa, dum sacra mussat, ait.

Temporibus divisa suis dum singula stricim

Explicat, artificis Numine facta Dei:



Qui bonus est, frustra que nihil nec inutile fecit,
 Vidit, ait Moses, hoc Deus esse bonum.
 Additur hæc operi solemnis clausula semper,
 Excepto, postquam scemina facta fuit.

* *Viri ; patres & fratres*

12 *In Papinianum & Ponticum.*

Posse errare negas te, Papiniane ; sed erras :
 Tu te errare negas, Pontice ; posse putas.

13 *In Tustonum.*

Mortuus est Tustonus : opes de morte resurgunt,
 In cumulo ut tumulo quæ jacuere diu.

14 *De pœna & culpa.*

Doctores peccata inter non entia ponunt :
 Cur non peccati pœna sit ergo nihil ?

15 *In Mauros, qui Angelos nigros, Dæmones albos pingunt.*

Innatum nigror non exuit arte colorem :
 Albus in adversum vertitur arte color.
 Posse negant sancti resipiscere dæmona patres :
 Non est ergo Satan candidus ; Hic niger est.

16 *L'Argent fait tout.*

Unde sit ut Franous post tot, post bella tot Anglus
 Integer in solito regnet uterque solus ?
 Protexit generosa tuum te Francia * scutum :
 † Angelus est custos, Anglia tuta, tuus.
 * *L'Escu.* † *L'Angelot.*

17 *In quendam ebriosum.*

Garrulitate nihil sicca sitibundius ; uxor
 Te tua plus loquitur : cur bibit ergo minus ?



18 *Verona, Placentia, & Beneventum;
Ad Italum.*

VERONA Beneventanam raro itur ad urbem;
Esto Placentinus: tu * Bene-ventus eris.
* *Ben venuto per tutto.*

19 *Tempus, Veritas, Odium.*

MATER * Aletheia est Odii, sed filia longi
Temporis: est Odium. Temporis ergo nepos.
* *Veritas.*

20 *Temporis filia.*

DICTA fui à priscis quæ filia Temporis: hujus
Temporis, an prisci filia dicar ego?
Temporis illius, non filia temporis hujus:
Temporis æternus Filia Christus erat.

21 *Amor conjugalis.*

PLURIMUS in cœlis amor est, connubia nulla:
Conjugia in terris plurima; nullus amor.

22 *Decalogus, Oratio Dominica, & Sym-
bolum Apostolicum.*

UNUS amor, præcepta decem: spes unica: vota
Sunt septem: articuli sex bis, at una fides.

23 *Ad Callistratum.*

SPLENE laboranti male num, Callistrate, dixi?
Splēn ridere facit, splēn quoque flere facit.

24 *Sol.*

TRES infra, totidemque supra te, cerno planetas:
In medio virtus maxima, Phœbe, tua est.

25 *Metaphora.*

NATURÆ linguam corrupta scientia nescit;
Naturæ voces lexica nulla notant:

Sensu



Senſa figurato promit ſermone colonus ,

Geſtit & urbano ruſticus ore loqui.

Vita quoque ornatur variis , ut lingua , figuris ;

Tota figurata eſt : Vivimus , ut loquimur.

26 *Chriſtus Theol. Med. & J. Conſ.*

Theologi Medicique in terris munere functus ,
In cœlo peraget Judicis officium.

27 *De jure Anglico-Wallico-Gallico.*

Di-rectum * Gallus , † Cor-rectum Wallus , at Anglus
Nomine Jus * Rectum ſimpliciore vocat.

Dirigit errantes Lex lucida , corrigit omnes
Errores ; Juris Regula cuncta regit.

* *Droit*. *Italice Diritto*. † *Cyfraaith*. * *Right*.

28 *Caſtor & Pollux.*

Concordes duo ſunt in Cœlo ſidera fratres ,
In Terra unanimis vix reor eſſe duos.

29 *Quod differtur , non aufertur.*

Differt , non aufert mortem longiſſima vita :
Quid differt igitur cras hodieve mori ?

30 *Honoris venal. Apologia. Ad Baronetos.*

Aurum arvumque & honor Fortunæ ſunt bona fortis ,
Quicquid & humano pendet ab arbitrio.

Forma , valetudo , vires , bona corporis almi ,

Non poſſunt pretio , nec bona mentis , emi.

Impietas animam eſt ; inſania vendere corpus :

Fortunam fas eſt vendere ; fas emere.

31 *Autoritas & Ratio.*

In diſtis hominum non Quis conſidero , ſed Quid ?

Contra in divinis , non rogo , Quid ? rogo , Quis ?

32 *Lu-*



32

Lucifer.

STella ~~noctans~~ Veneris nocturna diurnaue noctem
 Nunciat inducto vespere, mane diem.
 In Cælo semper Solem comitatur euntem,
 In Terra lucem cur fugit ergo Venus?

33

De fine mundi.

NArravit Moses Genesin, primordia mundi:
 Exodon at nobis dicere non potuit.

34

Ad Pontilianum.

UXore sine bonas binas tibi præstet, an unam
 Ducere difficilem, Pontiliane, rogas?
 Alterutrum si sit mihi ferre necesse malorum;
 Quod minimum est, unam ducere malo malam.

35

Perfectio legis Amor.

EX his quinque duo præceptis, æque duobus,
 Unum servato, sufficit illud; Ama.

36

Devotio.

Divitiis Cleri peperit devotio vulgi;
 Degenerem prolem relligiosa parens.

37

De Cælo & Terra.

Terra oculos prope tota latet; patet undique Cælum:
 Humani generis te puto, Terra, pudet.

38 *Ad Aulum. In Sextum, de Quinto.*

Invidet, Aule, mihi Sextus; miseresco ego Sexti;
 Quinto, qui mihi non invidet, invideo.

39

In Pollionem.

Deseris uxorem; quo jure relinquitur? ante
 Conjugium à multis tacta probatur, ais.

Conju-



Conjugium præ-contractus, scio, non nego, frangit,
At præ-con-tactus, Pollio, non dirimit.

40 *Mera trica. Ad N.*

ESse meras tricas meretrices, haud male dixti;
Scorta tamen raras in cute τριχας habent.

41 *Ad Pannicum exsulem, problema.*

Liber in exilio quodammodo, Pannice, vitam.
Nunc agis, in patria qui prius exsul eras.

Utra magis fortunarum tolerabilis harum?

Extera libertas, exsiliumne domi?

Quæ mea sit si forte rogas sententia? Malo,

Esse relegatus quam religatus ego.

42 *Vespere.*

Sol abiens paulum lucis post terga relictum
Monstrat; uti Mosi posteriora Deus.

Mane.

Nos pulchram Phœbi faciem surgentis Eos
Cernimus; Antipodes posteriora vident.

43 *Baptismus. Ad Judæum.*

L Otio Baptisma est; at Circumcisio vulnus:
Curantur sacra vulnere legis aqua.

44 *Heautontimorumenos.*

D Um mortem vitare studet, vitamque tueri,
Se toto vitæ tempore torquet homo.

Bruta bonis fruitur præsentis bestia vitæ;

Dum vivit, vixit; cum moritur, moritur.

45 *Ad Guil. Sidley, Equit. & Baronetum.*

Æ Re merces, & Tu virtute mereris honorem,

Cum te nec mereat, nec mereatur honor.

46 *Ad*



46

Ad J. P.

GRæco-Latina, sagax, sapiens tibi quaeritur uxor;
 Quæque figurate syllogizare sciat:
 Quæ cum Majorem præsumserit atque Minorem,
 Ex male præsumtis urgeat ergo sequi.
 Versata in parvis quæ naturalibus olim
 Virgo; Magistra Artis nunc fit in arte sua.
 Et respondeat opponentibus omnibus una,
 Cumque suo, de omni differat Ente, proco.
 Tam rationalis mihi si contingeret uxor;
 Mutarem tecum, si tua bruta foret.

47

In Ramistam bimembrem.

Definis primum, tum dividis omnia; rursus
 Definis: iterum dividis omne genus.
 In tot particulas generalia singula scindis,
 Longior ut Me'9od' fit tua, quam fit o' d'9s.

48 *Ad S. Paulum. De Civitate Dei.*

Verberibus cum cæsus eras, defensio præfens,
 Civis Romanus sum; tua, Paule, fuit.
 Judicii suprema dies cum venerit, an tum
 Sæt, sum Romanus, dicere, civis erit?

49

Christus.

Venit in hunc mundum: vidit mortalia; mortem
 Vicit; & ad superos in sua regna redit.

50 *Ad G. Camdemum, Magnæ Britannia
illustratorem maximum.*

Infula pene suis obliviscenda Britannis,
 Mox in lethæos præcipitanda lacus.
 Hoc tibi quod superest, Camdene, Britannia debet:
 Tu quoque dum superest illa, superstes eris.

51 *Ad*

51 *Ad Perpennam.*

EST tibi lunatæ, Perpenna, Parenthesis instar,
 Inter cornua frons? dura Parenthesis hæc.
 Dura Metathesis hæc, uxor tua prodiga carnis
 Tota * Κεῖας, totum te facit esse † Κεῖας.
 * caro. † cornu.

52 *De vitiis & divitiis.*

Nemo hominum vivit sine crimine, sive crumena;
 Crimine rara suo plena crumena caret.

53 *Mortis & Macelli apologia.*

Mors nisi mactaret juvenes, lanisque juvencos;
 Omnia stultorum plena boumque forent.

54 *Heva & Proserpina collatio.*

HEvam delusit serpens, Proserpina Ditis
 Capta dolo, vana spe specieque boni.
 Exiit Heva parens Paradiso, cur? quia malum
 Edit; at in malo nesciit esse malum.
 Inferno exisset, malum Proserpina si non
 Edisset, taciti nescia virgo mali.
 Heva fuit mortis, Proserpina præda Plutonis;
 Illa fuit Jovæ filia, & ista Jovis.
 Utraque gustavit vetitum, pœnasque pependit;
 Hæc flores, fructus dum legit illa, petit.

55 *Astrologus & Geographus.*

Dividitur totus vos inter maximus orbis;
 Cælum est Astrologi, Terraque Geographi.

56 *Ad Fanniam, nobilem, pulchram
& pauperem.*

Indotata viro locupleti nubere quæris,
 Fannia? paupertas irrita vota facit.



Sis ortu generosa licet, speciosaque vultu,
Sordidus externas ambit amator opes.
Prima Categorias inter, Substantia sola
Plus in amore potest, quam Genus & Species.

57 *Con-sci-entia.*

IN verbis nunc hæret Amor, non rebus, ut olim:
Pendit hæc à sensu, non ratione, Fides.
In caput adscendit, quondam quæ in pectore sedit
Religio; cerebri est, quæ modò cordis erat.

58 *Sacrificium mundum.*

Hic mundus Templum domini; crux ara, sacerdos,
Et mactanda Deo victima, Christus Homo.

59 *De peccato M. & V. Ad Christum.*

Mors tua peccati duplicis discrimina tollit;
Quod mortale fuit, crux veniale facit.

60 *In In-hospitales.*

A Specta non ego sum domuum, non hospes earum,
In quarum foribus Janua limen amat.

61 *Alter-idem.*

Αὐτὸς, non ἕτερος mihi sit, mihi qui sit ἕταρος:
Sit comis, quisquis vult meus esse comes.

62 *Sinite parvulos venire ad me.*

LEna procaxque caro juvenes in devia ducit;
Mentis at improbitas in sene major inest.
Suspicio hinc, juvenes in cælum ascendere paucos:
Paucos in cælum suspicio ire senes.

63 *In Paracelsum.*

DIScipulos terræ esse salem cum dicat Jesus,
Esse salem terram cur Paracelsus ait?

64 *De Ovis.*

Induit humanam persona secunda figuram :

Oviparæ formam tertia sumit avis.

Piscibus atque avibus benedixit Conditor orbis ;

Vivi-paris bene non dixit, at ovi-paris.

65 *De Roma & Mundo.*

Roma vetus quadrata fuit, Mundusque rotundus ;

Nunc Mundus quadra est, & nova Roma rota.

66 *Generatio Magica.*

Illudat formosa viro quasi succuba dæmon ;

Ex hoc concubitu non generatur homo.

Incubus at Serpens ; mulier sit succuba : Nasci

Ex Satana soboles & muliere potest.

67 *De Pane & Butyro.*

Invenio nostræ veneranda vocabula lingux,

In Genesi * Bara, † Menin in Iliade.

* Bara, prima vox Genesii. † Menin, prima Iliadis.

Bara autem Cambro-Britannice panem, Menin butyrum significat.

68 *Ætas Moſis & Davidis.*

Vivet homo (a) centum viginti, Moſche ait, annos ;

Et Moſes annos (b) tot super ipſe fuit.

Vita hominis (c) ſeptem-deni (dixit David) anni :

Quot dixit, vixit, (d) ſeptuaginta, David.

Annos quot ſtatuit vitæ, tot vixit uterque :

Ergo propheta fuit mortis uterque ſuæ.

Qui Moſen numerare ſuos, David optime Regum,

Iſte tuos docuit Te (e) numerare dies.

(a) Gen. c. 6. v. 3. (b) Deut. c. 34. v. 7. (c) Pſal. 90. v. 10. Pſalmus hic vocatur Oratio Moſis, hominis Dei. (d) 2. Sam. c. 5. v. 4. (e) Pſal. 90. v. 12.

R

69 Nu-



69 *Numerus par & impar.*

OMnis habet medium, sed dimidio caret Impar:
Dimidium omnis habet par, medioque caret.

70 *Medici & JC. collatio. Ad Galen.*

TE formidati metuunt, Galene, Tyranni;
Stat regum in vestra vitæque mortisque manu.
Arbitrium vobis vitæ, mortisque potestas
Summa data est, uri proxima pene Deo.
Nos damnare neci sed non sine crimine Iudex,
Non sine teste potest; tu sine utroque potes.

71 *De Grege, Rege & Lege.*

REx pastor, populique greges sunt, pabula leges;
Æger Grex: Medicus Rex: Medicinaque Lex.

72 *Ortho-graph. & Fides Orthod. Ad Ebr.*

LÆva sinistrorsum, dextrorsum dextera tendens
Non bene Naturæ convenienter eunt.
Tendat at in dextram si læva, aut dextera lævam,
Concurrent geminæ convenientque manus.
Ebræi vos ortho-graphi, nos ortho-que-doxi;
Spiritus est noster: Littera vestra manet.

73 *Pauci electi.*

SOLus & omnis homo cælorum Numen adorat;
Peccat in hoc Numen solus & omnis homo.
Solum omnemque hominem venit servare Redemptor;
Servatur solus, non tamen omnis homo.

74 *De salinis. Ambiguum.*

ANglorum ingeniosa licet generosæque gens sit;
Anglus emit parvo sal, minimoque sales.
Sit quamvis albus Britonum sal, Gallicus ater;
Pluris quam noster venditur iste niger.

75 No.

75 *Novitas.*

QUæ nova sunt, non semper erunt nova; nulla placebunt
 Ergo diu, sola quæ novitate placent.
 Non sola placuisse igitur novitate videntur;
 Sed bonitate nova, quæ placuere diu.

76 *Homo-non-Homo.*

Gignit iners natura homines; homo condidit artes:
 Ars opus est hominis; non opus artis homo.
 Nemo ducem sequitur Naturam; vivitur arte:
 Factus homo est operis nunc opus ipse sui.

77 *Autores peccati. In Grammaticastros,
Autores errorum.*

NON bene Grammatici confunditis autor & auctor:
 Pythagoras quicquid dixerat, αὐτὸς ἔφα.
 Peccatum, infelix produxit, originis, arbor:
 Unde per exemplum noxius edit Adam.
 Peccati serpens autor; dux fœmina facti;
 Criminis Autor Adam non erat: Auctor erat.

78 *Anagramma Diaboli.*

Διάβολος, Βία, Δόλος.
 vis, fraus.

Circuit, & quærens quem devoret, ut leo, Dæmon
 Errantes animas vi quasi ventus agit.
 Instruit occultas Satan, ut vulpecula fraudes;
 Quos vi non potuit perdere, fraude ferit.

79 *Facere & Docere. Act. c. i. v. i.*

Nuda sacerdotis docti bene credere inertem
 Verba docent populum: Vivere vita docet.
 Ut decuit docuit qui re sua verba probavit;
 Plus malefacta nocent, quam bene dicta docent.

80 *Fœnus & sors.*

Sorte tua contentus abi : rem fœnore turpe est
Quærere : contentus vivito sorte tua.

81 *Inventio veri. Ad Dubitantium.*

Dicitur, invento post mille pericula vero,
Pythagoras totum sacrificasse bovem.

Hinc tam difficilis facta est inventio veri,
Ut tibi sit vitulum sacrificare satis.

82 *Circumcisio & Baptismus.*

Circumcisus eras & baptizatus, Jesu
Christe ; tibi neutro cum tamen esset opus.

Si purganda parum est utrumque ad crimina ; quare
Alterutro tamen fas mihi, Christe, frui ?

83 *Sapientia due, Salomon & Jesu filii Sir.*

Ponitur Apocryphos inter Sapientia libros
Utraque : semper erit, qui sapit, Apocryphus.

84 *In avaros : Vende omnia quæ habes,
& da pauperibus.*

Occidit miseros hæc Littera tristis avaros ;
Quidque sibi velit hic Spiritus, usque rogant.
Spiritus hoc sibi vult, quod vos non vultis, Avari :
Pauperibus dare vult omnia ; vosque nihil.

85 *In Sextum, Anabaptistam.*

Visibilis sit necne Ecclesia, Sexte requiris ?
Vestra invisibilis, nostraque visibilis.

86 *Exsulis solatium.*

Non extorris ero, dum vivam terraque stabit :
Nec dum terra solum dicitur, exsul ero.



In cœlis extra terramque solumque beatus.

Mortuus ex-torris, mortuus ex-sul ero.

87 *Venator, Piscator, Auceps, Homo.*

Divitias & opes venor: laudes & honores

Aucupor: expiscor mystica: scire volo.

Dum stultus desidero scire, superbus honores

Ambio; vilis opes: inter-ea-inter-eo.

88 *De iisdem.*

Disturrit canis in terra, piscisque profundo

Innatat; ad cœlos avolat ales avis.

Fertur in occultum sapiens cum pisce profundum:

Ambitiosus avi par, avidusque cani.

89 *Solatium pedestrium.*

Non equus ad cœlos generosum Castora vexit:

Nec puto Triptolemum currus in astra tulit.

Semita cœlorum est angusta, pedestribus apta:

Ambulat in lata currus equusque via.

90 *Cera.*

Utiliter triplex ego sum; sacra, iusta, salubris:

A mystis, medicis, juridicisque color.

91 *In quandam formosam instabilem.*

TE Rex astrorum decorat, Regina gubernat:

In vultu Sol, in pectore Luna tuo.

92 *De Anima & corpore.*

Appellant Graji servos sua * *σάματα* quare?

Nam mens in serva libera carne latet.

Corporis est dominus, dominus; Rex corporis est rex.

Non animæ, soli noscitur illa Deo.

Corporis est genitor, genitor, mens Numine divum

Ducit ab ingenito non generatâ genus.

* *Corpora.*

93 *De Miraculis Christi. In incredulum.*

Non tibi tanta fides, facere ut miracula possis,
Tanta nec, ut possis credere facta, fides.

94 *Testamentum vetus.*

Usque ad testantis mortem suprema voluntas
Ambulat, & nullo jure valere potest.
Ergo Patris testamentum vetus unde vocetur
Nescio, cum mortem nesciat ipse pati.

95 *Testamentum novum.*

Hoc testamentum Christique novumque vocavit.
Nescio quis primus; quisquis at ille fuit,
Nulla tamen, dum testator superesset Jesus,
Testamenti hujus littera scripta fuit.

96 *Errorum plena sunt omnia. Cic.*

Ægrotant Medici, fraudantur Jure-periti,
Descendunt multi in tartara Thciologi.

97 *Contra omnes gentes.*

Condidit in terris hominem Deus unicus unum;
Factus homo multos fecit in orbe Deos.

98 *In Atheos.*

Primus in orbe Deos fecit timor? est tamen, eheu!
Pene Dei reliquos nullus in orbe timor.

99 *Ad Mecænatem suum, Guil. Sidley, &c.*


Longævi quis non optet tibi Nestoris annos?
Vota facit vatum qualia vulgus iners.
Annum, non annos tibi plures opto; sed Annus
Hic, mea si valeant vota, Platonis erit.

100 *In Cottam, paup. & inept. scriptorem.*

Sæpe novis opus esse inopi tibi vestibus, inquis;
Est opus ingenio plus tibi, Cotta, novo.

Finis Libri secundi.

EPI-



EPIGRAMMATUM
JOANNIS AUDOENI,
OXONIENS. CAMBRO-BRITANNI,

Ad Mæcenatem suum,
ROGERUM AUDOENUM,
Equitem auratum,
LIBER TERTIUS.

1 *Ad Rogerum Owen, Mæcenatem.*

EST tua, virtutis studium, prope propria virtus;
Hanc tu sponte foves, ingenioque faves:
Alterutrum in quocunque vides, amplecteris ultro;
In te mensura cum sit utrumque pari.

2 *In Ponticum, sanum insanum.*

PROspera te fecit fortuna, salusque superbum:
Cum fueris æger, Pontice, sanus eris.

3 *Quota hora est?*

VIVenti mors obrepit, juvenique senectus;
Horæque dum quota sit quæritur, hora fugit.

4 *Bacchi Apotheosis.*

VINum vera vetus promit; mysteria prodit;
Sicca latent hominum pectora; pota patent.
VINum cor aperit; renes Rhenensia vina
Scrutantur, Bacchum quis neget esse Deum?



5 *In Labienum taciturnum.*

SI sapiens, es stultus, cum nō, Labiene, loquaris :
Sive, quod es, stultus sis, Labiene, sapiens.

6 *Fides cerea.*

CREdebant nummos sine chirographo, sine cera
Sinceri veteres, nunc sine utroque nihil.

7 *Ad Firmicum. De septem planetis.*

SOL aurum Astrologo est; argentum Cynthia; cuprum,
Alma Venus: (Veneri patria Cyprus erat)
Mercurius vivum argentum; Mars funebre ferrum;
Jupiter est stannum: plumbeus huic pater est.
Accipe de septem tibi, Firmice, quinque planetas:
Sat mihi Sol solus; Luna fat una mihi.

8 *In quendam illiberalem.*

CARmina de cœlo possunt deducere Lunam;
Ex Loculis Lunam carmina nulla tuis.

9 *Primatus maritalis.*

NOcturnum imperium muliebri, virile diurnum est;
Régna enim noctu Cynthia, Solque diu.

10 *In quendam.*

PLuma supra caput est, & sub pede suber: utrumque
A capite ad calcem te probat esse levem.


11 *Fides.*

ASTra oculus vicina, polum sed opinio cernit;
Sic oculo cœlum cerno; Fideque Deum.

12 *Ad Thomam, Baronem de Ellesmer,
Cancellarium Angliæ, &c. 1612.*

AMissus tibi filius unus, & unica nuper
Filia: adhuc superest unus, at ille trium

Instar



Instar Joannes, natorum summa tuorum,
Summus adhuc superest, non modo summa trium.

13 *Contemptus Mundi.*

FELicem vitam vis vivere? spernito vitam:
Vivit enim misere, cui sua vita placet.

14 *Ad Robertum Carum, Vicecomitem
Rocestria, & Henricum Danvers,
Baronem de Dantesay, &c.*

JACOBOS tu quinqus, & tu mihi quinque dedisti:
Non temere vobis disticha quinque dedi.
Me vestro nec amore licet nec munere digner:
Si tam cara forent cætera, dives eram.

15 *Ad amicum cælibem.*

UReris? uxorem ducas; non expedit uri:
Conjugis in gremio mortificanda caro est.

16 *In Baldinum.*

EDidit indignos in lucem luce libellos
Baldinus, dignos attamen igne libros.

17 *Decalogus & Symbolum.*

CUr credenda mihi faciendis plura jubentur?
Non tam difficile est credere, quam facere.

18 *Scientia & Charitas.*

SUNT duo noscendi, duo sunt mihi semper amandi:
Numen & ipse Ego; Numen & alter Ego.

19 *De Decimis. Ad Laicos.*

QUæ venit hinc fructus, fructus supereminet omnes,
Posterior nono est undecimoque prior.
Quam bonus en Deus est, sibi qui non exigit ipse
Plus decimo, vobis qui dedit ipsa decem?

20 *De Deo & Mundo.*

Non est in mundo Deus hoc; hic mundus in illo est:
Hoc sumus in mundo nos, utinamque Deo.

21 *Jus Decimarum & Primitiarum.*

Omega & Alpha Deus: rerum petit ergo tuarum
Jure sibi decimas primitiasque Deus.

22 *Spes, Fides & Charitas.*

Solus amor nobiscum intrat penetralia cœli,
Non habet in cœlo spesve fidesve locum.
Credendum post funera nil erit omnia cerno:
Sperandum mihi nil, omnibus ecce fruor.
Semper erit quod ametur: Amor post funera vivit,
Dum Deus in cœlis ipse superstes erit.

23 *Ad seipsum.*

Cui jacet in clausa nummus quasi mortuus aëra,
Argenti vivi nil Polydorus habet.

24 *Ad seipsum.*

Bibliopola tuos ambivit, Oëne, libellos,
Dixisti pretium versibus; ille dedit.
Excusus liber exstat; emis tua carmina nummis:
O miser! ingenium vendis emisque tuum.

25 *In uxorium.*

Clayum in puppe tenes, at te tua cymba gubernat;
Quæ gerit, hæc eadem te tua cymba regit.

26 *Conjuges. Duo in carne Una.*

Corpore mistorum nisi Cor amor uniat: ambo
Non fiunt Unus; sed fit uterque Duo.

27 *Homo*

27 *Homo solaris.*

SOL semper rapido currit contrarius orbi:
In cursu vitæ Solem imitetur homo.

28 *In Montanum.*

INGENII Montane tui est vigor igneus: unde
Colligis hoc? inquis; Nascitur igne nihil.

29 *Londinum.*

URBS sterilis fructus agrorum in stercorea vertit:
Fertilis in fruges stercorea vertit ager.
Tu victum debes avido vitamque colono;
Debet stercoreibus non minus ille tuis.

30 *Ad amicum cogn. Theod. Prife, Theol.*

SEMPER in incerta re tu mihi certus amicus:
Ne sit amicitiae nomen inane, caves.
Quem verbis profiteri, probas tu rebus amorem:
Linguae vocali consona vita tua est.

31 *De Atheis & Polytheis.*

TOT timet esse deos quot fert incommoda pauper;
Esse Deos nullos sperat Avaritia.
Impietate minus, quam Copia, peccat Egestas;
Ista Deos posuit, sustulit illa Deum.

32 *Soli (ci) tudo. Ad Ponticum.*

NOſſe dicque aures clamoribus uxor adimplet,
Te tua sollicitum, Pontice, semper habet.
Quid superest remedi? de soli(c)itudine tanta
Tertia dematur syllaba; salvus eris.

33 * *F-A-S.*

SPE coelos & Amore Fideque ascendere FAS est,
Absque tribus coelos his penetrare, NE-FAS.

* *Fides, Amor, Spes.*

Spes



Spes lævæ dextræque Fides assistit Amori:
Virtus in medio maxima constat Amor.

34 *Ad doct. & disertum Eq. Rog. Owen.*

ESse videreris juvenis, doctissime, si vel
Surdus ego, vel Tu mutus, Oëne, fores.
Te juvenem credat nemo, nisi clauferit aures:
Te, si non claudat lumina, nemo senem.

35 *Octo.*

SERVator mundi pronunciat octo beatos:
Servatrix quatuor-bis beat Arca Noë.

36 *De primatu viri, problema.*

CUr Deus omnipotens ex conjuge condidit Evam?
Congeneri ne se diceret esse parem.
Si terra prognata foret, soror esse Adami;
Seque parem fratri crederet Eva soror.

37 *Conjux.*

INferior cum sit quævis matrona marito,
Unica cur sexum signat utrumque nota.
Cur æque conjux vir & uxor uterque vocatur?
Uxor enim non est æqua, at iniqua, viro.

38 *Epigramma.*

EST nostrum, quorum est epigrammata scribere munus;
Quolibet ex ligno Mercurium facere.
Verfor ego in verbis, veluti Paracelsus in herbis;
Subjicit ille sibi res, ego verba mihi.

39 *In Paulam fœminam lectissimam.*

MIraris, quare lectissima Paula voceris?
In medium lectus te tenet usque diem.

40 *In quendam litigiosum.*

CAusfidicus si non esses, litelque creares :
 Causfidicus quamquam sis, morerere fame.

41 *Lectio sacrorum.*

ET latro & cautus præcingitur ensè viator ;
 Scripturam Hæretici Catholicique legunt.

42 *Ad Jo. Williams, Cambro-Brit. Oxon.
 Theol. D. & Collegii Jesu Principalem.*

Scrutaris Tu scripturas Veteresque Novasque :
 Janus es ; à tergo quid sit , & ante , vides

43 *Ad Jo. Williams, Camb. Britt. Cantab.
 Theol. & Collegii S. Joannis Socium.*

Ingeniose tuum Juvenis ne conde talentum :
 Cambrorum per te perpetuandus Honor.

44 *Ad Jo. Williams, Cambro-Britt.
 Londinens. Regis Aurificem.*

Civile ingenium plus quam civile videtur
 Jane tuum ; plus , me iudice , cive sapia.

45 *Ad eosdem.*


TRes mihi cognati, mihi vos tres estis amici ;
 Tres Jani , vester. sum quoque Janus ego.

46 *Ad Creditorem.*

Est tibi , qui debet , servus ; qui solvit , amicus :
 Debita qui non vult solvere quid ? Dominus.

47 *Veritas in profundo. In fucatam.*

Falsa patent , at vera latent ; in te patet istud :
 Nam faciem fictam , cætera facta geris.



48

In Phyllidem.

DAs gratis ; at Phylli negas tamen oscula gratis :
Ingratum & gratum est , quod dare Phylli soles.

49

Gravitas & Levitas.

Sint gravitas levitasque sibi contraria quamvis ;
Sit grave nolo meum , sit leve nolo caput.
Quorum utrumque malum est , odi contraria ; conjux
Sit mihi nolo levis , sit mihi nolo gravis.

50 *In garrulum, morbo colico laborantem.*

Lingua loquacior est , culus taciturnior æquo,
Illa loquendo homines , iste tacendo necat.

51

In Theologastrum Sophistam.

Quid tibi neglecta virtute scientia prodest ?
Define jam verum querere : quære bonum.

52

Actio & Passio.

Qui mala multa facit , patietur multa vicissim :
At mala qui patitur plurima , pauca facit.

53

Resipiscentia, & Reminiscentia.

ME miserum meminisse dolet jam , quæ mala fesi
Plurima ; quæ passus sum , meminisse juvat.

54

Damnatus.

Tristis , & undecimo tua par fortuna Decembri ;
Post lucem sequitur nox tibi longa brevem.

55

Beatus.

Undecimo Juni tua par fors læta videtur ;
Post noctem fulsit lux tibi longa brevem.

56 *Fœlix & Festus.*

Infestus tibi Paule fuit sanctissime Festus :
Infelix Fœlix, & tibi Paule fuit.

57 *Democritus & Heraclitus.*

Temporis iste sui casus & crimina flevit,
Risit stultitiam temporis ille sui.
Semper erunt miseri mortales, semper inepti,
Hic ut in æternum rideat, ille flect.

58 *Semper* } *Idem
Eadem
Idem.*

Spes eademque Fides sit semper; Amorque sit idem;
Ingeniumque tibi sit sibi semper idem.

59 *In ignorantem arrogantem, Linum.*

Captivum, Line, te tenet ignorantia duplex :
Scis nihil, & nescis te quoque scire nihil.

60 *In Poëtam Mævium.*

A Non-ente malum, Mævi, nil discrepat; ergo
Plurima cum facias carmina, nulla facis.

61 *Helena & Penelope.*

Tyndaris Iliadem fama super æthera vexit :
Implet Odysseam gloria Penelopes.
Penelopes-Helenæ morientur nomina nunquam :
Hæc quoniam voluit, noluit illa, rapi.

62 *Vita.*

Vitam si texit Natura, ut aranea telam :
Longus, at in lapsum pronus, uterque labor.

63 *In Paulam.*

U^Suris vir , Paula , tuus , tu corporis usu ;
Vir victum quærit fœnore , tu femore.

64 *In avarum parcum.*

N^Ul Numerare juvat , nihil Addere semper acervo ,
Multiplicare , nihil ; Divide , dives eris.

65 *Veritas & virtus.*

N^Unquam tam pauci , quam nunc bene vivere discunt ;
Nunquam tam multi , qui docuere viam.
Credendi docuere vias hoc tempore multi ;
Qui docuere vias , non docuere viam.

66 *Scriptores hujus seculi.*

C^Arpimus extremas voces & verba priorum.
Priscorum , qui nunc scribimus , Echo sumus.

67 *Tres Rectores Mundi.*

T^Heiologus sapiens fit , ut omnibus omnia fiat :
Juridicus prudens fit , Medicusque sciens.

68 *Votum Autoris.*

N^Ec paupertatem , nec opes desidero magnas :
Nolo parum ; Nimium non volo ; Sat mihi Sat.

69 *Libri prohibiti.*

N^Itimur in vetitum semper cupimusque negatum ,
Uxor amatoris sordet , amica placet .
Deformis , dum servatur , formosa videtur ;
Sic vetitus pulcher creditur esse liber.

70 *In Festum.*

C^Um tibi sim per-Fidus ego , mihi perfidus es tu :
Car ita ? respondes ; Proximus ipse mihi.

Proxi-



Proximus esto tibi; nollem mihi proximus esses:

Cur ita? vicinos non amo, Feste, malos.

71 *Pseudo-ecclesia.*

SE sponsam Domini quæ non Ecclesiæ jactat?

Pars tamen istarum quanta meretriculæ?

Si non mentitur sibi Pseudo-ecclesia, plures

Uxores Christi quam Salomonis erunt.

72 *In Decianum.*

MUndus, ais, malus est: cum sis tamen unus eorum,
Quorum opera mundus fit, Deciane, malus.

73 *In Dindymum.*

BAccalaureus es vetita jam Mœchus in arte,

Dindyme; cum fueris Leno, Magister eris.

74 *Ad G. T. 1606.*

Servi discipulus cum tuis, dominusque magistri,

Felix es dominus, discipulusque miser.

75 *Ragion di Stato.*

REgnum Juris erat recti Respublica quondam:

At nunc jus regni regnat ubique novum.

76 *In quendam crucigerum, Hypocritam.*

ESse crucifixi juratus creditur hostis

Belzebub, & visæ vertere terga cruci:

Non tamen iste crucem fugit impius Angelus omnem;

Est tibi nam * Crux in pectore, corde Satan.

* La cruz en los pechos.

Y el Diablo en los hechos.

77 *Christi vita & mors.*

Multa tulit pro me Christus fecitque : probavit
Perpetiundo hominem se ; faciendo Deum.

78 *Stella Magorum.*

STella Mathematicis incognita , duxit euntes
Ad Christum magnos ex Oriente Magos.
Invenere Magi Dominum duce fidere fido ;
Ad Christum ducat me , mea stella , Fides.

79 *Vitulus aureus à Mose confractus ,
Exod. c. 32. v. 20.*

QUEm facer ex auro vitulum conflagavit Aaron ,
Non finis in magnum crescere Mosche bovem.

80 *Triumviri.*

IMmodicus Medicus , Legistaeque vivit , ut ex-lex :
Quid sunt Theiologi ? nil nisi Theio-logi.

81 *Ad Historiographum.*


LIBer in historia loqueris ? nocet esse locutum ;
Admises falsi nil ? tacuisse nocet.
Dissimulans simulansque sibi per omnia dispar ,
Qui volet historiam scribere , servus erit.

82 *De diluvio & fine mundi.*

LAscivi propter peccata pudenda caloris ,
Improbis in gelida mergitur orbis aqua.
Peccatum propter gelidum frigentis Amoris ,
Restat ut hunc mundum devoret ignis edax.
Per sua sic morbos medici contraria curant :
Algor iners flammis vincitur ; Ardor aquis.

83 *Debitor & Creditor.*

NIL Evangelicum tibi debeo præter Amorem ;
Præter Apostolicam nil tibi credo Fidem.

84 *De Deo & diabolo.*

NUllum vult saluum fieri dæmon; Deus omnes:
Personæ acceptor nullius Ille, nec Hic.

85 *De bono & malo.*

Pœna malum post fata manet, sua præmia iustum,
Alter quod sperat, quod timet, alter habet.

86 *Fac simile. Ad Attalum, J. C.*

ATtale, sacra piæ miscenda Theorica Praxi,
Sanctorum vitas perlege; Fac simile.

87 *Redemptor.*

TE fine nil video, sapio nil: Tu meus es Sol
Solus, Tu meus es Sal; mea sola Salus.

88 *Methodus pecuniaria.*

Magna quidem virtus nummis est posse potiri,
Scire uti, major; maxima, velle frui.

89 *In scriptores hujus seculi.*

SCribendi fatuos tenet insanabilis error:
Sat sibi, si quod non sunt videantur, habent.
Dum temere sibi quisque placet, mortalia scribit:
Raro placent aliis, qui placuere sibi.

90 *Paradoxon.*

Descendat tristem licet Atheus omnis in orcum,
Nullus in inferno est Atheus, ante fuit.

91 *In Gaurum.*

LAudas, Gaure, nihil, reprehendis cuncta: videto
Ne placeas nulli, dum tibi nemo placet.



92

Ad seipsum.

SCire velis Odoëne, quotus tibi restet amicus?
 Pondere non numero discute, certus eris.
 Calculus & digitus numerantem sæpe fefellit;
 Sit licet ignis, habet non leve pondus Amor.

93

Regis & tyranni discrimen.

Quid jus fit, Rex, atque pium, considerat æquus:
 Quid iussit, memori in mente tyrannus habet.
 Iussa boni Regis precibus præpono tyranni:
 Cum rogat iste, jubet; cum jubet ille, rogat.

94

In quendam.

STultorum *Bed-lem* nebulonum Regia *Bried-wel*:
 Utram harum mavis, ingrediare, licet.

95

Mater Ecclesia.

VOs estis Christi fratres, ego sponsa salutor;
 Fratria sum vobis: cur vocor ergo parens?

96

De sectis.

Sensus quinque homini veteres tribuere Sophistæ,
 Tres animas: Animos quis numerare potest?

97

Vita in sanguine.

Cunctorum posuit Moses in sanguine vitam
 Legifer: In Christi sanguine pono meam.

98

*Ad Thomam, Baronem de Ellesmer,
 Angliæ Cancellar. consolatio de obitu Maria
 unicæ filia, optima sœmina. 1612.*

Quis dubitat, Nestor quin plurima, Nestore plura
 Fleverit annosus funera *Mathusalem*?

Nemo



Nemo diu vivit, videat quin crebra fuorum
 Funera: Felices tristia multa vident.
 Crebra tuæ, doleo, videas quod funera prolis;
 Gaudeo, quod funus non videt illa tuum.

99 *In scriptorem ineptum.*

SCripfisti æternos, si fas mihi dicere, libros:
 Finē carent libri principioque tui.

100 *Ad tres Mecænates, Eduard. Noël,
 Guilielmum Sidley, & Rogerum
 Owen.*


CERTatis, semperque precor certate, vicissim,
 Mecænas vestrum sit mihi summus uter?
 Hanc litem inter vos (Litem sine lite) fovebo:
 Nec vinici quemquam, viuere quemque finam.
 Non dedit hæc vobis pia concertatio damnum;
 Cessit at in nostrum Lis generosa lucrum.

101 *In obitum Henrici Principis,
 1612.*

MORTuus est flendus lacrymarum flumine Princeps,
 Spes Britonum, Patris Gloria, Matris Honor:
 Cui fratrem præter Germanum, nemo secundus,
 Præter Germanam, nemo secunda fuit.
 Vivus hōnoratur Princeps, extinctus amatur,
 Gentis Honos & Amor dum fuit ille, fuit.
 Hæc ego dum madidis mecum meditarer ocellis,
 Salsa mihi è gemino guttula fonte fluit.
 Non ignare mali Lector, mihi credito fletu,
 Sermonis cogor rumpere fila; Fleo.

102 *Ad ejusdem Manes.*

TU mihi curasti numeranda stipendia nuper
 Annua; sublatum est hoc mihi morte tua.



Hac vellem te lege tamen superesse Britannis,
 Adderet ut rebus nil tua vita meis.
 Nil prodesse potes mihi nunc; Tibi nil ego: gratum
 Quis tamen in cineres me vetat esse Tuos?

103 • *Ad eundem.*

TU * mihi Cæsar eris, nuper tibi carmine dixi:
 Heu mihi, dicendum nunc, mihi Cæsar eras.
 * *Epigr. I. lib. I. ad E. Noël.*

Libri tertii finis.



A P P E N D I X
EPIGRAMMATUM
JOANNIS OWENI
OXONIENSIS CAMBRO-BRITANNI,

Edente

GOTFRIDO HEGENITIO.



APPENDIX

EPIGRAMMATUM

JOANNIS OWENI.

1 *Virtus.*

PRæter virtutem nihil immortale tenemus ;
Mens manet & Virtus : Cætera mortis erunt.

2 *Fides Christiana.*

OMnis nostra fides pendet ab historia.

3 *Regula vite.*

ESto multorum , soli tibi notus amicus ;
Et quod vis alios ipse filere , file.

4 *De modo faciendi lapidem Philosoph.*

NEscio , vel , si forte scio , me nescio scire :
Quod scio , Socratice me scio scire **N I H I L.**

5 *De Rosa.*

Quo nares perfundat , habet Rosa suavis odorem :
Quo contrectantem pungat , acumen habet.

6 *Ad Effigiem Dn. Thomæ Eggerton, Baronis de Ellesmer, Angliæ Cancellar.*

Virtutis quicunque oculo vis cernere formam ,
Ecce tibi Virtus hujus in ore Viri :
Libertas quanquam Pictoribus atque Poëtis
Audendi semper quidlibet æqua fuit ;



Carmine mentitum nihil hoc liquet esse Poëtam,
Mentitus nihil est Pictor in arte sua.

7 *De Jos. Scaligeri discessu ex Gallia.*

Absentem nunc Gallia Te desiderat unum;
Dum tua Te tenuit Gallia, nullus eras.

8 *Ad Jac. Fetzerum, J. C. Patrit. Noric.*

Fluxarum contemtor opum, cupidusque videndi
Vera per omne solum, mira per omne salum,
Impiger extremum currens FETZERUS ad axem,
Per terram æternas & mare quærit opes.

9 *Ad Joachim. Morfium,*

MORS JUS

non habet in te.

IN libro, Joachime, tuo mea nomina scripsi:
Dignus es in libro nomen habere meo.

10 *De Thoma Farnabio, commentatore
Senecæ Tragædi, ad Lectorem.*

Qui tantum modo lectus erat lectissimus autor,
Nunc intellectus, non modo lectus erit.
Suspensum Senecæ te littera nulla tenebit,
Farnabii dum te spiritus intus agit.

11 *De Thoma Pantfchmano.*

Gallinas pingues, perdices, & phasianos
Divitibus mittis, pauperibusque nihil.
Mittere personæ vis convenientia cuique;
Mitte cibos miseris, divitibusque famem.

12 *In Gulonem quendam.*

Haufisti quot ferre tuus quit pocula venter;
Pocula non lædunt paucula, multa nocent.



13 *Nobilitas cujusdam Hugonis.*

CUM sis vir nihili, vis nobilis, Hugo, videri:
O Hugo nugo, nobilis es nebulo.

14 *Onus ebrii.*

PER varios haustus & per tot pocula Bacchi
Tendimus in lotium.

15 *Jocus D. Oweni.*

JUVENIS oritur, conjugatus moritur,
Viduus refurgit, Phœnix alter.

Ad hunc ita allusit Paul. Stocmannus

IN vivo vitam, mortem, redivivaque membra,
Cernere si cupias; hoc Epigramma legas:
Cælebs es? vivis: moreris sociate: refurgis,
Si viduus. MORSIO cautus OWENUS ait.

16 *Morabantur simul in diversorio Londini Jac. Fetzerus, Joach. Morfius, & Matthias Lejus: Ad hos cum viseret Ovvenus, præsentia ejus ita gratulatur Fetzerus:*

HOC erat in fatis, at numine fata reguntur,
Quod nos conjuncti tres in amore sumus.

Cui responsum ab Oweno.

ULTIMUS huc veni: ter tres heic ante fuistis;
Non tamen ad Musas venit Apollo novem.

Fetzerus iterum:

Ad Musas gratus venit Apollo novem.

17 *Ovvenus*

17 *Owenus de cœlibatu suo.*

IPSA mihi quamvis uxor sapientia detur,
Uxorem nolo ducere, mundus ait.

At Martinus ait; sine conjuge vivere nolo,
Ipsa licet conjux sit mihi stultitia.

18 *Ad M. L.*

TU duc stultitiam; mihi sit sapientia conjux;
Tu regito uxorem; Me mea nupta regat.

19 *Immitatio hujus Epigrammatis.*

ET si sponte mihi sapientia nubere vellet,
Uxorem nollem ducere, mundus ait.
Conjuge, stultus ait, non vellem sponte carere,
Præsto licet conjux sit mihi stultitia.


Ast ego malo meis, quam istorum sensibus uti:
Non bene mundus ait: non bene stultus ait.

Sit tibi stultitia, ast mihi sit sapientia conjux:
Illa tibi magis, hæc sed mihi nupta placet.

M. MATHIAS LEIUS,
Avoillariensis.



Nobi-



Nobilissimi

D. JOACH. MORSII
E P I S T O L A


Ad V. Cl.

D. OWENUM, &c.

Celeberrime Domine OWENE, fautor & amice pl observande.

Cum in Britanniam Vestram abeat nobilis & praeclarus Vir, GOTFRIDUS HEGENITIUS noster, charissimum Phæbo & Musis caput, committendum mihi non putavi, quin ad te scriberem, memoriamque tibi suavissima illius conversationis recentarem, qua me & JACOBUM FETZERUM, Patritium Noricum, annis aliquot retro, sapius apud vos beasti. Nunquam singularis tua pietas, eruditio incomparabilis, ac virtutes eximia effluere ex animis nostris possunt: quarum nos nullibi non apud optimum quemque pracones grati vivimus.


Certè nulla dies elapsa, quo non cum praesentium exhibitore amicissimo (quamdiu Hamburgi commoratus fuit) sermones honorificos de te habuerim: vel potius in depraedicatione immortalium tuarum laudum cum eo non certarim. Si quis enim in Germania, qui nobiscum Te summopere admiratur, &
justo



justo astimio ob divinas ingenii tui cœlestis do-
tes colit, hic ipsius est: quem æternum tue
præstantia obligaris, si ejus fidei & amoris
concredes nova quadam inedita tua Epigram-
matia, Thespiadum in ade locanda. Quod
ut facias, eumque tua benevolentia & fami-
liaritate digneris, non solummodò ego cum
illo: sed & melior pars cordis nostri F E T-
Z E R U S, post longinquam peregrinationem
suam, per omnes prope totius terrarum or-
bis plagas in patriam redux (ubi jam consi-
liarii & legati munere fungitur,) unice no-
biscum te obtestatur.

Nihil enim aureis tuis versiculis venustius,
nervosius, argutius, & doctius uspiam repe-
ritur. Non tantùm provocasti omnem ubi-
que Antiquitatem: verùm & longè lateque
illam in specimine hætenus publicatorum su-
perasti, in quo nihil vastum, inane, tur-
gidum; nihil dissolutum, exsangue, vel spi-
nosum, atque abhorrens à noto genere & mo-
do loquendi: sed cuncta pressa, apta, pud-
ica, perspicua & scitè conspersa salibus, jo-
cis, lepore, ac naturali sua pulchritudine ex-
surgentia, existunt: sic ut iis nihil addi, nihil
demi queat. Vale decus seculi nostri; & me
veteri-tuo affectu orna, in ejusque testimo-
nium me aliquando politissimis tuis litteris &
carminibus invise. Dabam cursim Hamburgi,
anno æra Christiana MDCXXVI. exeun-
te Junio.

Subita.



Subitaneis inclusi hiscē ex Epigrammatibus
D. HEGENITII, quod superioribus die-
bus in honorem vestrum scriptum mecum
communicavit. Peto ut illud cum meis extem-
poraneis & inconcinnis, tua humanitas egre-
gia benigno vultu excipiat.



G. HEGENITII

in Laudem

M A R T I A L I S
BRITANNICI

EPIGRAMMATION.

VULgus opinatur, sat laudis habere Poë-
tam,

Qui sciat immensis fundere mētra logis.


Ecquid OWEN E putas? Tua quod M E L E-
T E M A T A filo

Sint contexta brevi, laus erit inde levis?

Non puto. Namque tua sophos in brevitate
nitescit,

Nec labor iste levis, taliter esse brevem.

ALI-



A L I U D

nescio cujus.

QUantum Bîlbilico debet sua patria vati ,
Tantum pœnè Tibi patria debet humus.
Nemo Tibi arguto, facili, puroque, brevique
Scribere par poterit tale Epigramma stylo.

Sed explicet elogium OWENI ; Elegis
mage & inferiis memoriam defuncti fas esset
prosequi. Nam ille nobis heu pro novem
Musis, novem has litterulas ultima voluntate
reliquit, SEQUIMINI.

Imo have, Lector, & cogita, nos ordine
quem Deus ac Natura jufferit, cunctos secu-
turos.

F I N I S.



58590452

